

1 甲一、通叙迹本两门(2)

2 乙一、闻法时处

如是我闻。一时。佛住王舍城。耆闍崛山中。

2 乙二、闻持之伴(2)

3 丙一、列众(3)

4 丁一、声闻众(2)

5 戊一、比丘众(2)

6 己一、多知识(3)

7 庚一、举类明数

与大比丘众。万二千人俱。

7 庚二、明位叹德

皆是阿罗汉。诸漏已尽。无复烦恼。逮得己利。尽诸有结。心得自在。

7 庚三、列明总结

其名曰。阿若憍陈如。摩诃迦叶。优楼频螺迦叶。伽耶迦叶。那提迦叶。舍利弗。大目犍连。摩诃迦旃延。阿诺楼駄。劫宾那。憍梵波提。离婆多。毕陵伽婆蹉。薄拘罗。摩诃拘絺罗。难陀。孙陀罗难陀。富楼那弥多罗尼子。须菩提。阿难。罗睺罗。如是众所知识大阿罗汉等。

6 己二、少知识

复有学、无学二千人。

5 戊二、比丘尼众

摩诃波闍波提比丘尼。与眷属六千人俱。罗睺罗母。耶输陀罗比丘尼。亦与眷属俱。

4 丁二、菩萨众(3)

5 戊一、气类大数

菩萨摩訶萨八万人。

5 戊二、明位叹德

皆于阿耨多罗三藐三菩提不退转。皆得陀罗尼。乐说辩才。转不退转法轮。供养无量百千诸佛。于诸佛所植众德本。常为诸佛之所称叹。以慈修身。善入佛慧。通达大智。到于彼岸。名称普闻无量世界。能度无数百千众生。

5 戊三、列名总结

其名曰。文殊师利菩萨。观世音菩萨。得大势菩萨。常精进菩萨。不休息菩萨。宝掌菩萨。药王菩萨。勇施菩萨。宝月菩萨。月光菩萨。满月菩萨。大力菩萨。无量力菩萨。越三界菩萨。跋陀婆罗菩萨。弥勒菩萨。宝积菩萨。导师菩萨。如是等菩萨摩訶萨八万人俱。

4 丁三、杂众(8)

5 戊一、欲界天众

尔时释提桓因。与其眷属二万天子俱。复有明月天子。普香天子。宝光天子。四大天王。与其眷属万天子俱。自在天子。大自在天子。与其眷属三万天子俱。

5 戊二、色界天众

娑婆世界主。梵天王。尸弃大梵。光明大梵等。与其眷属万二千天子俱。

5 戊三、龙众

有八龙王。难陀龙王。跋难陀龙王。娑伽罗龙王。和修吉龙王。德叉迦龙王。阿那婆达多龙王。摩那斯龙王。优鉢罗龙王等。各与若干百千眷属俱。

5 戊四、紧那罗众

有四紧那罗王。法紧那罗王。妙法紧那罗王。大法紧那罗王。持法紧那罗王。各与若干百千眷属俱。

5 戊五、乾闥婆众

有四乾闥婆王。乐乾闥婆王。乐音乾闥婆王。美乾闥婆王。美音乾闥婆王。各与若干百千眷属俱。

5 戊六、阿修罗众

有四阿修罗王。婆稚阿修罗王。佉罗骞馱阿修罗王。毗摩质多罗阿修罗王。罗睺阿修罗王。各与若干百千眷属俱。

5 戊七、迦楼罗众

有四迦楼罗王。大威德迦楼罗王。大身迦楼罗王。大满迦楼罗王。如意迦楼罗王。各与若干百千眷属俱。

5 戊八、人众

韦提希子阿闍世王。与若干百千眷属俱。

3 丙二、总结众集

各礼佛足。退坐一面。

1 甲二、别说迹本两门(2)

2 乙一、迹门开权显实(3)

3 丙一、序段(5)

4 丁一、众集序

尔时世尊。四众围绕。供养恭敬。尊重赞叹。

4 丁二、现瑞序(2)

5 戊一、此土六瑞(6)

6 己一、说法瑞

为诸菩萨说大乘经。名无量义。教菩萨法。佛所护念。

6 己二、入定瑞

佛说此经已。结跏趺坐。入于无量义处三昧。身心不动。

6 己三、雨华瑞

是时天雨曼陀罗华。摩诃曼陀罗华。曼殊沙华。摩诃曼殊沙华。而散佛上。及诸大众。

6 己四、地动瑞

普佛世界。六种震动。

6 己五、众喜瑞

尔时会中比丘。比丘尼。优婆塞。优婆夷。天。龙。夜叉。乾闥婆。阿修罗。迦楼罗。紧那罗。摩睺罗伽。人。非人。及诸小王。转轮圣王。是诸大众。得未曾有。欢喜合掌。一心观佛。

6 己六、放光瑞

尔时。佛放眉间白毫相光。照东方万八千世界。靡不周徧

5 戊二、彼土六瑞(6)

6 己一、见六趣瑞

下至阿鼻地狱。上至阿迦尼咤天。于此世界。尽见彼土六趣众生

6 己二、见诸佛瑞

又见彼土现在诸佛。

6 己三、闻说法瑞

及闻诸佛所说经法。

6 己四、见四众得道瑞

并见彼诸比丘。比丘尼。优婆塞。优婆夷。诸修行得道者。

6 己五、见菩萨行瑞

复见诸菩萨摩诃萨。种种因缘。种种信解。种种相貌。行菩萨道。

6 己六、见诸佛涅槃瑞

复见诸佛般涅槃者。复见诸佛般涅槃后。以佛舍利。起七宝塔。

4 丁三、疑念序(2)

5 戊一、弥勒疑念

尔时弥勒菩萨作是念。今者世尊现神变相。以何因缘而有此瑞。今佛世尊入于三昧。是不可思议现希有事。当以问谁。谁能答者。复作此念。是文殊师利。法王之子。已曾亲近供养过去无量诸佛。必应见此希有之相。我今当问。

5 戊二、大众疑念

尔时。比丘。比丘尼。优婆塞。优婆夷。及诸天龙鬼神等。咸作此念。是佛光明神通之相。今当问谁。

4 丁四、发问序(2)

5 戊一、长文(2)

6 己一、经家述

尔时弥勒菩萨。欲自决疑。又观四众。比丘。比丘尼。优婆塞。优婆夷。及诸天龙鬼神等。众会之心。

6 己二、正发问

而问文殊师利言。以何因缘。而有此瑞。神通之相。放大光明。照于东方万八千土。悉见彼佛国界庄严。

5 戊二、偈颂(2)

6 己一、颂上问(2)

7 庚一、问此土六瑞

于是弥勒菩萨。欲重宣此义。以偈问曰：

文殊师利。导师何故。眉间白毫。大光普照。

雨曼陀罗。曼殊沙华。栴檀香风。悦可众心。

以是因缘。地皆严净。而此世界。六种震动。

时四部众。咸皆欢喜。身意快然。得未曾有。

7 庚二、问他土六瑞(6)

8 辛一、问六趣众生

眉间光明。照于东方。万八千土。皆如金色。

从阿鼻狱。上至有顶。诸世界中。六道众生。

生死所趣。善恶业缘。受报好丑。于此悉见。

8 辛二、问见彼佛及闻说法

又覩诸佛。圣主师子。演说经典。微妙第一。

其声清静。出柔软音。教诸菩萨。无数亿万。

梵音深妙。令人乐闻。各于世界。讲说正法。

种种因缘。以无量喻。照明佛法。开悟众生。

8 辛三、问他土四众

若人遭苦。厌老病死。为说涅槃。尽诸苦际。

若人有福。曾供养佛。志求胜法。为说缘觉。

若有佛子。修种种行。求无上慧。为说净道。

8 辛四、结前开后

文殊师利。我住于此。见闻若斯。及千亿事。

如是众多。今当略说。

8 辛五、问他土修菩萨行(3)

9 壬一、总问

我见彼土。恒沙菩萨。种种因缘。而求佛道。

9 壬二、次第问(6)

10 癸一、问施

或有行施。金银珊瑚。真珠摩尼。砗磲玛瑙。
金刚诸珍。奴婢车乘。宝饰辇舆。欢喜布施。
回向佛道。愿得是乘。三界第一。诸佛所叹。
或有菩萨。驷马宝车。栏楯华盖。轩饰布施。
复见菩萨。身肉手足。及妻子施。求无上道。
又见菩萨。头目身体。欣乐施与。求佛智慧。

10 癸二、问戒

文殊师利。我见诸王。往诣佛所。问无上道。
便舍乐土。宫殿臣妾。剃除须发。而被法服。

10 癸三、问忍

或见菩萨。而作比丘。独处闲静。乐诵经典。

10 癸四、问进

又见菩萨。勇猛精进。入于深山。思惟佛道。

10 癸五、问禅

又见离欲。常处空闲。深修禅定。得五神通。

又见菩萨。安禅合掌。以千万偈。赞诸法王。

10 癸六、问慧

复见菩萨。智深志固。能问诸佛。闻悉受持。

又见佛子。定慧具足。以无量喻。为众讲说。

欣乐说法。化诸菩萨。破魔兵众。而击法鼓。

9 壬三、杂问(7)

10 癸一、问禅

又见菩萨。寂然宴默。天龙恭敬。不以为喜。

又见菩萨。处林放光。济地狱苦。令入佛道。

10 癸二、问进

又见佛子。未尝睡眠。经行林中。勤求佛道。

10 癸三、问戒

又见具戒。威仪无缺。净如宝珠。以求佛道。

10 癸四、问忍

又见佛子。住忍辱力。增上慢人。恶骂捶打。

皆悉能忍。以求佛道。

10 癸五、更问禅

又见菩萨。离诸戏笑。及痴眷属。亲近智者。

一心除乱。摄念山林。亿千万岁。以求佛道。

10 癸六、问施

或见菩萨。肴膳饮食。百种汤药。施佛及僧。

名衣上服。价直千万。或无价衣。施佛及僧。

千万亿种。栴檀宝舍。众妙卧具。施佛及僧。

清静园林。华果茂盛。流泉浴池。施佛及僧。

如是等施。种种微妙。欢喜无厌。求无上道。

10 癸七、问慧

或有菩萨。说寂灭法。种种教诏。无数众生。

或见菩萨。观诸法性。无有二相。犹如虚空。

又见佛子。心无所着。以此妙慧。求无上道。

8 辛六、问他土供养舍利

文殊师利。又有菩萨。佛灭度后。供养舍利。

又见佛子。造诸塔庙。无数恒沙。严饰国界。

宝塔高妙。五千由旬。纵广正等。二千由旬。

一一塔庙。各千幢幡。珠交露幔。宝铃和鸣。

诸天龙神。人及非人。香华伎乐。常以供养。

文殊师利。诸佛子等。为供舍利。严饰塔庙。

国界自然。殊特妙好。如天树王。其华开敷。

6 己二、颂请答(2)

7 庚一、举疑述请

佛放一光。我及众会。见此国界。种种殊妙。

诸佛神力。智慧希有。放一净光。照无量国。

我等见此。得未曾有。佛子文殊。愿决众疑。

7 庚二、释四伏难

四众欣仰。瞻仁及我。世尊何故。放斯光明。

佛子时答。决疑令喜。何所饶益。演斯光明。

佛坐道场。所得妙法。为欲说此。为当授记。

示诸佛土。众宝严净。及见诸佛。此非小缘。

文殊当知。四众龙神。瞻察仁者。为说何等。

4 丁五、答问序(2)

5 戊一、长文(4)

6 己一、惟忖答

尔时文殊师利。语弥勒菩萨摩訶萨。及诸大士。善男子等。如我惟忖。今佛世尊欲说大法。雨大法雨。吹大法螺。击大法鼓。演大法义。

6 己二、略举曾见以答

诸善男子。我于过去诸佛曾见此瑞。放斯光已。即说大法。是故当知今佛现光。亦复如是。欲令众生。咸得闻知一切世间难信之法。故现斯瑞。

6 己三、广举曾见以答(3)

7 庚一、引佛同(3)

8 辛一、时节

诸善男子。如过去无量无边不可思议阿僧祇劫。

8 辛二、标名

尔时有佛。号日月灯明如来。应供。正徧知。明行足。善逝。世间解。无上士。调御丈夫。天人师。佛。世尊。

8 辛三、说法

演说正法。初善。中善。后善。其义深远。其语巧妙。纯一无杂。具足清白梵行之相。为求声闻者。说应四谛法。度生老病死。究竟涅槃。为求辟支佛者。说应十二因缘法。为诸菩萨。说应六波罗蜜。令得阿耨多罗三藐三菩提。成一切种智。

7 庚二、引二万佛同

次复有佛。亦名日月灯明。次复有佛。亦名日月灯明。如是二万佛皆同一字。号日月灯明。又同一姓。姓颇罗堕。弥勒当知。初佛后佛皆同一字。名日月灯明。十号具足。所可说法。初中后善。

7 庚三、引最后佛同(3)

8 辛一、曾见事与今已同

其最后佛未出家时。有八王子。一名有意。二名善意。三名无量意。四名宝意。五名增意。六名除疑意。七名响意。八名法意。是八王子威德自在。各领四天下。是诸王子。闻父出家得阿耨多罗三藐三菩提。悉舍王位。亦随出家。发大乘意。常修梵行。皆为法师。已于千万佛所植诸善本。

8 辛二、曾见事与今现同(2)

9 壬一、现瑞同(2)

10 癸一、此土六瑞同

是时日月灯明佛。说大乘经。名无量义。教菩萨法。佛所护念。说是经已。即于大众中结加趺坐。入于无量义处三昧。身心不动。是时天雨曼陀罗华。摩诃曼陀罗华。曼殊沙华。摩诃曼殊沙华。而散佛上。及诸大众。普佛世界。六种震动。尔时会中比丘。比丘尼。优婆塞。优婆夷。天龙。夜叉。乾闥婆。阿修罗。迦楼罗。紧那罗。摩睺罗伽。人。非人。及诸小王。转轮圣王等。是诸大众得未曾有。欢喜合掌。一心观佛。尔时。如来放眉间白毫相光。照东方万八千佛土。靡不周徧。

10 癸二、他土六瑞同

如今所见是诸佛土。

9 壬二、疑念同

弥勒当知。尔时会中。有二十亿菩萨。乐欲听法。是诸菩萨。见此光明普照佛土。得未曾有。欲知此光所为因缘。

8 辛三、曾见事与今当同(5)

9 壬一、因人说法同

时有菩萨。名曰妙光。有八百弟子。是时日月灯明佛。从三昧起。因妙光菩萨。说大乘经。名妙法莲华。教菩萨法。佛所护念。

9 壬二、时节同

六十小劫。不起于座。时会听者。亦坐一处。六十小劫。身心不动。听佛所说。谓如食顷。是时众中。无有一人。若身若心。而生懈倦。

9 壬三、唱灭同

日月灯明佛。于六十小劫说是经已。即于梵魔。沙门。婆罗门。及天人。阿修罗众中。而宣此言。如来于今日中夜。当入无余涅槃。

9 壬四、授记同

时有菩萨。名曰德藏。日月灯明佛即授其记。告诸比丘。是德藏菩萨。次当作佛。号曰净身。多陀阿伽度。阿罗诃。三藐三佛陀。

9 壬五、灭后通经同(3)

10 癸一、正明入灭

佛授记已。便于中夜入无余涅槃。

10 癸二、灭后通经利益

佛灭度后。妙光菩萨。持妙法莲华经。满八十小劫。为人演说。日月灯明佛八子。皆师妙光。妙光教化。令其坚固阿耨多罗三藐三菩提。是诸王子。供养无量百千万亿佛已。皆成佛道。其最后成佛者。名曰然灯。八百弟子中有一人。号曰求名。贪着利养。虽复读诵众经。而不通利。多所忘失。故号求名。是人亦以种诸善根因缘故。得值无量百千万亿诸佛。供养恭敬。尊重赞叹。

10 癸三、结会古今

弥勒当知。尔时妙光菩萨。岂异人乎。我身是也。求名菩萨。汝身是也。

6 己四、分明判答

今见此瑞。与本无异。是故惟忖。今日如来当说大乘经。名妙法莲华。教菩萨法。佛所护念。

5 戊二、偈颂(2)

6 己一、颂广举曾见以答(2)

7 庚一、颂一佛同

尔时文殊师利。于大众中欲重宣此义。而说偈言：

我念过去世。无量无数劫。有佛人中尊。号日月灯明。

世尊演说法。度无量众生。无数亿菩萨。令入佛智慧。

7 庚二、颂最后佛同(3)

8 辛一、颂曾见事与今已同

佛未出家时。所生八王子。见大圣出家。亦随修梵行。

8 辛二、颂曾见事与今现同(2)

9 壬一、颂现瑞同(2)

10 癸一、颂此土六瑞同

时佛说大乘。经名无量义。于诸大众中。而为广分别。

佛说此经已。即于法座上。跏趺坐三昧。名无量义处。

天雨曼陀华。天鼓自然鸣。诸天龙鬼神。供养人中尊。

一切诸佛土。实时大震动。佛放眉间光。现诸希有事。

10 癸二、颂他土六瑞同

此光照东方。万八千佛土。示一切众生。生死业报处。

有见诸佛土。以众宝庄严。琉璃玻璃色。斯由佛光照。

及见诸天人。龙神夜叉众。干闥紧那罗。各供养其佛。

又见诸如来。自然成佛道。身色如金山。端严甚微妙。

如净琉璃中。内现真金像。世尊在大众。敷演深法义。

一一诸佛土。声闻众无数。因佛光所照。悉见彼大众。

又见诸菩萨。行施忍辱等。其数如恒沙。斯由佛光照。

又见诸菩萨。深入诸禅定。身心寂不动。以求无上道。

又见诸菩萨。知法寂灭相。各于其国土。说法求佛道。

9 壬二、颂疑念同

尔时四部众。见日月灯佛。现大神通力。其心皆欢喜。

各各自相问。是事何因缘。

8 辛三、颂曾见事与今当同(5)

9 壬一、颂因人说法

天人所奉尊。适从三昧起。赞妙光菩萨。汝为世间眼。

一切所归信。能奉持法藏。如我所说法。唯汝能证知。

世尊既赞叹。令妙光欢喜。说是法华经。

9 壬二、颂时节

满六十小劫。不起于此座。所说上妙法。是妙光法师。

悉皆能受持。

9 壬三、颂唱灭

佛说是法华。令众欢喜已。寻即于是日。告于天人众。

诸法实相义。已为汝等说。我今于中夜。当入于涅槃。

汝一心精进。当离于放逸。诸佛甚难值。亿劫时一遇。

9 壬四、颂授记

世尊诸子等。闻佛入涅槃。各各怀悲恼。佛灭一何速。

圣主法之王。安慰无量众。我若灭度时。汝等勿忧怖。

是德藏菩萨。于无漏实相。心已得通达。其次当作佛。

号曰为净身。亦度无量众。

9 壬五、颂灭后通经(3)

10 癸一、颂示灭供养精进

佛此夜灭度。如薪尽火灭。分布诸舍利。而起无量塔。

比丘比丘尼。其数如恒沙。倍复加精进。以求无上道。

10 癸二、颂灭后通经利益

是妙光法师。奉持佛法藏。八十小劫中。广宣法华经。

是诸八王子。妙光所开化。坚固无上道。当见无数佛。

供养诸佛已。随顺行大道。相继得成佛。转次而授记。

最后天中天。号曰然灯佛。诸仙之导师。度脱无量众。

是妙光法师。时有一弟子。心常怀懈怠。贪着于名利。

求名利无厌。多游族姓家。弃舍所习诵。废忘不通利。

以是因缘故。号之为求名。亦行众善业。得见无数佛。

供养于诸佛。随顺行大道。具六波罗蜜。今见释师子。

其后当作佛。号名曰弥勒。广度诸众生。其数无有量。

10 癸三、颂结会古今

彼佛灭度后。懈怠者汝是。妙光法师者。今则我身是。

6 己二、颂分明判答(3)

7 庚一、颂说法华经

我见灯明佛。本光瑞如此。以是知今佛。欲说法华经。

7 庚二、颂教菩萨法

今相如本瑞。是诸佛方便。今佛放光明。助发实相义。

诸人今当知。合掌一心待。佛当雨法雨。充足求道者。

7 庚三、颂佛所护念

诸求三乘人。若有疑悔者。佛当为除断。令尽无有余。

3 丙二、正说段(2)

4 丁一、略开三显一动执生疑(2)

5 戊一、略开显(2)

6 己一、长文重颂(2)，叹佛二智

7 庚一、长文(2)

8 辛一、寄言叹二智(2)

9 壬一、明诸佛权实(3)

10 癸一、双叹

尔时世尊。从三昧安详而起。告舍利弗。诸佛智慧。甚深无量。其智慧门。难解难入。一切声闻辟支佛所不能知。

10 癸二、双释

所以者何。佛曾亲近百千万亿无数诸佛。尽行诸佛无量道法。勇猛精进。名称普闻。

10 癸三、双结

成就甚深未曾有法。随宜所说。意趣难解。

9 壬二、明释迦权实(3)

10 癸一、双叹

舍利弗。吾从成佛已来。种种因缘。种种譬喻。广演言教。无数方便。引导众生。令离诸着。

10 癸二、双释

所以者何。如来方便知见波罗蜜。皆已具足。

10 癸三、双结

舍利弗。如来知见。广大深远。无量无碍。力无所畏。禅定解脱。三昧。深入无际。成就一切未曾有法。

8 辛二、绝言叹二智(2)

9 壬一、举绝叹之由(2)

10 癸一、正举绝叹之由

舍利弗。如来能种种分别。巧说诸法。言辞柔软。悦可众心。

10 癸二、指绝言之境

舍利弗。取要言之。无量无边未曾有法。佛悉成就。

9 壬二、正绝言叹(2)

10 癸一、绝言叹

止。舍利弗。不须复说。

10 癸二、释止叹意

所以者何。佛所成就第一希有难解之法。唯佛与佛。乃能究尽诸法实相。

7 庚二、重颂(2)

8 辛一、颂寄言叹二智(2)

9 壬一、合颂叹二佛二智

尔时世尊。欲重宣此义而说偈言：

世雄不可量。诸天及世人。一切众生类。无能知佛者。

佛力无所畏。解脱诸三昧。及佛诸余法。无能测量者。

9 **壬二、合颂二佛释叹结叹**

本从无数佛。具足行诸道。甚深微妙法。难见难可了。

于无量亿劫。行此诸道已。道场得成果。我已悉知见。

8 **辛二、颂绝言叹二智(3)**

9 **壬一、颂释止叹意**

如是大果报。种种性相义。我及十方佛。乃能知是事。

9 **壬二、正颂绝言叹**

是法不可示。言辞相寂灭。诸余众生类。无有能得解。

除诸菩萨众。信力坚固者。诸佛弟子众。曾供养诸佛。

一切漏已尽。住是最后身。如是诸人等。其力所不堪。

假使满世间。皆如舍利弗。尽思共度量。不能测佛智。

正使满十方。皆如舍利弗。及余诸弟子。亦满十方刹。

尽思共度量。亦复不能知。辟支佛利智。无漏最后身。

亦满十方界。其数如竹林。斯等共一心。于亿无量劫。

欲思佛实智。莫能知少分。新发意菩萨。供养无数佛。

了达诸义趣。又能善说法。如稻麻竹苇。充满十方刹。

一心以妙智。于恒河沙劫。咸皆共思量。不能知佛智。

不退诸菩萨。其数如恒沙。一心共思求。亦复不能知。

9 **壬三、追颂绝言境**

又告舍利弗。无漏不思议。甚深微妙法。我今已具得。

唯我知是相。十方佛亦然。

6 **己二、偈颂(2)，正略开显动执生疑**

7 **庚一、明诸佛显实**

舍利弗当知。诸佛语无异。于佛所说法。当生大信力。

世尊法久后。要当说真实。

7 **庚二、明释迦开三**

告诸声闻众。及求缘觉乘。我令脱苦缚。逮得涅槃者。

佛以方便力。示以三乘教。众生处处着。引之令得出。

5 **戊二、腾疑请(2)**

6 **己一、叙疑(2)**

7 **庚一、经家叙**

尔时大众中。有诸声闻漏尽阿罗汉。阿若憍陈如等千二百人。及发声闻辟支佛心。比丘。比丘尼。优婆塞。优婆夷。各作是念。

7 **庚二、正生疑**

今者世尊。何故殷勤称叹方便。而作是言。佛所得法。甚深难解。有所言说。意趣难知。一切声闻辟支佛所不能及。佛说一解脱义。我等亦得此法。到于涅槃。而今不知是义所趣。

6 己二、请决(5)
7 庚一、第一请(2)
8 辛一、长文(2)
9 壬一、陈疑

尔时。舍利弗知四众心疑。自亦未了。而白佛言。世尊。何因何缘。愍歎称叹诸佛第一方便。甚深微妙难解之法。

9 壬二、陈请

我自昔来。未曾从佛闻如是说。今者四众咸皆有疑。惟愿世尊敷演斯事。世尊何故愍歎称叹。甚深微妙难解之法。

8 辛二、偈颂(5)
9 壬一、颂疑二智

尔时。舍利弗欲重宣此义。而说偈言：

慧日大圣尊。久乃说是法。自说得如是。力无畏三昧。
禅定解脱等。不可思议法。道场所得法。无能发问者。
我意难可测。亦无能问者。无问而自说。称叹所行道。
智慧甚微妙。诸佛之所得。

9 壬二、颂三乘四众疑

无漏诸罗汉。及求涅槃者。今皆堕疑网。佛何故说是。
其求缘觉者。比丘比丘尼。诸天龙鬼神。及乾闥婆等。
相视怀犹豫。瞻仰两足尊。是事为云何。愿佛为解说。
初句明小乘。第二句明六度大乘。次偈明中乘及四众等。

9 壬三、颂自疑

于诸声闻众。佛说我第一。我今自于智。疑惑不能了。
为是究竟法。为是所行道。

9 壬四、颂佛子疑

佛口所生子。合掌瞻仰待。愿出微妙音。时为如实说。

9 壬五、总明同疑请

诸天龙神等。其数如恒沙。求佛诸菩萨。大数有八万。
又诸万亿国。转轮圣王至。合掌以敬心。欲闻具足道。

7 庚二、第二止

尔时佛告舍利弗。止。止。不须复说。若说是事。一切世间诸天及人。皆当惊疑。

7 庚三、第二请

舍利弗重白佛言。世尊。惟愿说之。惟愿说之。所以者何。是会无数百千万亿阿僧祇众生。曾见诸佛。诸根猛利。智慧明了。闻佛所说。则能敬信。

尔时。舍利弗欲重宣此义。而说偈言：

法王无上尊。惟说愿勿虑。是会无量众。有能敬信者。

7 庚四、第三止

佛复止。舍利弗。若说是事。一切世间天人。阿修罗皆当惊疑。增上慢比丘。将坠于大坑。尔时世尊重说偈言：

止止不须说。我法妙难思。诸增上慢者。闻必不敬信。

7 庚五、第三请

尔时。舍利弗重白佛言。世尊。惟愿说之。惟愿说之。今此会中。如我等比百千万亿。世世已曾从佛受化。如此人等。必能敬信。长夜安稳。多所饶益。尔时。舍利弗欲重宣此义。而说偈言：

无上两足尊。愿说第一法。我为佛长子。惟垂分别说。

是会无量众。能敬信此法。佛已曾世世。教化如是等。

皆一心合掌。欲听受佛语。我等千二百。及余求佛者。

愿为此众故。惟垂分别说。是等闻此法。则生大欢喜。

4 丁二、广开三显一断疑生信(3)

5 戊一、法说周(5)

6 己一、正法说(2)

7 庚一、长文(3)

8 辛一、许(3)

9 壬一、顺许

尔时世尊告舍利弗。汝已殷懃三请。岂得不说。

汝已殷懃。是顺。岂得不说。是许也。

9 壬二、诚许

汝今谛听。善思念之。吾当为汝分别解说。

9 壬三、拣许

说此语时。会中有比丘。比丘尼。优婆塞。优婆夷。五千人等。即从座起。礼佛而退。所以者何。此辈罪根深重。及增上慢。未得谓得。未证谓证。有如此失。是以不住。世尊默然而不制止。尔时佛告舍利弗。我今此众。无复枝叶。纯有贞实。舍利弗。如是增上慢人。退亦佳矣。汝今善听。当为汝说。

8 辛二、受旨

舍利弗言。唯然世尊。愿乐欲闻。

8 辛三、正说(2)

9 壬一、四佛章，广上诸佛权实(2)

10 癸一、总明诸佛(4)

11 子一、叹法希有

佛告舍利弗。如是妙法。诸佛如来时乃说之。如优昙鉢华。时一现耳。

11 子二、说无虚妄

舍利弗。汝等当信佛之所说。言不虚妄。

11 子三、开方便(3)

12 丑一、开

舍利弗。诸佛随宜说法。意趣难解。

12 丑二、释

所以者何。我以无数方便。种种因缘。譬喻言辞。演说诸法。

12 丑三、结

是法非思量分别之所能解。唯有诸佛。乃能知之。

11 子四、示真实(5)

12 丑一、标胜人法

初文如前。

12 丑二、标出世意

所以者何。诸佛世尊唯以一大事因缘故。出现于世。

12 丑三、重示

舍利弗。云何名诸佛世尊唯以一大事因缘故。出现于世。

12 丑四、正释(4)

13 寅一、明理一

诸佛世尊。欲令众生开佛知见。使得清净故。出现于世。欲示众生佛之知见故。出现于世。欲令众生悟佛知见故。出现于世。欲令众生入佛知见道故。出现于世。舍利弗。是为诸佛以一大事因缘故。出现于世。

13 寅二、明人一

佛告舍利弗。诸佛如来但教化菩萨。

13 寅三、明行一

诸有所作。常为一事。唯以佛之知见。示悟众生。

13 寅四、明教一

舍利弗。如来但以一佛乘故。为众生说法。无有余乘。若二若三。

12 丑五、总结

舍利弗。一切十方诸佛。法亦如是。

10 癸二、列三世佛(3)

11 子一、过去佛

舍利弗。过去诸佛。以无量无数方便。种种因缘。譬喻言辞。而为众生演说诸法。是法皆为一佛乘故。是诸众生。从诸佛闻法。究竟皆得一切种智。

11 子二、未来佛

舍利弗。未来诸佛当出于世。亦以无量无数方便。种种因缘。譬喻言辞。而为众生演说诸法。是法皆为一佛乘故。是诸众生。从佛闻法。究竟皆得一切种智。

11 子三、现在佛

舍利弗。现在十方无量百千万亿佛土中。诸佛世尊。多所饶益。安乐众生。是诸佛亦以无量无数方便。种种因缘。譬喻言辞。而为众生演说诸法。是法皆为一佛乘故。是诸众生从佛闻法。究竟皆得一切种智。舍利弗。是诸佛但教化菩萨。欲以佛之知见示众生故。欲以佛之知见悟众生故。欲令众生入佛之知见故。

9 壬二、释迦章，广上释迦权实(5)

10 癸一、开权

舍利弗。我今亦复如是。知诸众生有种种欲。深心所着。随其本性。以种种因缘。譬喻言辞。方便力而为说法。

10 癸二、显实

舍利弗。如此皆为得一佛乘。一切种智故。

10 癸三、举五浊释方便(3)

11 子一、标意

舍利弗。十方世界中。尚无二乘。何况有三。

11 子二、举五浊

舍利弗。诸佛出于五浊恶世。所谓劫浊。烦恼浊。众生浊。见浊。命浊。

11 子三、结释

如是舍利弗。劫浊乱时。众生垢重。慳贪嫉妒。成就诸不善根故。诸佛以方便力。于一佛乘。分别说三。

10 癸四、拣伪敦信一实(2)

11 子一、拣真伪(2)

12 丑一、若不闻不知，非真弟子

舍利弗。若我弟子。自谓阿罗汉辟支佛者。不闻不知诸佛如来但教化菩萨事。此非佛弟子。非阿罗汉。非辟支佛。

12 丑二、若闻不信受，是增上慢

又舍利弗。是诸比丘。比丘尼。自谓已得阿罗汉。是最后身。究竟涅槃。便不复志求阿耨多罗三藐三菩提。当知此辈皆是增上慢人。所以者何。若有比丘实得阿罗汉。若不信此法。无有是处。

11 子二、开除释疑(2)

12 丑一、开除

除佛灭度后。现前无佛。所以者何。佛灭度后。如是等经。受持读诵解义者。是人难得。

12 丑二、释疑

若遇余佛。于此法中便得决了。

10 癸五、明无虚妄

舍利弗。汝等当一心信解。受持佛语。诸佛如来。言无虚妄。无有余乘。唯一佛乘。

7 庚二、偈颂(2)

8 辛一、颂许答

尔时。世尊欲重宣此义。而说偈言。

比丘比丘尼。有怀增上慢。优婆塞我慢。优婆夷不信。

如是四众等。其数有五千。不自见其过。于戒有缺漏。

护惜其瑕疵。是小智已出。众中之糟糠。佛威德故去。

斯人少福德。不堪受是法。此众无枝叶。唯有诸贞实。

舍利弗善听。

8 辛二、颂正说(2)

9 壬一、颂四佛章(4)

10 癸一、颂诸佛(5)

11 子一、颂施权

诸佛所得法。无量方便力。而为众生说。众生心所念。

种种所行道。若干诸欲性。先世善恶业。佛悉知是已。

以诸缘譬喻。言辞方便力。令一切欢喜。或说修多罗。

伽陀及本事。本生未曾有。亦说于因缘。譬喻并祇夜。

优波提舍经。钝根乐小法。贪着于生死。于诸无量佛。

不行深妙道。众苦所恼乱。为是说涅槃。

11 子二、颂显实(4)

12 丑一、颂理一

我说是方便。令得入佛慧。未曾说汝等。当得成佛道。

所以未曾说。说时未至故。今正是其时。决定说大乘。

我此九部法。随顺众生说。入大乘为本。以故说是经。

12 丑二、颂人一

有佛子心净。柔软亦利根。无量诸佛所。而行深妙道。
为此诸佛子。说是大乘经。我记如是人。来世成佛道。
以深心念佛。修持净戒故。此等闻得佛。大喜充徧身。
佛知彼心行。故为说大乘。声闻若菩萨。闻我所说法。
乃至于一偈。皆成佛无疑。

12 丑三、颂教一

十方佛土中。唯有一乘法。无二亦无三。除佛方便说。
但以假名字。引导于众生。说佛智慧故。

12 丑四、颂行一

诸佛出于世。唯此一事实。余二则非真。终不以小乘。
济度于众生。佛自住大乘。如其所得法。定慧力庄严。
以此度众生。自证无上道。大乘平等法。若以小乘化。
乃至于一人。我则堕慳贪。此事为不可。

11 子三、颂劝信(2)

12 丑一、举果劝信

若人信归佛。如来不欺诳。亦无贪嫉意。断诸法中恶。
故佛于十方。而独无所畏。我以相严身。光明照世间。
无量众所尊。为说实相印。

12 丑二、举因劝信

舍利弗当知。我本立誓愿。欲令一切众。如我等无异。
如我昔所愿。今者已满足。化一切众生。皆令入佛道。

11 子四、举五浊(4)

12 丑一、总明五浊障大

若我遇众生。尽教以佛道。无智者错乱。迷惑不受教。

12 丑二、别明五障

我知此众生。未曾修善本。坚着于五欲。痴爱故生恼。
以诸欲因缘。坠堕三恶道。轮回六趣中。备受诸苦毒。
受胎之微形。世世常增长。薄德少福人。众苦所逼迫。
入邪见稠林。若有若无等。依止此诸见。具足六十二。
深着虚妄法。坚受不可舍。我慢自矜高。谄曲心不实。
于千万亿劫。不闻佛名字。亦不闻正法。如是人难度。

12 丑三、明为五浊故说小

是故舍利弗。我为设方便。说诸尽苦道。示之以涅槃。

12 丑四、明为大施小。小治五浊。大愿得兴

我虽说涅槃。是亦非真灭。诸法从本来。常自寂灭相。
佛子行道已。来世得作佛。

11 子五、颂不虚

我有方便力。开示三乘法。一切诸世尊。皆说一乘道。

今此诸大众。皆应除疑惑。诸佛语无异。惟一无二乘。

10 癸二、颂过去佛(2)

11 子一、略颂开显

过去无数劫。无量灭度佛。百千万亿种。其数不可量。

如是诸世尊。种种缘譬喻。无数方便力。演说诸法相。

是诸世尊等。皆说一乘法。化无量众生。令入于佛道。

11 子二、广颂开显(2)

12 丑一、总明方便助显

又诸大圣主。知一切世间。天人群生类。深心之所欲。

更以异方便。助显第一义。

12 丑二、别示开显之相(2)

13 寅一、约众善显缘因功德(7)

14 卯一、约六度明开显

若有众生类。值诸过去佛。若闻法布施。或持戒忍辱。

精进禅智等。种种修福慧。如是诸人等。皆已成佛道。

14 卯二、约悲恋心明开显

诸佛灭度后。若人善软心。如是诸众生。皆已成佛道。

14 卯三、约供舍利明开显

诸佛灭度已。供养舍利者。起万亿种塔。金银及玻璃。

砗磲与玛瑙。玫瑰琉璃珠。清净广严饰。庄校于诸塔。

或有起石庙。栴檀及沈水。木栴并余材。甑瓦泥土等。

若于旷野中。积土成佛庙。乃至童子戏。聚沙为佛塔。

如是诸人等。皆已成佛道。

14 卯四、约造佛像明开显

若人为佛故。建立诸形像。刻雕成众相。皆已成佛道。

或以七宝成。鍮鈷赤白铜。白镴及铅锡。铁木及与泥。

或以胶漆布。严饰作佛像。如是诸人等。皆已成佛道。

14 卯五、约画佛像明开显

彩画作佛像。百福庄严相。自作若使人。皆已成佛道。

乃至童子戏。若草木及革。或以指爪甲。而画作佛像。

如是诸人等。渐渐积功德。具足大悲心。皆已成佛道。

但化诸菩萨。度脱无量众。

14 卯六、约供塔像明开显

若人于塔庙。宝像及画像。以华香幡盖。敬心而供养。

若使人作乐。击鼓吹角贝。箫笛琴箜篌。琵琶铙铜钹。

如是众妙音。尽持以供养。或以欢喜心。歌呗颂佛德。

乃至一小音。皆已成佛道。若人散乱心。乃至以一华。

供养于画像。渐见无数佛。或有人礼拜。或复但合掌。
乃至举一手。或复小低头。以此供养像。渐见无量佛。
自成无上道。广度无数众。入无余涅槃。如薪尽火灭。

14 卯七、约称佛名明开显

若人散乱心。入于塔庙中。一称南无佛。皆已成佛道。

13 寅二、约闻经显了因功德

于诸过去佛。在世或灭后。若有闻是法。皆已成佛道。

10 癸三、颂未来佛(2)

11 子一、颂施权

未来诸世尊。其数无有量。是诸如来等。亦方便说法。

11 子二、颂显实(4)

12 丑一、颂人一

一切诸如来。以无量方便。度脱诸众生。入佛无漏智。

若有闻法者。无一不成佛。

12 丑二、颂行一

诸佛本誓愿。我所行佛道。普欲令众生。亦同得此道。

12 丑三、颂教一

未来世诸佛。虽说百千亿。无数诸法门。其实为一乘。

诸佛两足尊。知法常无性。佛种从缘起。是故说一乘。

12 丑四、颂理一

是法住法位。世间相常住。于道场知己。导师方便说。

10 癸四、颂现在佛

天人所供养。现在十方佛。其数如恒沙。出现于世间。

安隐众生故。亦说如是法。知第一寂灭。以方便力故。

虽示种种道。其实为佛乘。知众生诸行。深心之所念。

过去所习业。欲性精进力。及诸根利钝。以种种因缘。

譬喻亦言辞。随应方便说。

9 壬二、颂释迦章(2)

10 癸一、略颂上权实，为下文总譬作本(2)

11 子一、颂显实

今我亦如是。安隐众生故。以种种法门。宣示于佛道。

11 子二、颂施权

我以智慧力。知众生性欲。方便说诸法。皆令得欢喜。

10 癸二、广颂上六义，为下文别譬作本(6)

11 子一、颂五浊，为下见火譬作本

舍利弗当知。我以佛眼观。见六道众生。贫穷无福慧。

入生死险道。相续苦不断。深着于五欲。如牝牛爱尾。

以贪爱自蔽。盲瞶无所见。不求大势佛。及与断苦法。

深入诸邪见。以苦欲舍苦。为是众生故。而起大悲心。

11 子二、颂施方便化，为下舍几用车譬作本(2)

12 丑一、念用大乘拟不得(3)

13 寅一、明用大拟宜

我始坐道场。观树亦经行。于三七日中。思惟如是事。
我所得智慧。微妙最第一。

13 寅二、明众生无机

众生诸根钝。着乐痴所盲。如斯之等类。云何而可度。

13 寅三、明念欲息化

尔时诸梵王。及诸天帝释。护世四天王。及大自在天。
并余诸天众。眷属百千万。恭敬合掌礼。请我转法轮。
我即自思惟。若但赞佛乘。众生没在苦。不能信是法。
破法不信故。坠于三恶道。我宁不说法。疾入于涅槃。

12 丑二、念同诸佛用三乘(2)

13 寅一、明化得(4)

14 卯一、明三乘拟宜

寻念过去佛。所行方便力。我今所得道。亦应说三乘。

14 卯二、明有小机(2)

15 辰一、明诸佛叹

作是思惟时。十方佛皆现。梵音慰喻我。善哉释迦文。
第一之导师。得是无上法。随诸一切佛。而用方便力。
我等亦皆得。最妙第一法。为诸众生类。分别说三乘。
少智乐小法。不自信作佛。是故以方便。分别说诸果。
虽复说三乘。但为教菩萨。

15 辰二、明释迦酬顺

舍利弗当知。我闻圣师子。深净微妙音。喜称南无佛。
复作如是念。我出浊恶世。如诸佛所说。我亦随顺行。

14 卯三、明施化

思惟是事已。即趣波罗奈。诸法寂灭相。不可以言宣。
以方便力故。为五比丘说。

14 卯四、明受行悟入

是名转法轮。便有涅槃音。及以阿罗汉。法僧差别名。

13 寅二、释疑

从久远劫来。赞示涅槃法。生死苦永尽。我常如是说。

11 子三、颂显实，为下等赐大车譬作本

舍利弗当知。我见佛子等。志求佛道者。无量千万亿。
咸以恭敬心。皆来至佛所。曾从诸佛闻。方便所说法。
我即作是念。如来所以出。为说佛慧故。今正是其时。
舍利弗当知。钝根小智人。着相憍慢者。不能信是法。
今我喜无畏。于诸菩萨中。正直舍方便。但说无上道。
菩萨闻是法。疑网皆已除。千二百罗汉。悉亦当作佛。

11 子四、颂叹法希有

如三世诸佛。说法之仪式。我今亦如是。说无分别法。
诸佛兴出世。悬远值遇难。正使出于世。说是法复难。
无量无数劫。闻是法亦难。能听是法者。斯人亦复难。
譬如优昙华。一切皆爱乐。天人所希有。时时乃一出。
闻法欢喜赞。乃至发一言。则为已供养。一切三世佛。
是人甚希有。过于优昙华。

11 子五、颂不虚

汝等勿有疑。我为诸法王。普告诸大众。但以一乘道。
教化诸菩萨。无声闻弟子。汝等舍利弗。声闻及菩萨。
当知是妙法。诸佛之秘要。

11 子六、颂拣众敦信(2)

12 丑一、颂拣众

以五浊恶世。但乐着诸欲。如是等众生。终不求佛道。
当来世恶人。闻佛说一乘。迷惑不信受。破法堕恶道。
有惭愧清净。志求佛道者。当为如是等。广赞一乘道。

12 丑二、颂敦信

舍利弗当知。诸佛法如是。以万亿方便。随宜而说法。
其不习学者。不能晓了此。汝等既已知。诸佛世之师。
随宜方便事。无复诸疑惑。心生大欢喜。自知当作佛。

6 己二、身子领解(2)

7 庚一、经家叙

尔时舍利弗。踊跃欢喜。即起合掌。瞻仰尊颜。

7 庚二、身子自陈(2)

8 辛一、长文(3)

9 壬一、标三喜

而白佛言。今从世尊。闻此法音。心怀踊跃。得未曾有。

9 壬二、释

所以者何。我昔从佛闻如是法。见诸菩萨受记作佛。而我等不预斯事。甚自感伤。失于如来无量知见。世尊。我常独处。山林树下。若坐若行。每作是念。我等同入法性。云何如来以小乘法而见济度。是我等咎。非世尊也。所以者何。若我等待说所因。成就阿耨多罗三藐三菩提者。必以大乘而得度脱。然我等不解方便随宜所说。初闻佛法。遇便信受。思惟取证。

9 壬三、结(2)

10 癸一、结

世尊。我从昔来。终日竟夜。每自克责。而今从佛。闻所未闻。未曾有法。断诸疑悔。身意泰然。快得安隐。

10 癸二、成

今日乃知。真是佛子。从佛口生。从法化生。得佛法分。

8 辛二、偈颂(3)

9 壬一、颂标

尔时舍利弗。欲重宣此义而说偈言。

我闻是法音。得所未曾有。心怀大欢喜。疑网皆已除。

9 壬二、颂释(2)

10 癸一、补颂不失

昔来蒙佛教。不失于大乘。佛音甚希有。能除众生恼。

我已得漏尽。闻亦除忧恼。

10 癸二、正颂昔失

我处于山谷。或在林树下。若坐若经行。常思惟是事。

呜呼深自责。云何而自欺。我等亦佛子。同入无漏法。

不能于未来。演说无上道。金色三十二。十力诸解脱。

同共一法中。而不得此事。八十种妙好。十八不共法。

如是等功德。而我皆已失。我独经行时。见佛在大众。

名闻满十方。广饶益众生。自惟失此利。我为自欺诳。

我常于日夜。每思惟是事。欲以问世尊。为失为不失。

我常见世尊。称赞诸菩萨。以是于日夜。筹量如是事。

今闻佛音声。随宜而说法。无漏难思议。令众至道场。

我本着邪见。为诸梵志师。世尊知我心。拔邪说涅槃。

我悉除邪见。于空法得证。尔时心自谓。得至于灭度。

9 壬三、颂结(2)

10 癸一、颂结

11 子一、正颂结

而今乃自觉。非是实灭度。若得作佛时。具三十二相。

天人夜叉众。龙神等恭敬。是时乃可谓。永尽灭无余。

佛于大众中。说我当作佛。闻如是法音。疑悔悉已除。

11 子二、追叙疑网

初闻佛所说。心中大惊疑。将非魔作佛。恼乱我心耶。

11 子三、叙今领解

佛以种种缘。譬喻巧言说。其心安如海。我闻疑网断。

佛说过去世。无量灭度佛。安住方便中。亦皆说是法。

现在未来佛。其数无有量。亦以诸方便。演说如是法。

如今者世尊。从生及出家。得道转法轮。亦以方便说。

世尊说实道。波旬无此事。以是我定知。非是魔作佛。

我堕疑网故。谓是魔所为。闻佛柔软音。深远甚微妙。

演畅清净法。我心大欢喜。疑悔永已尽。安住实智中。

10 癸二、颂成

我定当作佛。为天人所敬。转无上法轮。教化诸菩萨。

6 己三、如来述成(3)

7 庚一、昔曾教大，述其昔来佛教之解不谬

尔时佛告舍利弗。吾今于天人。沙门。婆罗门等大众中说。我昔曾于二万亿佛所。为无上道故。常教汝。汝亦长夜随我受学。我以方便引导汝故。生我法中。

7 庚二、中忘取小，述其感伤疑悔之由

舍利弗。我昔教汝。志愿佛道。汝今悉忘。而便自谓已得灭度。

7 庚三、还为说大，述其今日得解不虚

我今还欲令汝忆念。本愿所行道故。为诸声闻说是大乘经。名妙法莲华。教菩萨法。佛所护念。

6 己四、与授记(2)

7 庚一、长文(10)

8 辛一、时节至辛十法住久近

舍利弗。汝于未来世。过无量无边不可思议劫。

8 辛二、因行

供养若干千万亿佛。奉持正法。具足菩萨所行之道。

8 辛三、得果

当得作佛。号曰华光如来。应供。正徧知。明行足。善逝。世间解。无上士。调御丈夫。天人师。佛。世尊。

8 辛四、国土

国名离垢。其土平正。清净严饰。安隐丰乐。天人炽盛。琉璃为地。有八交道。黄金为绳。以界其侧。其傍各有七宝行树。常有华果。

8 辛五、说法

华光如来亦以三乘教化众生。舍利弗。彼佛出时。虽非恶世。以本愿故。说三乘法。

8 辛六、劫名

其劫名大宝庄严。何故名曰大宝庄严。其国中以菩萨为大宝故。

8 辛七、众数

彼诸菩萨。无量无边。不可思议。算数譬喻所不能及。非佛智力。无能知者。若欲行时。宝华承足。此诸菩萨非初发意。皆久植德本。于无量百千万亿佛所。净修梵行。恒为诸佛之所称叹。常修佛慧。具大神通。善知一切诸法之门。质直无伪。志念坚固。如是菩萨。充满其国。

8 辛八、寿量

舍利弗。华光佛寿十二小劫。除为王子未作佛时。其国人民寿八小劫。

8 辛九、补处

华光如来过十二小劫。授坚满菩萨。阿耨多罗三藐三菩提记。告诸比丘。是坚满菩萨次当作佛。号曰华足安行。多陀阿伽度。阿罗诃。三藐三佛陀。其佛国土亦复如是。

8 辛十、法住久近

舍利弗。是华光佛灭度之后。正法住世三十二小劫。像法住世亦三十二小劫。

7 庚二、偈颂(2)

8 辛一、颂长文(8)

9 壬一、超颂得果

尔时世尊。欲重宣此义而说偈言：

舍利弗来世。成佛普智尊。号名曰华光。当度无量众。

9 壬二、追颂行因

供养无数佛。具足菩萨行。十力等功德。证于无上道。

9 壬三、颂时节并劫名

过无量劫已。劫名大宝严。

9 壬四、颂国土

世界名离垢。清净无瑕秽。以琉璃为地。金绳界其道。

七宝杂色树。常有华果实。

9 壬五、颂众数

彼国诸菩萨。志念常坚固。神通波罗蜜。皆已悉具足。

于无数佛所。善学菩萨道。

9 壬六、颂说法

如是等大士。华光佛所化。

9 壬七、颂寿量

佛为王子时。弃国舍世荣。于最末后身。出家成佛道。

华光佛住世。寿十二小劫。其国人民众。寿命八小劫。

9 壬八、颂法住久近

佛灭度之后。正法住于世。三十二小劫。广度诸众生。

正法灭尽已。像法三十二。舍利广流布。天人普供养。

8 辛二、结叹

华光佛所为。其事皆如是。其两足圣尊。最胜无伦匹。

彼即是汝身。宜应自欣庆。

6 己五、四众欢喜(2)

7 庚一、长文(3)

8 辛一、经家叙众喜

尔时四部众。比丘。比丘尼。优婆塞。优婆夷。天龙。夜叉。乾闥婆。阿修罗。迦楼罗。紧那罗。摩睺罗伽等大众。见舍利弗。于佛前受阿耨多罗三藐三菩提记。心大欢喜。踊跃无量。

8 辛二、陈供养

各各脱身所着上衣。以供养佛。释提桓因。梵天王等。与无数天子。亦以天妙衣。天曼陀罗华。摩诃曼陀罗华等。供养于佛。所散天衣住虚空中。而自回转。诸天伎乐百千万种。于虚空中一时俱作。雨众天华。

8 辛三、正领解

而作是言。佛昔于波罗奈初转法轮。今乃复转无上最大法轮。

7 庚二、偈颂

8 辛一、颂开权显一实

尔时。诸天子欲重宣此义。而说偈言：

昔于波罗奈。转四谛法轮。分别说诸法。五众之生灭。

今复转最妙。无上大法轮。是法甚深奥。少有能信者。

8 辛二、自述得解随喜回向

我等从昔来。数闻世尊说。未曾闻如是。深妙之上法。

世尊说是法。我等皆随喜。大智舍利弗。今得受尊记。

我等亦如是。必当得作佛。于一切世间。最尊无有上。

佛道叵思议。方便随宜说。我所有福业。今世若过世。

及见佛功德。尽回向佛道。

5 戊二、警说周(4)

6 己一、此品文，正警开三显一(2)

7 庚一、请

尔时舍利弗白佛言。世尊。我今无复疑悔。亲于佛前。得受阿耨多罗三藐三菩提记。是诸千二百心自在者。昔住学地。佛常教化言。我法能离生老病死。究竟涅槃。是学无学人。亦各自以离我见。及有无见等。谓得涅槃。而今于世尊前。闻所未闻。皆堕疑惑。善哉世尊。愿为四众说其因缘。令离疑悔。

7 庚二、答(3)

8 辛一、发起

尔时佛告舍利弗。我先不言。诸佛世尊以种种因缘。譬喻言辞。方便说法。皆为阿耨多罗三藐三菩提耶。是诸所说。皆为化菩萨故。然舍利弗。今当复以譬喻更明此义。诸有智者。以譬喻得解。

8 辛二、正警说(2)

9 壬一、长文(2)

10 癸一、立譬(2)

11 子一、总譬(6)

12 丑一、长者譬，譬我释迦

舍利弗。若国邑聚落。有大长者。其年衰迈。财富无量。多有田宅。及诸僮仆。

12 丑二、舍宅譬，譬上安隐对不安隐。不安隐即是三界

其家广大。

12 丑三、一门譬，譬上以种种法门宣示于佛道

唯有一门。

12 丑四、五百人譬，譬上众生。即五道也

多诸人众。一百。二百。乃至五百人。止住其中。

12 丑五、火起譬，譬上安隐法对不安隐法(2)

13 寅一、出所烧之宅相，譬六道果报

堂阁朽故。墙壁隳落。柱根腐败。梁栋倾危。

13 寅二、明能烧之火，譬八苦五浊

周匝俱时欻然火起。焚烧舍宅。

12 丑六、三十子譬，譬上知众生性欲。即指三乘行人

长者诸子。若十。二十。或至三十。在此宅中。

11 子二、别譬(4)

12 丑一、长者见火譬，譬上佛见五浊而起大悲心也

长者见是大火从四面起，即大惊怖。而作是念。我虽能于此所烧之门。安隐得出。

12 丑二、舍几用车譬，譬上施方便化(2)

13 寅一、舍几譬，譬上念用大乘拟不得也(2)

14 卯一、劝门拟宜不得

舍利弗。是长者作是思惟。我身手有力。当以衣被。若以几案。从舍出之。复更思惟。是舍惟有一门。而复狭小。诸子幼稚。未有所识。恋着戏处。或当堕落。为火所烧。

14 卯二、诫门拟宜不得

我为说怖畏之事。此舍已烧。宜时疾出。无令为火之所烧害。作是念已。如所思惟。具告诸子。汝等速出。父虽怜愍。善言诱谕。而诸子等。乐着嬉戏。不肯信受。不惊不畏。了无出心。亦复不知何者是火。何者为舍。云何为失。但东西走戏。视父而已。

13 寅二、用车譬，譬上念同诸佛用三乘称宜可得(4)

14 卯一、拟宜三车譬，上寻念过去佛亦作三乘化也

尔时长者即作是念。此舍已为大火所烧。我及诸子若不时出。必为所焚。我今当设方便。令诸子等得免斯害。

14 卯二、知子先心所好譬，譬上作是思惟时十方佛皆现等

父知诸子先心。各有所好。种种珍玩奇异之物。情必乐着。

14 卯三、叹三车希有譬，譬上思惟是事已。即趣波罗奈等

而告之言。汝等所可玩好。希有难得。汝若不取。后必忧悔。如此种种羊车。鹿车。牛车。今在门外。可以游戏。汝等于此火宅。宜速出来。随汝所欲。皆当与汝。

14 卯四、适子所愿譬，譬上受行悟入。是名转法轮等

尔时诸子。闻父所说珍玩之物。适其愿故。心各勇锐。互相推排。竞共驰走。争出火宅。

12 丑三、等赐大车譬，譬上显实(4)

13 寅一、父见诸子免难欢喜譬，譬上今我喜无畏

是时长者。见诸子等安隐得出。皆于四衢道中露地而坐。无复障碍。其心泰然。欢喜踊跃。

13 寅二、诸子索车譬，譬上大乘机发。咸以恭敬心。皆来至佛所也

时诸子等各白父言。父先所许玩好之具。羊车鹿车牛车。愿时赐与。

13 寅三、等赐诸子大车譬，譬上正明显实(3)

14 卯一、标章

舍利弗。尔时长者。各赐诸子。等一大车。

14 卯二、释车等(2)

15 辰一、正明车体

其车高广。众宝庄校。周栏楯。四面悬铃。又于其上张设幬盖。亦以珍奇杂宝而严饰之。宝绳交络。垂诸华缨。重敷婉筵。安置丹枕。驾以白牛。肤色充洁。形体姝好。有大筋力。行步平正。其疾如风。又多仆从而侍卫之。

15 辰二、释有车之由

所以者何。是大长者。财富无量。种种诸藏。悉皆充溢。

14 卯三、释心等

而作是念。我财物无极。不应以下劣小车与诸子等。今此幼童。皆是吾子。爱无偏党。我有如是七宝大车。其数无量。应当等心各各与之。不宜差别。所以者何。以我此物周给一国。犹尚不匮。何况诸子。

13 寅四、诸子得车欢喜譬，譬上受行悟入，疑网皆已除等

是时诸子。各乘大车。得未曾有。非本所望。

12 丑四、无虚妄譬(3)

13 寅一、问

舍利弗。于汝意云何。是长者等与诸子珍宝大车。宁有虚妄不。

13 寅二、答

舍利弗言。不也。世尊。是长者但令诸子得免火难。全其躯命。(则便)非为虚妄。何以故。若全身命。便为已得玩好之具。况复方便。于彼火宅而拔济之。世尊。若是长者。乃至不与最小一车。犹不虚妄。何以故。是长者先作是意。我以方便令子得出(所以假说三车)。以是因缘。无虚妄也。何况长者自知财富无量。欲饶益诸子。等与大车。

13 寅三、迷叹

佛告舍利弗。善哉善哉。如汝所言。

10 癸二、法合(2)

11 子一、合总譬(2)

12 丑一、合长者等三譬

舍利弗。如来亦复如是。则为一切世间之父。于诸怖畏。衰恼忧患。无明闇蔽。永尽无余。而悉成就无量知见。力无所畏。有大神力。及智慧力。具足方便。智慧波罗蜜。大慈大悲。常无懈怠。恒求善事。利益一切。而生三界朽故火宅。

12 丑二、合三十子等三譬

为度众生生老病死。忧悲苦恼。愚痴闇蔽。三毒之火。教化令得阿耨多罗三藐三菩提。

11 子二、合别譬(4)

12 丑一、合见火譬

见诸众生。为生老病死。忧悲苦恼之所烧煮。亦以五欲财利故。受种种苦。又以贪着追求故。现受众苦。后受地狱畜生饿鬼之苦。若生天上及在人间。贫穷困苦。爱别离苦。冤憎会苦。如是等种种诸苦。众生没在其中。欢喜游戏。不觉不知。不惊不怖。亦不生厌。不求解脱。于此三界火宅。东西驰走。虽遭大苦。不以为患。舍利弗。佛见此已。便作是念。我为众生之父。应拔其苦难。与无量无边佛智慧乐。令其游戏。

12 丑二、合舍几用车譬(2)

13 寅一、合舍几(2)

14 卯一、正合舍几

舍利弗。如来复作是念。若我但以神力及智慧力。舍于方便。为诸众生赞如来知见。力无所畏者。众生不能以是得度。所以者何。是诸众生未免生老病死。忧悲苦恼。而为三界火宅所烧。何由能解佛之智慧。

14 卯二、提譬帖合

舍利弗。如彼长者。虽复身手有力而不用之。但以慇懃方便。勉济诸子火宅之难。然后各与珍宝大车。如来亦复如是。虽有力无所畏而不用之。

13 寅二、合用车(3)

14 卯一、合拟宜三车并知子先心

但以智慧方便。于三界火宅拔济众生。为说三乘。声闻。辟支佛。佛乘。

14 卯二、合叹三车希有(3)

15 辰一、合示转

而作是言。汝等莫得乐住三界火宅（苦谛）。勿贪麤弊色声香味触也。若贪着生爱。则为所烧（集谛）。汝速出三界。当得三乘。声闻。辟支佛。佛乘（道灭二谛）。

15 辰二、合证转

我今为汝保任此事。终不虚也。汝等但当勤修精进。如来以是方便诱进众生。

15 辰三、追合劝转

复作是言。汝等当知此三乘法。皆是圣所称叹。自在无系。无所依求。乘是三乘。以无漏根力。觉道禅定。解脱三昧等。而自娱乐。使得无量安隐快乐。

14 卯三、合适子所愿

舍利弗。若有众生内有智性。从佛世尊闻法信受。慇懃精进。欲速出三界。自求涅槃。是名声闻乘。如彼诸子为求羊车。出于火宅。若有众生。从佛世尊闻法信受。慇懃精进。求自然慧。乐独善寂。深知诸法因缘。是名辟支佛乘。如彼诸子为求鹿车。出于火宅。若有众生。从佛世尊闻法信受。勤修精进。求一切智。佛智。自然智。无师智。如来知见。力无所畏。愍念安乐无量众生。利益天人。度脱一切。是名大乘。菩萨求此乘故。名为摩诃萨。如彼诸子为求牛车。出于火宅。

12 丑三、合等赐大车譬(2)

13 寅一、双牒免难等赐二譬

舍利弗。如彼长者。见诸子等安隐得出火宅。到无畏处。自惟财富无量。等以大车而赐诸子。

13 寅二、双合

如来亦复如是。为一切众生之父。若见无量亿千众生。以佛教门。出三界苦。怖畏险道。得涅槃乐。如来尔时便作是念。我有无量无边智慧。力无畏等。诸佛法藏。是诸众生皆是我子。等与大乘。不令有人独得灭度。皆以如来灭度而灭度之。是诸众生脱三界者。悉与诸佛禅定解脱等。娱乐之具。皆是一相一种。圣所称叹。能生净妙第一之乐。

12 丑四、合无虚妄譬(2)

13 寅一、牒譬

舍利弗。如彼长者。初以三车诱引诸子。然后但与大车。宝物庄严。安隐第一。然彼长者无虚妄之咎。

13 寅二、正合

如来亦复如是。无有虚妄。初说三乘。引导众生。然后但以大乘而度脱之。何以故。如来有无量智慧。力无所畏。诸法之藏。能与一切众生大乘之法。但不尽能受。舍利弗。以是因缘。当知诸佛方便力故。于一佛乘。分别说三。

9 壬二、重颂(2)

10 癸一、颂立譬(2)

11 子一、颂总譬(4)

12 丑一、颂长者

佛欲重宣此义而说偈言。

12 丑二、颂家宅

譬如长者。有一大宅。其宅久故。而复顿弊。
堂舍高危。柱根摧朽。梁栋倾斜。基陛隤毁。
墙壁圯圻。泥涂弛落。覆苫乱坠。椽梲差脱。
周障屈曲。杂秽充徧。

12 丑三、颂五百人

有五百人。止住其中。

12 丑四、颂火起(4)

13 寅一、颂地上事，譬欲界(4)

14 卯一、明所烧之类，譬十使众生也

鸱枭鵂鹠。乌鵂鵌。虺蛇蝮蝎。蜈蚣蚰蜒。
守宫百足。鼯狸鼯鼠。诸恶虫辈。交横驰走。
屎尿臭处。不净流溢。蜚蝗诸虫。而集其上。
狐狼野干。咀嚼践踏。啖啖死尸。骨肉狼藉。
由是群狗。竞来搏撮。饥羸悼惶。处处求食。
鬬诤擅掣。哇喋嗥吠。其舍恐怖。变状如是。
处处皆有。魑魅魍魉。夜叉恶鬼。食噉人肉。
毒虫之属。诸恶禽兽。孚乳产生。各自藏护。
夜叉竞来。争取食之。食之既饱。恶心转炽。
鬬诤之声。甚可怖畏。鸠槃荼鬼。蹲踞土埤。

或时离地。一尺二尺。往返游行。纵逸嬉戏。
捉狗两足。扑令失声。以脚加颈。怖狗自乐。
复有诸鬼。其身长大。裸形黑瘦。常住其中。
发大恶声。叫呼求食。复有诸鬼。其咽如针。
复有诸鬼。首如牛头。或食人肉。或复噉狗。
头发鬢乱。残害凶险。飢渴所逼。叫唤驰走。
夜叉饿鬼。诸恶鸟兽。饥急四向。窥看窗牖。
如是诸难。恐惧无量。

14 [卯二、明火起之由，警起五浊之由也](#)

是朽故宅。属于一人。其人近出。未久之间。
于后舍宅。忽起火起。

14 [卯三、正明火起之势，警正起五浊也](#)

四面一时。其燄俱炽。栋梁椽柱。爆声震裂。
摧折堕落。墙壁崩倒。

14 [卯四、明被烧之相](#)

诸鬼神等。扬声大叫。鵙鹞诸鸟。鸬鹚茶等。
周惶惶怖。不能自出。

13 [寅二、颂穴中事，警色界\(3\)](#)

14 [卯一、警所烧之类](#)

恶兽毒虫。藏窜孔穴。毘舍闍鬼。亦住其中。

14 [卯二、明火起之由及火起之势](#)

薄福德故。为火所逼。共相残害。饮血噉肉。

14 [卯三、明被烧之相](#)

野干之属。并已前死。诸大恶兽。竞来食噉。
臭烟蓬勃。四面充塞。

13 [寅三、颂穴外事，警无色界\(2\)](#)

14 [卯一、明所烧之类](#)

蜈蚣蚰蜒。毒蛇之类。为火所烧。争走出穴。
鸬鹚茶鬼。随取而食。

14 [卯二、明被烧之相](#)

又诸饿鬼。头上火然。饥渴热恼。周惶闷走。

13 [寅四、总结众难非一](#)

其宅如是。甚可怖畏。毒害火灾。众难非一。

11 [子二、颂别警\(3\)](#)

12 [丑一、颂长者见火警](#)

是时宅主。在门外立。闻有人言。汝诸子等。
先因游戏。来入此宅。稚小无知。欢娱乐着。
长者闻已。惊入火宅。

12 [丑二、颂舍几用车警\(2\)](#)

13 寅一、颂舍几

方宜救济。令无烧害。告喻诸子。说众患难。
恶鬼毒虫。灾火蔓延。众苦次第。相续不绝。
毒蛇虺蜥。及诸夜叉。鸠槃荼鬼。野干狐狗。
鵄鹞鸱枭。百足之属。饥渴恼急。甚可怖畏。
此苦难处。况复大火。诸子无知。虽闻父诲。
犹故乐着。嬉戏不已。

13 寅二、颂用车(3)

14 卯一、颂拟宜三车

是时长者。而作是念。诸子如此。益我愁恼。
今此舍宅。无一可乐。而诸子等。耽湎嬉戏。
不受我教。将为火害。即便思惟。设诸方便。

14 卯二、颂叹三车希有

告诸子等。我有种种。珍玩之具。妙宝好车。
羊车鹿车。大牛之车。今在门外。汝等出来。
吾为汝等。造作此车。随意所乐。可以游戏。

14 卯三、颂适子所愿

诸子闻说。如此诸车。实时奔竞。驰走而出。
到于空地。离诸苦难。

12 丑三、颂等赐大车譬(4)

13 寅一、颂父见诸子免难欢喜譬

长者见子。得出火宅。住于四衢。坐师子座。
而自庆言。我今快乐。此诸子等。生育甚难。
愚小无知。而入险宅。多诸毒虫。魑魅可畏。
大火猛焰。四面俱起。而此诸子。贪乐嬉戏。
我已救之。令得脱难。是故诸人。我今快乐。

13 寅二、颂诸子索车譬

尔时诸子。知父安坐。皆诣父所。而白父言。
愿赐我等。三种宝车。如前所许。诸子出来。
当以三车。随汝所欲。今正是时。惟垂给与。

13 寅三、颂等赐诸子大车譬

长者大富。库藏众多。金银琉璃。砗磲玛瑙。
以众宝物。造诸大车。庄校严饰。周栏楯。
四面悬铃。金绳交络。真珠罗网。张施其上。
金华诸纓。处处垂下。众彩杂饰。周围绕。
柔软缯纈。以为茵褥。上妙细。价直千亿。

鲜白净洁。以覆其上。有大白牛。肥壮多力。
形体殊好。以驾宝车。多诸僮从。而侍卫之。
以是妙车。等赐诸子。

13 寅四、颂诸子得车欢喜譬

诸子是时。欢喜踊跃。乘是宝车。游于四方。
嬉戏快乐。自在无碍。

10 癸二、颂法合(2)

11 子一、颂合总譬(4)

12 丑一、颂合长者

告舍利弗。我亦如是。众圣中尊。世间之父。

12 丑二、颂合五百人，兼得三十子义

一切众生。皆是吾子。深着世乐。无有慧心。

12 丑三、颂合家宅，兼得一门义

三界无安。犹如火宅。

12 丑四、颂合火起

众苦充满。甚可怖畏。常有生老。病死忧患。

11 子二、颂合别譬(4)

12 丑一、颂合见火

如来已离。三界火宅。寂然闲居。安处林野。

今此三界。皆是我有。其中众生。悉是吾子。

而今此处。多诸患难。唯我一人。能为救护。

12 丑二、颂合舍几用车(2)

13 寅一、颂合舍几

虽复教诏。而不信受。于诸欲染。贪着深故。

13 寅二、颂合用车

以是方便。为说三乘。令诸众生。知三界苦。

开示演说。出世间道。是诸子等。若心决定。

具足三明。及六神通。有得缘觉。不退菩萨。

12 丑三、颂合等赐大车(2)

13 寅一、颂合等赐

汝舍利弗。我为众生。以此譬喻。说一佛乘。

汝等若能。信受是语。一切皆当。成得佛道。

是乘微妙。清净第一。于诸世间。为无有上。

佛所悦可。一切众生。所应称赞。供养礼拜。

无量亿千。诸力解脱。禅定智慧。及佛余法。

得如是乘。

13 寅二、颂合欢喜

令诸子等。日夜劫数。常得游戏。与诸菩萨。

及声闻众。乘此宝乘。直至道场。以是因缘。

十方谛求。更无余乘。除佛方便。

12 丑四、颂合无虚妄

告舍利弗。汝诸人等。皆是吾子。我则是父。
汝等累劫。众苦所烧。我皆济拔。令出三界。
我虽先说。汝等灭度。但尽生死。而实不灭。
今所应作。唯佛智慧。若有菩萨。于是众中。
能一心听。诸佛实法。诸佛世尊。虽以方便。
所化众生。皆是菩萨。若人小智。深着爱欲。
为此等故。说于苦谛。众生心喜。得未曾有。
佛说苦谛。真实无异。若有众生。不知苦本。
深着苦因。不能暂舍。为是等故。方便说道。
诸苦所因。贪欲为本。若灭贪欲。无所依止。
灭尽诸苦。名第三谛。为灭谛故。修行于道。
离诸苦缚。名得解脱。是人于何。而得解脱。
但离虚妄。名为解脱。其实未得。一切解脱。
佛说是人。未实灭度。斯人未得。无上道故。
我意不欲。令至灭度。我为法王。于法自在。
安隐众生。故现于世。

8 辛三、劝信流通(2)

9 壬一、标两章

汝舍利弗。我此法印。为欲利益。世间故说。
在所游方。勿妄宣传。

9 壬二、释(2)

10 癸一、可说不可说

若有闻者。随喜顶受。当知是人。阿惟越致。
若有信受。此经法者。是人已曾。见过去佛。
恭敬供养。亦闻是法。若人有能。信汝所说。
则为见我。亦见于汝。及比丘僧。并诸菩萨。
斯法华经。为深智说。浅识闻之。迷惑不解。
一切声闻。及辟支佛。于此经中。力所不及。
汝舍利弗。尚于此经。以信得入。况余声闻。
其余声闻。信佛语故。随顺此经。非己智分。

10 癸二、释可通不可通(2)

11 子一、约大悲门。莫为恶说

又舍利弗。憍慢懈怠。计我见者。莫说此经。
凡夫浅识。深着五欲。闻不能解。亦勿为说。

若人不信。毀谤此经。则断一切。世间佛种。
或复鬻鬻。而怀疑惑。汝当听说。此人罪报。
若佛在世。若灭度后。其有诽谤。如斯经典。
见有读诵。书持经者。轻贱憎嫉。而怀结恨。
此人罪报。汝今复听。其人命终。入阿鼻狱。
具足一劫。劫尽更生。如是展转。至无数劫。
从地狱出。当堕畜生。若狗野干。其形瘦。
鬻鬻疥癩。人所触娆。又复为人。之所恶贱。
常困饥渴。骨肉枯竭。生受楚毒。死被瓦石。
断佛种故。受斯罪报。若作駝驼。或生驴中。
身常负重。加诸杖捶。但念水草。余无所知。
谤斯经故。获罪如是。有作野干。来入聚落。
身体疥癩。又无一目。为诸童子。之所打掷。
受诸苦痛。或时致死。于此死已。更受蟒身。
其形长大。五百由旬。聋瞶无足。宛转腹行。
为诸小虫。之所啖食。昼夜受苦。无有休息。
谤斯经故。获罪如是。若得为人。诸根闇钝。
矬陋尪跛。盲聋背伛。有所言说。人不信受。
口气常臭。鬼魅所着。贫穷下贱。为人所使。
多病瘠瘦。无所依怙。虽亲附人。人不在意。
若有所得。寻复忘失。若修医道。顺方治病。
更增他疾。或复致死。若自有病。无人救疗。
设服良药。而复增剧。若他反逆。抄劫窃盗。
如是等罪。横罹其殃。如斯罪人。永不见佛。
众圣之王。说法教化。如斯罪人。常生难处。
狂聋心乱。永不闻法。于无数劫。如恒河沙。
生辄聋哑。诸根不具。常处地狱。如游园观。
在余恶道。如己舍宅。驼驴猪狗。是其行处。
谤斯经故。获罪如是。若得为人。聋盲瘖哑。
贫穷诸衰。以自庄严。水肿干瘠。疥癩痈疽。
如是等病。以为衣服。身常臭处。垢秽不净。
深着我见。增益瞋恚。淫欲炽盛。不择禽兽。

谤斯经故。获罪如是。告舍利弗。谤斯经者。
若说其罪。穷劫不尽。以是因缘。我故语汝。
无智人中。莫说此经。

11 子二、约大慈门。应为善人说(2)
12 丑一、明五双善人之相，可为宣说

若有利根。智慧明了。多闻强识。求佛道者。
如是之人。乃可为说。若人曾见。亿百千佛。
植诸善本。深心坚固。如是之人。乃可为说。
若人精进。常修慈心。不惜身命。乃可为说。
若人恭敬。无有异心。离诸凡愚。独处山泽。
如是之人。乃可为说。又舍利弗。若见有人。
舍恶知识。亲近善友。如是之人。乃可为说。
若见佛子。持戒清洁。如净明珠。求大乘经。
如是之人。乃可为说。若人无瞋。质直柔软。
常愍一切。恭敬诸佛。如是之人。乃可为说。
复有佛子。于大众中。以清净心。种种因缘。
譬喻言辞。说法无碍。如是之人。乃可为说。
若有比丘。为一切智。四方求法。合掌顶受。
但乐受持。大乘经典。乃至不受。余经一偈。
如是之人。乃可为说。如人至心。求佛舍利。
如是求经。得已顶受。其人不复。志求余经。
亦未曾念。外道典籍。如是之人。乃可为说。

12 丑二、总结可说

告舍利弗。我说是相。求佛道者。穷劫不尽。
如是等人。则能信解。汝当为说。妙法华经。

6 己二、信解品，明中根领解(2)

7 庚一、经家叙喜

尔时慧命须菩提。摩诃迦旃延。摩诃迦叶。摩诃目犍连。从佛所闻未曾有法。世尊授舍利弗阿耨多罗三藐三菩提记。发希有心。欢喜踊跃。即从座起。整衣服。偏袒右肩。右膝着地。一心合掌。曲躬恭敬。瞻仰尊颜。

7 庚二、白佛自陈(2)

8 辛一、长文重颂，正陈得解(2)

9 壬一、长文(2)

10 癸一、就法略领解(2)

11 子一、正法说(2)

12 丑一、明昔稟三故不求(2)

13 寅一、标

而白佛言。我等居僧之首。年并朽迈。自谓已得涅槃。无所堪任。不复进求阿耨多罗三藐三菩提。

13 寅二、释

世尊往昔说法既久。我时在座。身体疲懈。但念空无相无作。于菩萨法。游戏神通。净佛国土。成就众生。心不喜乐。所以者何。世尊令我等出于三界。得涅槃证。又今我等年已朽迈。于佛教化菩萨阿耨多罗三藐三菩提。不生一念好乐之心。

12 丑二、明今会一故自得

我等今于佛前。闻授声闻阿耨多罗三藐三菩提记。心甚欢喜。得未曾有。不谓于今。忽然得闻希有之法。深自庆幸。获大善利。

11 子二、略举譬

无量珍宝。不求自得。

10 癸二、约譬广领解(2)

11 子一、立譬(2)

12 丑一、咨发

世尊。我等今者乐说譬喻。以明斯义。

12 丑二、正立譬(4)

13 寅一、父子相失譬(4)

卯初、子背父去(2)

- 辰初、背父而去

- 譬若有人。年既幼稚。舍父逃逝。久住他国。或十。二十。至五十岁。

- 辰二、向本而还

- 年既长大。加复穷困。驰骋四方。以求衣食。渐渐游行。遇向本国。

14 卯二、父求子中止

其父先来。求子不得。中止一城。其家大富。财宝无量。金银琉璃。珊瑚琥珀。玻璃珠等。其诸仓库。悉皆盈溢。多有僮仆。臣佐吏民。象马车乘。牛羊无数。出入息利。乃徧他国。商估贾客。亦甚众多。

14 卯三、子遇到父城

父每念子。与子离别。五十余年。而未曾向人。说如此事。但自思惟。心怀悔恨。自念老朽。多有财物。金银珍宝。仓库盈溢。无有子息。一旦终歿。财物散失。无所委付。是以慙懃。每忆其子。复作是念。我若得子。委付财物。坦然快乐。无复忧虑。

时贫穷子。游诸聚落。经历国邑。遂到其父所止之城。

14 卯四、其父忧念

13 寅二、父子相见譬(2)

14 卯一、子见父

世尊。尔时穷子。佣赁展转。遇到父舍。住立门侧。遥见其父。踞师子床。宝几承足。诸婆罗门。刹利居士。皆恭敬围绕。以真珠璎珞。价直千万。庄严其身。吏民僮仆。手执白拂。侍立左右。覆以宝帐。垂诸华幡。香水洒地。散众名华。罗列宝物。出内取与。有如是等种种严饰。威德特尊。穷子见父有大力势。即怀恐怖。悔来至此。窃作是念。此或是王。或是王等。非我佣力得物之处。不如往至贫里。肆力有地。衣食易得。若久住此。或见逼迫。强使我作。作是念已。疾走而去。

14 卯二、父见子

时富长者。于师子座。见子便识。心大欢喜。即作是念。我财物库藏。今有所付。我常思念此子。无由见之。而忽自来。甚适我愿。我虽年朽。犹故贪惜。

13 寅三、追诱譬(2)

14 卯一、遣旁人追

即遣旁人。急追将还。尔时使者疾走往捉。穷子惊愕。称怨大唤。我不相犯。何为见捉。使者执之愈急。强牵将还。于时穷子。自念无罪。而被囚执。此必定死。转更惶怖。闷绝蹙地。父遥见之。而语使言。不须此人。勿强将来。以冷水洒面。令得醒悟。莫复与语。所以者何。父知其子志意下劣。自知豪贵。为子所难。（故虽）审知是子。而以方便。不语他人。云是我子。（于时）使者语之。我今放汝。随意所趣。穷子欢喜。得未曾有。从地而起。往至贫里。以求衣食。

14 卯二、遣二人诱
15 辰一、齐教领(4)
16 巳一、领拟宜三车

尔时长者。将欲诱引其子。而设方便。密遣二人。形色憔悴。无威德者。汝可诣彼。徐语穷子。此有作处。倍与汝直。穷子若许。将来使作。若言欲何所作。便可语之。雇汝除粪。我等二人亦共汝作。

16 巳二、领知子先心

时二使人。即求穷子。

16 巳三、领叹三车

既已得之。具陈上事。

16 巳四、领适愿争出火宅

尔时穷子。先取其价。寻与除粪。其父见子。愍而怪之。

15 辰二、取意领(4)
16 巳一、领权智久欲拟宜

又以他日。于牕牖中。遥见子身。

16 巳二、领久知小法是其玩好

羸瘦憔悴。粪土尘坌。污秽不净。

16 巳三、领久知须叹三车

即脱瓔珞细软上服。严饰之具。更着粗弊垢膩之衣。尘土坌身。右手执持除粪之器。状有所畏。

16 巳四、领久知适愿受行

语诸作人。汝等勤作。勿得懈怠。以方便故。得近其子。后复告言。咄。男子。汝常此作。勿复余去。当加汝价。诸有所须。盆器米面。盐醋之属。莫自疑难。亦有老弊使人。须者相给。好自安意。我如汝父。勿复忧虑。所以者何。我年老大。而汝少壮。汝常作时。无有欺怠。瞋恨怨言。都不见汝有此诸恶。如余作人。自今已后。如所生子。实时长者更与作字。名之为儿。尔时穷子虽欣此遇。犹故自谓客作贱人。由是之故。于二十年中常令除粪。

13 寅四、领付家业譬(2)
14 卯一、领家业(2)
15 辰一、相体信

过是已后。心相体信。入出无难。然其所止。犹在本处。

15 辰二、命领业(2)
16 巳一、命知家事

世尊。尔时长者有疾。自知将死不久。语穷子言。我今多有金银珍宝。仓库盈溢。其中多少。所应取与。汝悉知之。我心如是。当体此意。所以者何。今我与汝。便为不异。宜加用心。无令漏失。

16 巳二、受命领知

尔时穷子即受教勅。领知众物金银珍宝。及诸库藏。而无希取一餐之意。然其所止。故在本处。下劣之心亦未能舍。

14 卯二、付家业(2)
15 辰一、正付家业

复经少时。父知子意。渐以通泰。成就大志。自鄙先心。临欲终时。而命其子。并会亲族。国王大臣。刹利居士。皆悉已集。即自宣言。诸君当知。此是我子。我之所生。于某城中。舍我逃走。嬴辛苦五十余年。其本字某。我名某甲。昔在本城。怀忧推觅。忽于此间。遇会得之。此实我子。我实其父。今我所有一切财物。皆是子有。先所出内。是子所知。

15 辰二、得付欢喜

世尊。是时穷子闻父此言。即大欢喜。得未曾有。而作是念。我本无心有所希求。今此宝藏自然而至。

11 子二、法合(4)

12 丑一、合父子相失

世尊。大富长者。则是如来。我等皆似佛子。

12 丑二、合父子相见

如来常说。我等为子。

12 丑三、合追诱(2)

13 寅一、合旁人追

世尊。我等以三苦故。于生死中。受诸热恼。迷惑无知。乐着小法。

13 寅二、合二人诱(2)

14 卯一、合齐教领

今日世尊。令我等思惟蠲除诸法戏论之粪。我等于中。勤加精进。得至涅槃一日之价。既得此已。心大欢喜。自以为足。便自谓言。于佛法中。勤精进故。所得弘多。

14 卯二、合取意领

然世尊先知我等。心着弊欲。乐于小法。便见纵舍。不为分别。汝等当有如来知见宝藏之分。

12 丑四、合领付家业(2)

13 寅一、合领家业

世尊以方便力。说如来智慧。我等从佛得涅槃一日之价。以为大得。于此大乘无有志求。我等又因如来智慧。为诸菩萨开示演说。而自于此无有志愿。所以者何。佛知我等心乐小法。以方便力随我等说。而我等不知真是佛子。

13 寅二、合付家业(2)

14 卯一、合付业

今我等方知。世尊于佛智慧。无所吝惜。所以者何。我等昔来真是佛子。而但乐小法（所以如来万不得已。权施小法）。若我有乐大之心。佛则为我说法。于此经中唯说一乘。而昔于菩萨前。毁訾声闻乐小法者（意欲我等舍伪取真）。然佛实以大乘教化。

14 卯二、合欢喜

是故我等说。本无心有所希求。今法王大宝自然而至。如佛子所应得者。皆已得之。

9 壬二、重颂(2)

10 癸一、颂法说

尔时摩诃迦叶。欲重宣此义而说偈言。

我等今日。闻佛音教。欢喜踊跃。得未曾有。

佛说声闻。当得作佛。无上宝聚。不求自得。

10 癸二、颂譬说(2)

11 子一、颂立譬(4)

12 丑一、颂父子相失(4)

13 寅一、颂子背父去

譬如童子。幼稚无识。舍父逃逝。远到他土。

周流诸国。五十余年。

13 寅二、颂求子中止

其父忧念。四方推求。求之既疲。顿止一城。
造立舍宅。五欲自娱。其家巨富。多诸金银。
砗磲玛瑙。真珠琉璃。象马牛羊。辇舆车乘。
田业僮仆。人民众多。出入息利。乃徧他国。
商估贾人。无处不有。千万亿众。围绕恭敬。
常为王者。之所爱念。群臣豪族。皆共宗重。
以诸缘故。往来者众。豪富如是。有大力势。

13 寅三、超颂其父忧念

而年朽迈。益忧念子。夙夜惟念。死时将至。
痴子舍我。五十余年。库藏诸物。当如之何。

13 寅四、追颂遇到父城

尔时穷子。求索衣食。从邑至邑。从国至国。
或有所得。或无所得。飢饿羸瘦。体生疮癣。
渐次经历。到父住城。

12 丑二、颂父子相见(2)

13 寅一、颂子见父

佣赁展转。遂至父舍。尔时长者。于其门内。
施大宝帐。处师子座。眷属围绕。诸人侍卫。
或有计算。金银宝物。出内财产。注记券疏。
穷子见父。豪贵尊严。谓是国王。若国王等。
惊怖自怪。何故至此。复自念言。我若久住。
或见逼迫。强驱使作。思惟是已。驰走而去。
借问贫里。欲往佣作。

13 寅二、颂父见子

长者是时。在师子座。遥见其子。默而识之。

12 丑三、颂追诱(2)

13 寅一、颂旁人追

即勅使者。追捉将来。穷子惊唤。迷闷蹙地。
是人执我。必当见杀。何用衣食。使我至此。
长者知子。愚痴狭劣。不信我言。不信是父。

13 寅二、颂二人诱(2)

14 卯一、颂雇作，即齐教领

即以方便。更遣余人。眇目矬陋。无威德者。
汝可语之。云当相雇。除诸粪秽。倍与汝价。
穷子闻之。欢喜随来。为除粪秽。净诸房舍。

14 卯二、颂教作，即取意领

长者于牖。常见其子。念子愚劣。乐为鄙事。
于是长者。着弊垢衣。执除粪器。往到子所。
方便附近。语令勤作。既益汝价。并涂足油。
饮食充足。荐席厚煖。如是苦言。汝当勤作。
又以软语。若如吾子。

12 丑四、颂领付家业(2)

13 寅一、颂领业

长者有智。渐令入出。经二十年。执作家事。
示其金银。真珠玻璃。诸物出入。皆使令知。
犹处门外。止宿草庵。自念贫事。我无此物。

13 寅二、颂付业(2)

14 卯一、颂正付业

父知子心。渐已旷大。欲与财物。即聚亲族。
国王大臣。刹利居士。于此大众。说是我子。
舍我他行。经五十岁。自见子来。已二十年。
昔于某城。而失是子。周行求索。遂来至此。
凡我所有。舍宅人民。悉以付之。恣其所用。

14 卯二、颂得付欢喜

子念昔贫。志意下劣。今于父所。大获珍宝。
并及舍宅。一切财物。甚大欢喜。得未曾有。

11 子二、颂法合(3)

12 丑一、颂合相失相见

佛亦如是。知我乐小。

12 丑二、颂合追诱

未曾说言。汝等作佛。而说我等。得诸无漏。
成就小乘。声闻弟子。

12 丑三、颂合领付家业(2)

13 寅一、颂合领家业(2)

14 卯一、颂合受命领知

佛勅我等。说最上道。修习此者。当得成佛。
我承佛教。为大菩萨。以诸因缘。种种譬喻。
若干言辞。说无上道。诸佛子等。从我闻法。
日夜思惟。精勤修习。是时诸佛。即授其记。
汝于来世。当得作佛。一切诸佛。秘藏之法。
但为菩萨。演其实事。而不为我。说斯真要。

14 卯二、颂合心无希取(3)

15 辰一、牒譬总明无希取

如彼穷子。得近其父。虽知诸物。心不希取。

我等虽说。佛法宝藏。自无志愿。亦复如是。

15 辰二、释无希取意

我等内灭。自谓为足。唯了此事。更无余事。

我等若闻。净佛国土。教化众生。都无欣乐。

所以者何。一切诸法。皆悉空寂。无生无灭。

无大无小。无漏无为。如是思惟。不生喜乐。

我等长夜。于佛智慧。无贪无着。无复志愿。

而自于法。谓是究竟。我等长夜。修习空法。

得脱三界。苦恼之患。住最后身。有余涅槃。

佛所教化。得道不虚。则为已得。报佛之恩。

15 辰三、结无希取

我等虽为。诸佛子等。说菩萨法。以求佛道。

而于是法。永无愿乐。导师见舍。观我心故。

初不劝进。说有实利。

13 寅二、颂合付家业(2)

14 卯一、颂合付业

如富长者。知子志劣。以方便力。柔伏其心。

然后乃付。一切财物。佛亦如是。现希有事。

知乐小者。以方便力。调伏其心。乃教大智。

14 卯二、颂合欢喜

我等今日。得未曾有。非先所望。而今自得。

如彼穷子。得无量宝。世尊我今。得道得果。

于无漏法。得清净眼。我等长夜。持佛净戒。

始于今日。得其果报。法王法中。久修梵行。

今得无漏。无上大果。我等今者。真是声闻。

以佛道声。令一切闻。我等今者。真阿罗汉。

于诸世间。天人魔梵。普于其中。应受供养。

8 辛二、十三偈，叹佛恩深

世尊大恩。以希有事。怜愍教化。利益我等。

无量亿劫。谁能报者。手足供给。头顶礼敬。

一切供养。皆不能报。若以顶戴。两肩荷负。

于恒沙劫。尽心恭敬。又以美膳。无量宝衣。

及诸卧具。种种汤药。牛头栴檀。及诸珍宝。

以起塔庙。宝衣布地。如斯等事。以用供养。

于恒沙劫。亦不能报。诸佛希有。无量无边。

不可思议。大神通力。无漏无为。诸法之王。
能为下劣。忍于斯事。取相凡夫。随宜为说。
诸佛于法。得最自在。知诸众生。种种欲乐。
及其志力。随所堪任。以无量喻。而为说法。
随诸众生。宿世善根。又知成熟。未成熟者。
种种筹量。分别知己。于一乘道。随宜说三。

6 己三、药草喻品，是如来述成(2)

7 庚一、略述成(2)

8 辛一、双述善哉

尔时世尊。告摩诃迦叶及诸大弟子。善哉善哉。迦叶善说如来真实功德。诚如所言。

8 辛二、领所不及

如来复有无量无边阿僧祇功德。汝等若于无量亿劫。说不能尽。

7 庚二、广述成(2)

8 辛一、长文(2)

9 壬一、正明权实不可思议(2)

10 癸一、法说(2)

11 子一、明权实教不可思议

迦叶当知。如来是诸法之王。若有所说。皆不虚也。于一切法。以智方便而演说之。其所说法。皆悉到于一切智地。

11 子二、明权实智不可思议

如来观知一切诸法之所归趣。亦知一切众生深心所行。通达无碍。又于诸法究尽明了。示诸众生一切智慧。

10 癸二、立譬(2)

11 子一、明无差而差，譬即实而权(2)

12 丑一、约能生所生，明无差而差

迦叶。譬如三千大千世界。山川谿谷土地。所生卉木丛林。及诸药草。种类若干。名色各异。

12 丑二、约能润所润，明无差而差

密云弥布。徧覆三千大千世界。一时等澍。其泽普洽。卉木丛林。及诸药草。小根小茎。小枝小叶。中根中茎。中枝中叶。大根大茎。大枝大叶。诸树大小。随上中下各有所受。一云所雨。称其种性而得生长。华果敷实。

11 子二、明差而无差，譬即权而实

虽一地所生。一雨所润。而诸草木。各有差别。

10 癸三、法合(2)

11 子一、合无差而差(2)

12 丑一、正合(3)

13 寅一、先合能润

迦叶当知。如来亦复如是。出现于世。如大云起。以大音声。徧徧世界。天人阿修罗。如彼大云。徧徧覆三千大千国土。于大众中而唱是言。我是如来。应供。正徧知。明行足。善逝。世间解。无上士。调御丈夫。天人师。佛。世尊。未度者令度。未解者令解。未安者令安。未涅槃者令得涅槃。今世后世。如实知之。我是一切知者。一切见者。知道者。开道者。说道者。汝等天人。阿修罗众。皆应到此。为听法故。

13 寅二、追合能生所生

尔时无数千万亿种众生。来至佛所而听法。

13 寅三、复合能润所润(2)

14 卯一、合能润

如来于时。观是众生诸根利钝。精进懈怠。随其所堪。而为说法。

14 卯二、合所润

种种无量。皆令欢喜。快得善利。是诸众生。闻是法已。现世安隐。后生善处。以道受乐。亦得闻法。既闻法已。离诸障碍。于诸法中。任力所能。渐得入道。

12 丑二、提譬帖合

如彼大云。雨于一切卉木丛林。及诸药草。如其种性。具足蒙润。各得生长。

11 子二、合差而无差(2)

12 丑一、正合(2)

13 寅一、合一地所生一雨所润

如来说法。一相一味。所谓解脱相。离相。灭相。究竟至于一切种智。

13 寅二、合草木各有差别(3)

14 卯一、正合众生如草木，故不自知

其有众生。闻如来法。若持读诵。如说修行。所得功德。不自觉知。

14 卯二、明惟有如来能知，故与大云同而不同

所以者何。唯有如来。知此众生种相体性。念何事。思何事。修何事。云何念。云何思。云何修。以何法念。以何法思。以何法修。以何法得何法。众生住于种种之地。唯有如来如实见之。明了无碍。

14 卯三、举譬帖合众生不知

如彼卉木丛林。诸药草等。而不自知上中下性。

12 丑二、结释(2)

13 寅一、结成差即无差

如来知是一相一味之法。所谓解脱相。离相。灭相。究竟涅槃常寂灭相。终归于空。

13 寅二、释出不即说意

佛知是已。观众生心欲而将护之。是故不即为说一切种智。

9 壬二、结叹述成

汝等迦叶。甚为希有。能知如来随宜说法。能信能受。所以者何。诸佛世尊随宜说法。难解难知。

8 辛二、重颂(3)

9 壬一、颂法说

尔时世尊。欲重宣此义而说偈言：

破有法王。出现世间。随众生欲。种种说法。

如来尊重。智慧深远。久默斯要。不务速说。

有智若闻。则能信解。无智疑悔。则为永失。

是故迦叶。随力为说。以种种缘。令得正见。

9 壬二、颂立譬(2)

10 癸一、颂无差而差(2)

11 子一、超颂能润无差

迦叶当知。譬如大云。起于世间。徧覆一切。

慧云含润。电光晃曜。雷声远震。令众悦豫。

日光揜蔽。地上清凉。霰黴垂布。如可承揽。

其雨普等。四方俱下。流澍无量。率土充洽。

11 子二、追颂能生所生受润差别

山川险谷。幽邃所生。卉木药草。大小诸树。
百谷苗稼。甘蔗葡萄。雨之所润。无不丰足。
干地普洽。药木并茂。其云所出。一味之水。
草木丛林。随分受润。一切诸树。上中下等。
称其大小。各得生长。根茎枝叶。华果光色。
一雨所及。皆得鲜泽。

10 癸二、颂差而无差

如其体相。性分大小。所润是一。而各滋茂。

9 壬三、颂法合(2)

10 癸一、颂合无差而差(3)

11 子一、颂合能润

佛亦如是。出现于世。譬如大云。普覆一切。
既出于世。为诸众生。分别演说。诸法之实。
大圣世尊。于诸天。一切众中。而宣是言。
我为如来。两足之尊。出于世间。犹如大云。
充润一切。枯槁众生。皆令离苦。得安隐乐。
世间之乐。及涅槃乐。诸天人众。一心善听。
皆应到此。覩无上尊。我为世尊。无能及者。
安隐众生。故现于世。为大众说。甘露净法。
其法一味。解脱涅槃。以一妙音。演畅斯义。
常为大乘。而作因缘。

11 子二、颂合能生所生

我观一切。普皆平等。无有彼此。爱憎之心。
我无贪着。亦无限碍。恒为一切。平等说法。
如为一人。众多亦然。常演说法。曾无他事。
去来坐立。终不疲厌。充足世间。如雨普润。

11 子三、颂复合能润所润(2)

12 丑一、颂合能润

贵贱上下。持戒毁戒。威仪具足。及不具足。
正见邪见。利根钝根。等雨法雨。而无懈倦。

12 丑二、颂合所润(2)

13 寅一、颂欢喜善利现世安隐，合普洽譬

一切众生。闻我法者。随力所受。住于诸地。
或处人天。转轮圣王。释梵诸王。是小药草。
知无漏法。能得涅槃。起六神通。及得三明。
独处山林。常行禅定。得缘觉证。是中药草。

求世尊处。我当作佛。行精进定。是上药草。
又诸佛子。专心佛道。常行慈悲。自知作佛。
决定无疑。是名小树。安住神通。转不退轮。
度无量亿。百千众生。如是菩萨。名为大树。
佛平等说。如一味雨。随众生性。所受不同。
如彼草木。所禀各异。佛以此喻。方便开示。
种种言辞。演说一法。于佛智慧。如海一滴。

13 寅二、颂后生善处乃至渐得入道，合生长敷实譬。

我雨法雨。充满世间。一味之法。随力修行。
如彼丛林。药草诸树。随其大小。渐增茂好。
诸佛之法。常以一味。令诸世间。普得具足。
渐次修行。皆得道果。声闻缘觉。处于山林。
住最后身。闻法得果。是名药草。各得增长。
若诸菩萨。智慧坚固。了达三界。求最上乘。
是名小树。而得增长。复有住禅。得神通力。
闻诸法空。心大欢喜。放无数光。度诸众生。
是名大树。而得增长。

10 癸二、颂合差而无差

如是迦叶。佛所说法。譬如大云。以一味雨。
润于人华。各得成实。迦叶当知。以诸因缘。
种种譬喻。开示佛道。是我方便。诸佛亦然。
今为汝等。说最实事。诸声闻众。皆非灭度。
汝等所行。是菩萨道。渐渐修学。悉当成佛。

6 己四、授记品，是与受决(2)

7 庚一、正授中根记(2)

8 辛一、授大迦叶记(2)

9 壬一、长文(6)

10 癸一、行因

尔时世尊说是偈已。告诸大众。唱如是言。我此弟子摩诃迦叶。于未来世。当得奉觐三百万亿诸佛世尊。供养恭敬。尊重赞叹。广宣诸佛无量大法。

10 癸二、得果

于最后身。得成为佛。名曰光明如来。应供。正徧知。明行足。善逝。世间解。无上士。调御丈夫。天人师。佛。世尊。

10 癸三、劫国名

国名光德。劫名大庄严。

10 癸四、寿命

佛寿十二小劫。

10 癸五、正像久近

正法住世二十小劫。像法亦住二十小劫。

10 癸六、国净

国界严饰。无诸秽恶。瓦砾荆棘。便利不净。其土平正。无有高下。坑坎堆阜。琉璃为地。宝树行列。黄金为绳。以界道侧。散诸宝华。周徧清静。其国菩萨无量千亿。诸声闻众亦复无数。无有魔事。虽有魔及魔民。皆护佛法。

9 壬二、重颂(5)

10 癸一、颂行因得果

尔时世尊。欲重宣此义而说偈言：

告诸比丘。我以佛眼。见是迦叶。于未来世。
过无数劫。当得作佛。而于来世。供养奉觐。
三百万亿。诸佛世尊。为佛智慧。净修梵行。
供养最上。二足尊已。修习一切。无上之慧。
于最后身。得成为佛。

10 癸二、颂国净

其土清静。琉璃为地。多诸宝树。行列道侧。
金绳界道。见者欢喜。常出好香。散众名华。
种种奇妙。以为庄严。其地平正。无有丘坑。
诸菩萨众。不可称计。其心调柔。逮大神通。
奉持诸佛。大乘经典。诸声闻众。无漏后身。
法王之子。亦不可计。乃以天眼。不能数知。

10 癸三、颂佛寿

其佛当寿。十二小劫。

10 癸四、颂正像

正法住世。二十小劫。像法亦住。二十小劫。

10 癸五、总结，略不颂劫国名

光明世尊。其事如是。

8 辛二、授三人记(2)

9 壬一、请记(4)

10 癸一、正请

尔时大目犍连。须菩提。摩诃迦旃延等。皆悉悚栗。一心合掌。瞻仰尊颜。目不暂舍。即共同声而说偈言：

大雄猛世尊。诸释之法王。哀愍我等故。而赐佛音声。

10 癸二、立譬

若知我深心。见为授记者。如以甘露洒。除热得清凉。
如从饥国来。忽遇大王膳。心犹怀疑惧。未敢即便食。
若复得王教。然后乃敢食。

10 癸三、法合

我等亦如是。每惟小乘过。不知当云何。得佛无上慧。

虽闻佛音声。言我等作佛。心尚怀忧惧。如未敢便食。

若蒙佛授记。尔乃快安乐。

10 [癸四、结请](#)

大雄猛世尊。常欲安世间。愿赐我等记。如饥须教食。

9 [壬二、与记\(3\)](#)

10 [癸一、记须菩提\(2\)](#)

11 [子一、长文\(5\)](#)

12 [丑一、行因](#)

尔时世尊。知诸大弟子心之所念。告诸比丘。是须菩提。于当来世。奉觐三百万亿那由他佛。供养恭敬。尊重赞叹。常修梵行。具菩萨道。

12 [丑二、得果](#)

于最后身。得成为佛。号曰名相如来。应供。正徧知。明行足。善逝。世间解。无上士。调御丈夫。天人师。佛。世尊。

12 [丑三、劫国庄严](#)

劫名有宝。国名宝生。其土平正。玻璃为地。宝树庄严。无诸丘坑。沙砾荆棘。便利之秽。宝华覆地。周徧清静。其土人民。皆处宝台。珍妙楼阁。声闻弟子无量无边。算数譬喻所不能知。诸菩萨众。无数千万亿那由他。

12 [丑四、寿命](#)

佛寿十二小劫。

12 [丑五、正像](#)

正法住世二十小劫。像法亦住二十小劫。其佛常处虚空。为众说法。度脱无量菩萨及声闻众。

11 [子二、重颂\(5\)](#)

12 [丑一、诫听](#)

尔时世尊。欲重宣此义而说偈言：

诸比丘众。今告汝等。皆当一心。听我所说。

12 [丑二、颂行因得果](#)

我大弟子。须菩提者。当得作佛。号曰名相。
当供无数。万亿诸佛。随佛所行。渐具大道。
最后身得。三十二相。端正殊妙。犹如宝山。

12 [丑三、颂国净](#)

其佛国土。严净第一。众生见者。无不爱乐。
佛于其中。度无量众。其佛法中。多诸菩萨。
皆悉利根。转不退轮。彼国常以。菩萨庄严。
诸声闻众。不可称数。皆得三明。具六神通。
住八解脱。有大威德。其佛说法。现于无量。
神通变化。不可思议。诸天人民。数如恒沙。
皆共合掌。听受佛语。

12 [丑四、颂寿命](#)

其佛当寿。十二小劫。

12 [丑五、颂正像](#)

正法住世。二十小劫。像法亦住。二十小劫。

10 癸二、记迦旃延(2)

11 子一、长文(5)

12 丑一、行因

尔时世尊。复告诸比丘众。我今语汝。是大迦旃延。于当来世。以诸供具。供养奉事八千亿佛。恭敬尊重。诸佛灭后。各起塔庙。高千由旬。纵广正等五百由旬。以金银琉璃。砗磲玛瑙。真珠玫瑰。七宝合成。众华璎珞。涂香。末香。烧香。缯盖。幢幡。供养塔庙。过是已后。当复供养二万亿佛。亦复如是。供养是诸佛已。具菩萨道。

12 丑二、得果

当得作佛。号曰阎浮那提金光如来。应供。正徧知。明行足。善逝。世间解。无上士。调御丈夫。天人师。佛。世尊。

12 丑三、国淨

其土平正。玻璃为地。宝树庄严。黄金为绳。以界道侧。妙华覆地。周徧清淨。见者欢喜。无四恶道。地狱。饿鬼。畜生。阿修罗道。多有天人。诸声闻众。及诸菩萨。无量万亿。庄严其国。

12 丑四、寿命

佛寿十二小劫。

12 丑五、正像

正法住世二十小劫。像法亦住二十小劫。

11 子二、重颂(4)

12 丑一、诚听

尔时。世尊欲重宣此义。而说偈言。

诸比丘众。皆一心听。如我所说。真实无异。

12 丑二、颂行因

是迦旃延。当以种种。妙好供具。供养诸佛。

诸佛灭后。起七宝塔。亦以华香。供养舍利。

12 丑三、颂得果

其最后身。得佛智慧。成等正觉。

12 丑四、颂国淨

国土清淨。度脱无量。万亿众生。皆为十方。

之所供养。佛之光明。无能胜者。其佛号曰。

阎浮金光。菩萨声闻。断一切有。无量无数。

庄严其国。

10 癸三、记目犍连(2)

11 子一、长文(5)

丑初、行因

- 尔时世尊。复告大众。我今语汝。是大目犍连。当以种种供具。供养八千诸佛。恭敬尊重。诸佛灭后。各起塔庙。高千由旬。纵广正等五百由旬。以金银琉璃。砗磲玛瑙。真珠玫瑰。七宝合成。众华。璎珞。涂香。末香。烧香。缯盖。幢幡。以用供养。过是已后。当复供养二百万亿诸佛。亦复如是。

12 丑二、得果

当得成佛。号曰多摩罗跋栴檀香如来。应供。正徧知。明行足。善逝。世间解。无上士。调御丈夫。天人师。佛。世尊。

12 丑三、劫国

劫名喜满。国名意乐。其土平正。玻璃为地。宝树庄严。散真珠华。周徧清静。见者欢喜。多诸天人。菩萨声闻。其数无量。

12 丑四、寿命

佛寿二十四小劫。

12 丑五、正像

正法住世四十小劫。像法亦住四十小劫。

11 子二、重颂(5)

12 丑一、颂行因

尔时世尊。欲重宣此义而说偈言：

我此弟子。大目犍连。舍是身已。得见八千。
二百万亿。诸佛世尊。为佛道故。供养恭敬。
于诸佛所。常修梵行。于无量劫。奉持佛法。
诸佛灭后。起七宝塔。长表金刹。华香伎乐。
而以供养。诸佛塔庙。

12 丑二、颂得果兼国名

渐渐具足。菩萨道已。于意乐国。而得作佛。
号多摩罗。栴檀之香。

12 丑三、颂寿命

其佛寿命。二十四劫。

12 丑四、颂国净

常为天人。演说佛道。声闻无量。如恒河沙。
三明六通。有大威德。菩萨无数。志固精进。
于佛智慧。皆不退转。

12 丑五、颂正像

佛灭度后。正法当住。四十小劫。像法亦尔。

7 庚二、许为下根宿世说

我诸弟子。威德具足。其数五百。皆当授记。
于未来世。咸得成佛。我及汝等。宿世因缘。
吾今当说。汝等善听。

5 戊三、因缘说周(2)

6 己一、正说因缘(2)

7 庚一、先明知见久远(2)

8 辛一、长文(3)

9 壬一、出所见事

佛告诸比丘。乃往过去。无量无边不可思议阿僧祇劫。尔时有佛。名大通智胜如来。应供。正徧知。明行足。善逝。世间解。无上士。调御丈夫。天人师。佛。世尊。其国名好城。劫名大相。诸比丘。彼佛灭度已来。甚大久远。

9 壬二、举譬明久远

譬如三千大千世界所有地种。假使有人磨以为墨。过于东方千国土。乃下一点。大如微尘。又过千国土。复下一点。如是展转。尽地种墨。于汝等意云何。是诸国土。若算师。若算师弟子。能得边际。知其数不。不也。世尊。诸比丘。是人所经国土。若点不点。尽抹为尘。一尘一劫。彼佛灭度已来。复过是数。无量无边百千万亿阿僧祇劫。

9 壬三、结见昔如今

我以如来知见力故。观彼久远。犹若今日。

8 辛二、重颂(3)

9 壬一、颂所见事

尔时世尊。欲重宣此义而说偈言：

我念过去世。无量无边劫。有佛两足尊。名大通智胜。

9 壬二、颂举譬明久远

如人以力磨。三千大千土。尽此诸地种。皆悉以为墨。过于千国土。乃下一尘点。如是展转点。尽此诸尘墨。如是诸国土。点与不点等。复尽抹为尘。一尘为一劫。此诸微尘数。其劫复过是。彼佛灭度来。如是无量劫。

9 壬三、颂见昔如今

如来无碍智。知彼佛灭度。及声闻菩萨。如见今灭度。诸比丘当知。佛智净微妙。无漏无所碍。通达无量劫。

7 庚二、正明宿世因缘(2)

8 辛一、广述(2)

9 壬一、结缘之由(2)

10 癸一、远由(2)

11 子一、明大通智胜成佛(5)

12 丑一、佛寿长远

佛告诸比丘。大通智胜佛。寿五百四十万亿那由他劫。

12 丑二、成道前事

其佛本坐道场。破魔军已。垂得阿耨多罗三藐三菩提。而诸佛法不现在前。如是一小劫。乃至十小劫。结跏趺坐。身心不动。而诸佛法犹不在前。尔时（佛未坐道场前）忉利诸天。先为彼佛。于菩提树下。敷师子座。高一由旬。（咸作是念）佛于此坐。当得阿耨多罗三藐三菩提。（逮佛）适坐此座时。诸梵天王。雨众天华。面百由旬。香风时来。吹去萎华。更雨新者。如是不绝。满十小劫。供养于佛。乃至灭度。常雨此华。四王诸天。为供养佛。常击天鼓。其余诸天。作天伎乐。满十小劫。至于灭度。亦复如是。

12 丑三、正明成道

诸比丘。大通智胜佛过十小劫。诸佛之法乃现在前。成阿耨多罗三藐三菩提。

12 丑四、明成道后眷属供养

其佛未出家时。有十六子。其第一者。名曰智积。诸子各有种种珍异玩好之具。闻父得成阿耨多罗三藐三菩提。皆舍所珍。往诣佛所。诸母涕泣而随送之。其祖转轮圣王。与一百大臣。及余百千万亿人

民。皆共围绕。随至道场。咸欲亲近大通智胜如来。供养恭敬。尊重赞叹。到已。头面礼足。绕佛毕已。一心合掌。瞻仰世尊。以偈颂曰：

大威德世尊。为度众生故。于无量亿岁。尔乃得成佛。

诸愿已具足。善哉吉无上。世尊甚希有。一坐十小劫。

身体及手足。静然安不动。其心常愴怕。未曾有散乱。

究竟永寂灭。安住无漏法。今者见世尊。安隐成佛道。

我等得善利。称庆大欢喜。众生常苦恼。盲瞋无导师。

不识苦尽道。不知求解脱。长夜增恶趣。减损诸天众。

从冥入于冥。永不闻佛名。今佛得最上。安隐无漏道。

我等及天人。为得最大利。是故咸稽首。归命无上尊。

十六王子。若约表法。即自行化他八正道也。

12 丑五、请转法轮

尔时十六王子偈赞佛已。劝请世尊转于法轮。咸作是言。世尊说法。多所安隐。怜愍饶益。诸天人民。重说偈言：

世雄无等伦。百福自庄严。得无上智慧。愿为世间说。

度脱于我等。及诸众生类。为分别显示。令得是智慧。

若我等得佛。众生亦复然。世尊知众生。深心之所念。

亦知所行道。又知智慧力。欲乐及修福。宿命所行业。

世尊悉知己。当转无上轮。

11 子二、明十方梵王请法(2)

12 丑一、威光照动

佛告诸比丘。大通智胜佛得阿耨多罗三藐三菩提时。十方各五百万亿诸佛世界。六种震动。其国中间幽冥之处。日月威光所不能照。而皆大明。其中众生各得相见。咸作是言。此中云何忽生众生。又其国界。诸天宫殿。乃至梵宫。六种震动。大光普照。徧满世界。胜诸天光。

12 丑二、梵王来请(5)

13 寅一、东方(6)

14 卯一、覩瑞惊骇

尔时东方五百万亿诸国土中。梵天宫殿。光明照曜。倍于常明。诸梵天王各作是念。今者宫殿光明。昔所未有。以何因缘而现此相。

14 卯二、互相问决

是时诸梵天王。即各相诣。共议此事。时彼众中。有一大梵天王。名救一切。为诸梵众而说偈言：

我等诸宫殿。光明昔未有。此是何因缘。宜各共求之。

为大德天生。为佛出世间。而此大光明。徧照于十方。

14 卯三、寻光见佛

尔时五百万亿国土诸梵天王。与宫殿俱。各以衣祴盛诸天华。共诣西方。推寻是相。见大通智胜如来。处于道场菩提树下。坐师子座。诸天龙王。乾闥婆。紧那罗。摩睺罗伽。人非人等。恭敬围绕。及见十六王子请佛转法轮。

14 卯四、三业供养

实时诸梵天王。头面礼佛。绕百千匝。即以天华而散佛上。其所散华如须弥山。并以供养佛菩提树。其菩提树高十由旬。华供养已。各以宫殿奉上彼佛。而作是言。惟见哀愍。饶益我等。所献宫殿。愿垂纳处。时诸梵天王。即于佛前。一心同声。以偈颂曰：

世尊甚希有。难可得值遇。具无量功德。能救护一切。

天人之大师。哀愍于世间。十方诸众生。普皆蒙饶益。

我等所从来。五百万亿国。舍深禅定乐。为供养佛故。

我等先世福。宫殿甚严饰。今以奉世尊。惟愿哀纳受。

14 卯五、请转法轮

尔时诸梵天王偈赞佛已。各作是言。惟愿世尊转于法轮。度脱众生。开涅槃道。时诸梵天王。一心同声。而说偈言：

世雄两足尊。惟愿演说法。以大慈悲力。度苦恼众生。

14 卯六、如来默许

尔时大通智胜如来。默然许之。

13 寅二、东南方(6)

14 卯一、覩瑞惊骇

又诸比丘。东南方五百万亿国土诸大梵王。各自见宫殿光明照曜。昔所未有。欢喜踊跃。生希有心。

14 卯二、互相问决

即各相诣。共议此事。时彼众中有一大梵天王。名曰大悲。为诸梵众而说偈言：

是事何因缘。而现如此相。我等诸宫殿。光明昔未有。

为大德天生。为佛出世间。未曾见此相。当共一心求。

过千万亿土。寻光共推之。多是佛出世。度脱苦众生。

14 卯三、寻光见佛

尔时五百万亿诸梵天王。与宫殿俱。各以衣祴盛诸天华。共诣西北方。推寻是相。见大通智胜如来。处于道场菩提树下。坐师子座。诸天龙王。乾闥婆。紧那罗。摩睺罗伽。人非人等。恭敬围绕。及见十六王子请佛转法轮。

14 卯四、三业供养

时诸梵天王。头面礼佛。绕百千匝。即以天华而散佛上。所散之华如须弥山。并以供养佛菩提树。华供养已。各以宫殿奉上彼佛。而作是言。惟见哀愍。饶益我等。所献宫殿愿垂纳受。尔时诸梵天王。即于佛前。一心同声。以偈颂曰：

圣主天中王。迦陵频伽声。哀愍众生者。我等今敬礼。

世尊甚希有。久远乃一现。一百八十劫。空过无有佛。

三恶道充满。诸天众减少。今佛出于世。为众生作眼。

世间所归趣。救护于一切。为众生之父。哀愍饶益者。

我等宿福庆。今得值世尊。

14 卯五、请转法轮

尔时诸梵天王偈赞佛已。各作是言。惟愿世尊哀愍一切。转于法轮。度脱众生。时诸梵天王。一心同声。而说偈言：

大圣转法轮。显示诸法相。度苦恼众生。令得大欢喜。

众生闻此法。得道若生天。诸恶道减少。忍善者增益。

此亦同前请半字教也。

14 卯六、如来默许

尔时大通智胜如来。默然许之。

13 寅三、南方(6)

14 卯一、覩瑞惊骇

又诸比丘。南方五百万亿国土。诸大梵王。各自见宫殿光明照曜。昔所未有。欢喜踊跃。生希有心。

14 卯二、互相问决

即各相诣。共议此事。以何因缘。我等宫殿有此光曜。时彼众中有一大梵天王。名曰妙法。为诸梵众而说偈言：

我等诸宫殿。光明甚威曜。此非无因缘。是相宜求之。

过于百千劫。未曾见是相。为大德天生。为佛出世间。

14 卯三、寻光见佛

尔时五百万亿诸梵天王。与宫殿俱。各以衣盛诸天华。共诣北方。推寻是相。见大通智胜如来。处于道场菩提树下。坐师子座。诸天龙王。乾闥婆。紧那罗。摩睺罗伽。人非人等。恭敬围绕。及见十六王子请佛转法轮。

14 卯四、三业供养

时诸梵天王。头面礼佛。绕百千匝。即以天华而散佛上。所散之华如须弥山。并以供养佛菩提树。华供养已。各以宫殿奉上彼佛。而作是言。惟见哀愍。饶益我等。所献宫殿。愿垂纳受。尔时诸梵天王。即于佛前。一心同声。以偈颂曰：

世尊甚难见。破诸烦恼者。过百三十劫。今乃得一见。

诸饥渴众生。以法雨充满。昔所未曾覩。无量智慧者。

如优昙鉢华。今日乃值遇。我等诸宫殿。蒙光故严饰。

世尊大慈愍。惟愿垂纳受。

14 卯五、请转法轮

尔时诸梵天王偈赞佛已。各作是言。惟愿世尊转于法轮。令一切世间诸天魔梵。沙门婆罗门。皆获安隐。而得度脱。时诸梵天王。一心同声。以偈颂曰：

惟愿天人尊。转无上法轮。击于大法鼓。而吹大法螺。

普雨大法雨。度无量众生。我等咸归请。当演深远音。

既云无上法轮。又云大法鼓大法螺。即是请对半明满之教。如今方等也。

14 卯六、如来默许

尔时大通智胜如来。默然许之。

13 寅四、总举余六方

西南方。乃至下方。亦复如是。

13 寅五、上方(5)

14 卯一、覩瑞惊骇

尔时上方五百万亿国土。诸大梵王皆悉自覩。所止宫殿光明威曜。昔所未有。欢喜踊跃。生希有心。

14 卯二、互相问决

即各相诣。共议此事。以何因缘。我等宫殿有斯光明。时彼众中有一大梵天王。名曰尸弃。为诸梵众而说偈言：

今以何因缘。我等诸宫殿。威德光明曜。严饰未曾有。

如是之妙相。昔所未闻见。为大德天生。为佛出世间。

14 卯三、寻光见佛

尔时五百万亿诸梵天王。与宫殿俱。各以衣祴盛诸天华。共诣下方。推寻是相。见大通智胜如来。处于道场菩提树下。坐师子座。诸天龙王。乾闥婆。紧那罗。摩睺罗伽。人非人等。恭敬围绕。及见十六王子请佛转法轮。

14 卯四、三业供养

时诸梵天王。头面礼佛。绕百千匝。即以天华而散佛上。所散之华如须弥山。并以供养佛菩提树。华供养已。各以宫殿奉上彼佛。而作是言。惟见哀愍。饶益我等。所献宫殿。愿垂纳处。时诸梵天王。即于佛前。一心同声。以偈颂曰：

善哉见诸佛。救世之圣尊。能于三界狱。勉出诸众生。

普智天人尊。哀愍群萌类。能开甘露门。广度于一切。

于昔无量劫。空过无有佛。世尊未出时。十方常闇暝。

三恶道增长。阿修罗亦盛。诸天众转减。死多堕恶道。

不从佛闻法。常行不善事。色力及智慧。斯等皆减少。

罪业因缘故。失乐及乐想。住于邪见法。不识善仪则。

不蒙佛所化。常堕于恶道。佛为世间眼。久远时乃出。

哀愍诸众生。故现于世间。超出成正觉。我等甚欣庆。

及余一切众。喜叹未曾有。我等诸宫殿。蒙光故严饰。

今以奉世尊。惟垂哀纳受。愿以此功德。普及于一切。

我等与众生。皆共成佛道。

14 卯五、请转法轮

尔时五百万亿诸梵天王。偈赞佛已。各白佛言。惟愿世尊转于法轮。多所安隐。多所度脱。时诸梵天王而说偈言：

世尊转法轮。击甘露法鼓。度苦恼众生。开示涅槃道。

惟愿受我请。以大微妙音。哀愍而敷演。无量劫习法。

10 癸二、近由(2)

11 子一、转半字法轮(3)

12 丑一、受请

尔时大通智胜如来。受十方诸梵天王。及十六王子请。

12 丑二、正转(2)

13 寅一、明四谛

即时三转十二行法轮。若沙门。婆罗门。若天魔梵。及余世间所不能转。谓是苦。是苦集。是苦灭。是苦灭道。

13 寅二、明十二因缘

及广说十二因缘法。无明缘行。行缘识。识缘名色。名色缘六入。六入缘触。触缘受。受缘爱。爱缘取。取缘有。有缘生。生缘老死忧悲苦恼。无明灭则行灭。行灭则识灭。识灭则名色灭。名色灭则六入灭。六入灭则触灭。触灭则受灭。受灭则爱灭。爱灭则取灭。取灭则有灭。有灭则生灭。生灭则老死忧悲苦恼灭。

12 丑三、闻法得道

佛于天人大众之中。说是法时。六百万亿那由他人。以不受一切法故。而于诸漏心得解脱。皆得深妙禅定。三明六通。具八解脱。第二第三第四说法时。千万亿恒河沙那由他等众生。亦以不受一切法故。而于诸漏心得解脱。从是已后。诸声闻众无量无边。不可称数。

11 子二、转废半明满法轮(7)

12 丑一、诸子出家

尔时十六王子。皆以童子出家。而为沙弥。诸根通利。智慧明了。已曾供养百千万亿诸佛。净修梵行。求阿耨多罗三藐三菩提。

12 丑二、请法

俱白佛言。世尊。是诸无量千万亿大德声闻。皆已成就。世尊亦当为我等说阿耨多罗三藐三菩提法。我等闻已。皆共修学。世尊。我等志愿如来知见。深心所念。佛自证知。

12 丑三、所将亦出家

尔时转轮圣王所将众中八万亿人。见十六王子出家。亦求出家。王即听许。

12 丑四、佛受请

尔时彼佛受沙弥请。过二万劫已。乃于四众之中说是大乘经。名妙法莲华。教菩萨法。佛所护念。说是经已。十六沙弥为阿耨多罗三藐三菩提故。皆共受持。讽诵通利。

12 丑五、时众有解不解

说是经时。十六菩萨沙弥皆悉信受。声闻众中亦有信解。其余众生。千万亿种。皆生疑惑。

12 丑六、时节

佛说是经。于八千劫未曾休废。

12 丑七、说已入定

说是经已。即入静室。住于禅定。八万四千劫。

9 壬二、正结缘(2)

10 癸一、法说结缘(3)

11 子一、明昔共结缘(2)

12 丑一、覆讲利生

是时十六菩萨沙弥。知佛入室。寂然禅定。各升法座。亦于八万四千劫。为四部众。广说分别妙法华经。一一皆度六百万亿那由他恒河沙等众生。示教利喜。令发阿耨多罗三藐三菩提心。

12 丑二、佛起称叹(2)

13 寅一、正称叹

大通智胜佛。过八万四千劫已。从三昧起。往诣法座。安详而坐。普告大众。是十六菩萨沙弥甚为希有。诸根通利。智慧明了。已曾供养无量千万亿数诸佛。于诸佛所。常修梵行。受持佛智。开示众生。令入其中。

13 寅二、劝亲信

汝等皆当数数亲近而供养之。所以者何。若声闻辟支佛。及诸菩萨。能信是十六菩萨所说经法。受持不毁者。是人皆当得阿耨多罗三藐三菩提。如来之慧。

11 子二、明中间更相值

佛告诸比丘。是十六菩萨。常乐说是妙法莲华经。——菩萨所化六百万亿那由他恒河沙等众生。世所生。与菩萨俱。从其闻法。悉皆信解。以此因缘。得值四万亿诸佛世尊。于今不尽。

11 [子三、明今日还说法华\(2\)](#)

12 [丑一、先结会古今\(2\)](#)

13 [寅一、结师之古今](#)

诸比丘。我今语汝。彼佛弟子十六沙弥。今皆得阿耨多罗三藐三菩提。于十方国土现在说法。有无量百千万亿菩萨声闻以为眷属。其二沙弥。东方作佛。一名阿閼。在欢喜国。二名须弥顶。东南方二佛。一名师子音。二名师子相。南方二佛。一名虚空住。二名常灭。西南方二佛。一名帝相。二名梵相。西方二佛。一名阿弥陀。二名度一切世间苦恼。西北方二佛。一名多摩罗跋栴檀香神通。二名须弥相。北方二佛。一名云自在。二名云自在王。东北方佛。名坏一切世间怖畏。第十六我释迦牟尼佛。于娑婆国土。成阿耨多罗三藐三菩提。

13 [寅二、会弟子古今\(4\)](#)

14 [卯一、明本结大缘](#)

诸比丘。我等为沙弥时。各各教化无量百千万亿恒河沙等众生。从我闻法。为阿耨多罗三藐三菩提。

14 [卯二、释今住声闻疑](#)

此诸众生。于今有住声闻地者。我常教化阿耨多罗三藐三菩提。是诸人等。应以是法渐入佛道。所以者何。如来智慧。难信难解。

14 [卯三、正结会古今](#)

尔时所化无量恒河沙等众生者。汝等诸比丘。及我灭度后。未来世中声闻弟子是也。

14 [卯四、释未来弟子疑](#)

我灭度后。复有弟子。不闻是经。不知不觉菩萨所行。自于所得功德生灭度想。当入涅槃。我于余国作佛。更有异名。是人虽生灭度之想。入于涅槃。而于彼土求佛智慧。得闻是经。唯以佛乘而得灭度。更无余乘。除诸如来方便说法。

12 [丑二、正明还说法华\(2\)](#)

13 [寅一、明应时故说](#)

诸比丘。若如来自知涅槃时到。众又清静。信解坚固。了达空法。深入禅定。便集诸菩萨。及声闻众。为说是经。世间无有二乘而得灭度。唯一佛乘得灭度耳。

13 [寅二、释前开三意](#)

比丘当知。如来方便。深入众生之性。知其志乐小法。深着五欲。为是等故。说于涅槃。是人若闻。则便信受。

10 [癸二、譬说结缘\(2\)](#)

11 [子一、立譬\(2\)](#)

12 [丑一、导师譬](#)

譬如五百由旬。险难恶道。旷绝无人。怖畏之处。若有多众。欲过此道。至珍宝处。有一导师。聪慧明达。善知险道通塞之相。

12 [丑二、将导譬\(3\)](#)

13 [寅一、所将人众譬](#)

将导众人。欲过此难。

13 [寅二、中路懈怠譬\(2\)](#)

14 [卯一、退大](#)

所将人众。中路懈怠。白导师言。我等疲极。而复怖畏。不能复进。前路犹远。今欲退还。

14 [卯二、接小\(2\)](#)

15 [辰一、方便设化](#)

导师多诸方便。而作是念。此等可愍。云何舍大珍宝。而欲退还。作是念已。以方便力。于险道中。过三百由旬。化作一城。告众人言。汝等勿布。莫得退还。今此大城。可于中止。随意所作。若入是城。快得安隐。若能前至宝所。亦可得去。

15 辰二、欢喜前入

是时疲极之众。心大欢喜。叹未曾有。我等今者。免斯恶道。快得安隐。于是众人前入化城。生已度想。生安隐想。

13 寅三、灭化引至宝所譬

尔时导师。知此人众。既得止息。无复疲倦。即灭化城。语众人言。汝等去来。宝处在近。向者大城。我所化作。为止息耳。

11 子二、法合(2)

12 丑一、正合(2)

13 寅一、合导师譬

诸比丘。如来亦复如是。今为汝等作大导师。知诸生死烦恼恶道。险难长远。应去应度。

13 寅二、合将导譬

若众生但闻一佛乘者。则不欲见佛。不欲亲近。便作是念。佛道长远。久受勤苦。乃可得成。佛知是心怯弱下劣。以方便力。而于中道为止息故。说二涅槃。若众生住于二地。如来尔时即便为说。汝等所作未办。汝所住地。近于佛慧。当观察筹量。所得涅槃非真实也。但是如来方便之力。于一佛乘。分别说三。

12 丑二、举譬帖合

如彼导师。为止息故。化作大城。既知息已。而告之言。宝处在近。此城非实。我化作耳。

8 辛二、重颂(2)

9 壬一、颂结缘之由(2)

10 癸一、颂远由(2)

11 子一、颂大通智胜成佛

尔时世尊。欲重宣此义而说偈言：

大通智胜佛。十劫坐道场。佛法不现前。不得成佛道。

诸天神龙王。阿修罗众等。常雨于天华。以供养彼佛。

诸天击天鼓。并作众伎乐。香风吹萎华。更雨新好者。

过十小劫已。乃得成佛道。诸天及世人。心皆怀踊跃。

彼佛十六子。皆与其眷属。千万亿围绕。俱行至佛所。

头面礼佛足。而请转法轮。圣师子法雨。充我及一切。

11 子二、颂十方梵王请法(2)

12 丑一、颂威光照动

世尊甚难值。久远时一现。为觉悟群生。震动于一切。

12 丑二、颂梵王来请

东方诸世界。五百万亿国。梵宫殿光曜。昔所未曾有。

诸梵见此相。寻来至佛所。散华以供养。并奉上宫殿。

请佛转法轮。以偈而赞叹。佛知时未至。受请默然坐。

三方及四维。上下亦复尔。散华奉宫殿。请佛转法轮。

世尊甚难值。愿以大慈悲。广开甘露门。转无上法轮。

前三偈。颂东方。后二偈。总颂九方也。初颂远由竟。

10 癸二、颂近由(2)
11 子一、颂转半字法轮

无量慧世尊。受彼众人请。为宣种种法。四谛十二缘。
无明至老死。皆从生缘有。如是众过患。汝等应当知。
宣畅是法时。六百万亿。得尽诸苦际。皆成阿罗汉。
第二说法时。千万恒沙众。于诸法不受。亦得阿罗汉。
从是后得道。其数无有量。万亿劫算数。不能得其边。

11 子二、颂转废半明满法轮

时十六王子。出家作沙弥。皆共请彼佛。演说大乘法。
我等及营从。皆当成佛道。愿得如世尊。慧眼第一净。
佛知童子心。宿世之所行。以无量因缘。种种诸譬喻。
说六波罗蜜。及诸神通事。分别真实法。菩萨所行道。
说是法华经。如恒河沙偈。彼佛说经已。静室入禅定。
一心一处坐。八万四千劫。

9 壬二、颂正结缘(2)

10 癸一、颂法说(3)

11 子一、颂昔共结缘

是诸沙弥等。知佛禅未出。为无量亿众。说佛无上慧。
各各坐法座。说是大乘经。于佛宴寂后。宣扬助法化。
一一沙弥等。所度诸众生。有六百万亿。恒河沙等众。

11 子二、颂中间更相值遇

彼佛灭度后。是诸闻法者。在在诸佛土。常与师俱生。

11 子三、颂今日还说法华(2)

12 丑一、颂结会古今

是十六沙弥。具足行佛道。今现在十方。各得成正觉。
尔时闻法者。各在诸佛所。其有住声闻。渐教以佛道。
我在十六数。曾亦为汝说。是故以方便。引汝趣佛慧。

12 丑二、颂正明还说法华

以是本因缘。今说法华经。令汝入佛道。慎勿怀惊惧。

10 癸二、颂譬说(2)

11 子一、颂立譬(2)

12 丑一、颂导师譬

譬如险恶道。迥绝多毒兽。又复无水草。人所怖畏处。
无数千万众。欲过此险道。其路甚旷远。经五百由旬。
时有一导师。强识有智慧。明了心决定。在险济众难。

12 丑二、颂将导譬(2)

13 寅一、颂所将人众中路懈怠(2)

14 卯一、颂众人退大

众人皆疲倦。而白导师言。我等今顿乏。于此欲退还。

14 卯二、颂导师接小(2)

15 辰一、颂方便设化

导师作是念。此辈甚可愍。如何欲退还。而失大珍宝。
寻时思方便。当设神通力。化作大城郭。庄严诸舍宅。
周匝有园林。渠流及浴池。重门高楼阁。男女皆充满。
即作是化已。慰众言勿惧。汝等入此城。各可随所乐。

15 辰二、颂欢喜前入

诸人既入城。心皆大欢喜。皆生安隐想。自谓已得度。

13 寅二、颂灭化引至宝所

导师知息已。集众而告言。汝等当前进。此是化城耳。
我见汝疲极。中路欲退还。故以方便力。权化作此城。
汝今勤精进。当共至宝所。

11 子二、颂法合(2)

12 丑一、颂正合(2)

13 寅一、颂合导师

我亦复如是。为一切导师。

13 寅二、颂合将导

见诸求道者。中路而懈怠。不能度生死。烦恼诸险道。
故以方便力。为息说涅槃。言汝等苦灭。所作皆已办。
既知到涅槃。皆得阿罗汉。尔乃集大众。为说真实法。
诸佛方便力。分别说三乘。唯有一佛乘。息处故说二。
今为汝说实。汝所得非灭。为佛一切智。当发大精进。
汝证一切智。十力等佛法。具三十二相。乃是真实灭。

12 丑二、颂举譬帖合

诸佛之导师。为息说涅槃。既知是息已。引入于佛慧。

6 己二、授下根记(2)

7 庚一、此品，授千二百记(2)

8 辛一、授满慈子(2)

9 壬一、序默领解(2)

10 癸一、叙其得解欢喜

尔时富楼那弥多罗尼子。从佛闻是智慧方便。随宜说法。又闻授诸大弟子阿耨多罗三藐三菩提记。复闻宿世因缘之事。复闻诸佛有自在神通之力。得未曾有。心净踊跃。即从座起。到于佛前。头面礼足。却住一面。瞻仰尊颜。目不暂舍。

10 癸二、叙其默念领解

而作是念。世尊甚奇特。所为希有。随顺世间若干种性。以方便知见而为说法。拔出众生处处贪着。我等于佛功德。言不能宣。

唯佛世尊。能知我等。深心本愿。

9 壬二、如来述记(2)

10 癸一、长文(2)

11 子一、述本迹(3)

12 丑一、就释迦世行因发迹

尔时佛告诸比丘。汝等见是富楼那弥多罗尼子不。我常称其于说法人中。最为第一。亦常叹其种种功德。精勤护持。助宣我法。能于四众示教利喜。具足解释佛之正法。而大饶益同梵行者。自舍如来。无能尽其言论之辩。

12 丑二、约过去世显其本行

汝等勿谓富楼那但能护持助宣我法。亦于过去九十亿诸佛所。护持助宣佛之正法。于彼说法人中。亦最第一。又于诸佛所说空法。明了通达。得四无碍智。常能审谛清净说法。无有疑惑。具足菩萨神通之力。随其寿命。常修梵行。彼佛世人。咸皆谓之实是声闻。而富楼那。以斯方便。饶益无量百千众生。又化无量阿僧祇人。令立阿耨多罗三藐三菩提。为净佛土故。常作佛事。教化众生。

12 丑三、约三世佛所修因

诸比丘。富楼那亦于七佛说法人中而得第一。今于我所说法人中亦为第一。于贤劫中。当来诸佛说法人中亦复第一。而皆护持助宣佛法。亦于未来。护持助宣无量无边诸佛之法。教化饶益无量众生。令立阿耨多罗三藐三菩提。为净佛土故。常勤精进。教化众生。

11 子二、与授记(5)

12 丑一、明因果果满

渐渐具足菩萨之道。过无量阿僧祇劫。当于此土。得阿耨多罗三藐三菩提。号曰法明如来。应供。正徧知。明行足。善逝。世间解。无上士。调御丈夫。天人师。佛。世尊。

12 丑二、明国土广净(5)

13 寅一、明国大严净

其佛以恒河沙等三千大千世界为一佛土。七宝为地。地平如掌。无有山陵。谿涧沟壑。七宝台观充满其中。诸天宫殿。近处虚空。人天交接。两得相见。

13 寅二、明纯是善道

无诸恶道。亦无女人。一切众生。皆以化生。无有姪欲。

13 寅三、明人天福慧具足

得大神通。身出光明。飞行自在。志念坚固。精进智慧。普皆金色三十二相。而自庄严。其国众生。常以二食。一者法喜食。二者禅悦食。

13 寅四、明菩萨声闻众数甚多

有无量阿僧祇千万亿那由他诸菩萨众。得大神通。四无碍智。善能教化众生之类。其声闻众。算数校计所不能知。皆得具足六通三明。及八解脱。

13 寅五、总结庄严

其佛国土。有如是等无量功德庄严成就。

12 丑三、明劫国名字

劫名宝明。国名善净。

12 丑四、明佛寿法住

其佛寿命。无量阿僧祇劫。法住甚久。

12 丑五、明灭后供养舍利

佛灭度后。起七宝塔。徧满其国。

10 癸二、偈颂(2)

11 子一、颂发迹(2)

12 丑一、总发诸声闻迹

尔时世尊。欲重宣此义而说偈言：

诸比丘谛听。佛子所行道。善学方便故。不可得思议。

知众乐小法。而畏于大智。是故诸菩萨。作声闻缘觉。
以无数方便。化诸众生类。自说是声闻。去佛道甚远。
度脱无量众。皆悉得成就。虽小欲懈怠。渐当令作佛。
内秘菩萨行。外现是声闻。少欲厌生死。实自净佛土。
示众有三毒。又现邪见相。我弟子如是。方便度众生。
若我具足说。种种现化事。众生闻是者。心则怀疑惑。

12 [丑二、颂发富楼那迹](#)

今此富楼那。于昔千亿佛。勤修所行道。宣护诸佛法。
为求无上慧。而于诸佛所。现居弟子上。多闻有智慧。
所说无所畏。能令众欢喜。未曾有疲倦。而以助佛事。
已度大神通。具四无碍智。知诸根利钝。常说清净法。
演畅如是义。教诸千亿众。令住大乘法。而自净佛土。
未来亦供养。无量无数佛。护助宣正法。亦自净佛土。
常以诸方便。说法无所畏。度不可计众。成就一切智。

11 [子二、颂授记\(3\)](#)

12 [丑一、颂因圆果满](#)

供养诸如来。护持法宝藏。其后得成佛。号名曰法明。

12 [丑二、超颂国劫名字](#)

其国名善净。七宝所合成。劫名为宝明。

12 [丑三、颂国土广净](#)

菩萨众甚多。其数无量亿。皆度大神通。威德力具足。
充满其国土。声闻亦无数。三明八解脱。得四无碍智。
以是等为僧。其国诸众生。婬欲皆已断。纯一变化生。
具相庄严身。法喜禅悦食。更无余食想。无有诸女人。
亦无诸恶道。富楼那比丘。功德悉成满。当得斯净土。
贤圣众甚多。如是无量事。我今但略说。

8 [辛二、授千二百人\(3\)](#)

9 [壬一、念请](#)

尔时千二百阿罗汉。心自在者作是念。我等欢喜得未曾有。若世尊各见授记。如余大弟子者。不亦快乎。

9 [壬二、与记](#)

10 [癸一、长文\(3\)](#)

11 [子一、总记千二百](#)

佛知此等心之所念。告摩诃迦叶。是千二百阿罗汉。我今当现前。次第与授阿耨多罗三藐三菩提记。

11 [子二、别记憍陈如](#)

于此众中。我大弟子憍陈如比丘。当供养六万二千亿佛。然后得成为佛。号曰普明如来。应供。正徧知。明行足。善逝。世间解。无上士。调御丈夫。天人师。佛。世尊。

11 [子三、别记五百](#)

其五百阿罗汉。优楼频螺迦叶。伽耶迦叶。那提迦叶。迦留陀夷。优陀夷。阿楼陀。离婆多。劫宾那。薄拘罗。周陀。莎伽陀等。皆当得阿耨多罗三藐三菩提。尽同一号。名曰普明。

10 癸二、偈颂(2)

11 子一、颂记陈如及五百

尔时世尊。欲重宣此义而说偈言：

憍陈如比丘。当见无量佛。过阿僧祇劫。乃成等正觉。
常放大光明。具足诸神通。名闻徧十方。一切之所敬。
常说无上道。故号为普明。其国土清净。菩萨皆勇猛。
咸升妙楼阁。游诸十方国。以无上供具。奉献于诸佛。
作是供养已。心怀大欢喜。须臾还本国。有如是神力。
佛寿六万劫。正法住倍寿。像法复倍是。法灭天人忧。
其五百比丘。次第当作佛。同号曰普明。转次而授记。
我灭度之后。某甲当作佛。其所化世间。亦如我今日。
国土之严净。及诸神通力。菩萨声闻众。正法及像法。
寿命劫多少。皆如上所说。

11 子二、颂总授一切声闻记

迦叶汝已知。五百自在者。余诸声闻众。亦当复如是。

其不在此会。汝当为宣说。

9 壬三、领解(2)

10 癸一、长文(2)

11 子一、经家叙喜

尔时五百阿罗汉。于佛前得受记已。欢喜踊跃。即从座起。到于佛前。头面礼足。悔过自责。

11 子二、自陈领解(2)

12 丑一、法说

世尊。我等常作是念。自谓已得究竟灭度。今乃知之如无智者。所以者何。我等应得如来智慧。而便自以小智为足。

12 丑二、譬说(2)

13 寅一、立譬(2)

14 卯一、醉酒譬，譬自谓灭度，小智为足(3)

15 辰一、系珠譬，领上王子结缘

世尊。譬如有有人。至亲友家。醉酒而卧。是时亲友。官事当行。以无价宝珠。系其衣里。与之而去。

15 辰二、醉卧不觉譬，领上中间退大

其人醉卧。都不觉知。

15 辰三、起已游行譬，领上接之以小

起已游行。到于他国。为衣食故。勤力求索。甚大艰难。若少有所得。便以为足。

14 卯二、亲友觉悟譬，譬今乃知之，应得如来智慧(3)

15 辰一、诃责

于后亲友会遇见之。而作是言。咄哉丈夫。何为衣食。乃至如是。

15 辰二、示珠

我昔欲令汝得安乐。五欲自恣。于某年日月。以无价宝珠系汝衣里。今故现在。而汝不知。勤苦忧恼。以求自活。甚为痴也。

15 辰三、劝贸

汝今可以此宝。贸易所须。常可如意。无所乏短。

13 寅二、法合(2)

14 卯一、合醉酒(3)

15 辰一、合系珠

佛亦如是。为菩萨时。教化我等。令发一切智心。

15 辰二、合醉卧不知

而寻废忘。不知不觉。

15 辰三、合起已游行, 得少为足

既得阿罗汉道。自谓灭度。资生艰难。得少为足。

14 卯二、合觉悟(3)

15 辰一、合诃责

一切智愿。犹在不失。今者世尊觉悟我等。作如是言。诸比丘。汝等所得。非究竟灭。

15 辰二、合示珠

我久令汝等种佛善根。以方便故。示涅槃相。而汝谓为实得灭度。

15 辰三、合劝贸

世尊。我今乃知实是菩萨。得受阿耨多罗三藐三菩提记。以是因缘。甚大欢喜。得未曾有。

10 癸二、偈颂(2)

11 子一、颂内心得解

尔时阿若憍陈如等。欲重宣此义而说偈言:

我等闻无上。安隐授记声。欢喜未曾有。礼无量智佛。

今于世尊前。自悔诸过咎。

11 子二、颂自陈领解(2)

12 丑一、颂法说

于无量佛宝。得少涅槃分。如无智愚人。便自以为足。

12 丑二、颂譬说(2)

13 寅一、颂立譬(2)

14 卯一、颂醉酒譬

譬如贫穷人。往至亲友家。其家甚大富。具设诸肴膳。

以无价宝珠。系着内衣里。默与而舍去。时卧不觉知。

是人既已起。游行诣他国。求衣食自济。资生甚艰难。

得少便为足。更不愿好者。不觉内衣里。有无价宝珠。

14 卯二、颂亲友觉悟譬

与珠之亲友。后见此贫人。苦切责之已。示以所系珠。

贫人见此珠。其心大欢喜。富有诸财物。五欲而自恣。

13 寅二、颂法合(2)

14 卯一、颂合醉酒

我等亦如是。世尊于长夜。常愍见教化。令种无上愿。

我等无智故。不觉亦不知。得少涅槃分。自足不求余。

14 卯二、颂合觉悟

今佛觉悟我。言非实灭度。得佛无上慧。尔乃为真灭。

我今从佛闻。授记庄严事。及转次授决。身心偏欢喜。

7 庚二、学无学品，授二千人记

8 辛一、请记

9 壬一、二人请(2)

10 癸一、默念请

尔时阿难。罗睺罗。而作是念。我等每自思惟。设得授记。不亦快乎。

10 癸二、发言请(2)

11 子一、引例

即从座起。到于佛前。头面礼足。俱白佛言。世尊。我等于此。亦应有分。唯有如来。我等所归。

11 子二、引望

又我等为一切世间天人阿修罗所见知识。阿难常为侍者。护持法藏。罗睺罗是佛之子。若佛见授阿耨多罗三藐三菩提记者。我愿既满。众望亦足。

9 壬二、二千人请

尔时学无学声闻弟子二千人。皆从座起。偏袒右肩。到于佛前。一心合掌。瞻仰世尊。如阿难罗睺罗所愿。住立一面。

8 辛二、授记(2)

9 壬一、记二人(2)

10 癸一、记阿难(5)

11 子一、长文

尔时佛告阿难。汝于来世。当得作佛。号山海慧自在通王如来。应供。正徧知。明行足。善逝。世间解。无上士。调御丈夫。天人师。佛。世尊（初明得果）。当供养六十二亿诸佛。护持法藏。然后得阿耨多罗三藐三菩提（二明行因）。教化二十千万亿恒河沙诸菩萨等。令成阿耨多罗三藐三菩提（三明说法度人）。国名常立胜幡。其土清静。琉璃为地。劫名妙音徧满（四明国劫名字）。其佛寿命。无量千万亿阿僧祇劫。若人于千万亿无量阿僧祇劫中。算数校计。不能得知（五明佛寿）。正法住世。倍于寿命。像法住世。复倍正法（六明法住）。阿难。是山海慧自在通王佛。为十方无量千万亿恒河沙等诸佛如来。所共赞叹。称其功德（七明诸佛称赞）。

11 子二、重颂

尔时世尊。欲重宣此义而说偈言：

我今僧中说。阿难持法者。当供养诸佛。然后成正觉。

号曰山海慧。自在通王佛。其国土清静。名常立胜幡。

教化诸菩萨。其数如恒沙。佛有大威德。名闻满十方。

寿命无有量。以愍众生故。正法倍寿命。像法复倍是。

如恒河沙等。无数诸众生。于此佛法中。种佛道因缘。

11 子三、新发意者生疑

尔时会中新发意菩萨八千人。咸作是念。我等尚不闻诸大菩萨得如是记。有何因缘。而诸声闻得如是决。

11 子四、如来释疑

尔时世尊知诸菩萨心之所念。而告之曰。诸善男子。我与阿难等。于空王佛所。同时发阿耨多罗三藐三菩提心。阿难常乐多闻。我常勤精进。是故我已得成阿耨多罗三藐三菩提。而阿难护持我法。亦护将来诸佛法藏。教化成就诸菩萨众。其本愿如是。故获斯记。

11 子五、阿难述叹

阿难面于佛前。自闻授记。及国土庄严。所愿具足。心大欢喜。得未曾有。实时忆念过去无量千万亿诸佛法藏。通达无碍。如今所闻。亦识本愿。尔时阿难而说偈言：

世尊甚希有。令我念过去。无量诸佛法。如今日所闻。

我今无复疑。安住于佛道。方便为侍者。护持诸佛法。

10 癸二、记罗睺罗(2)

11 子一、长文

尔时佛告罗睺罗。汝于来世。当得作佛。号蹈七宝华如来。应供。正徧知。明行足。善逝。世间解。无上士。调御丈夫。天人师。佛。世尊。当供养十世界微尘等数诸佛如来。常为诸佛而作长子。犹如如今也。是蹈七宝华佛。国土庄严。寿命劫数。所化弟子。正法像法。亦如山海慧自在通王如来无异。亦为此佛而作长子。过是已后。当得阿耨多罗三藐三菩提。

11 子二、重颂

尔时世尊。欲重宣此义而说偈言：

我为太子时。罗为长子。我今成佛道。受法为法子。

于未来世中。见无量亿佛。皆为其长子。一心求佛道。

罗睺罗密行。唯我能知之。现为我长子。以示诸众生。

无量亿千万。功德不可数。安住于佛法。以求无上道。

9 壬二、记二千人(3)

10 癸一、长文

尔时世尊。见学无学二千人。其意柔软。寂然清静。一心观佛。佛告阿难。汝见是学无学二千人不。唯然。已见。阿难。是诸人等。当供养五十世界微尘数诸佛如来。恭敬尊重。护持法藏。末后同时于十方国。各得成佛。皆同一号。名曰宝相如来。应供。正徧知。明行足。善逝。世间解。无上士。调御丈夫。天人师。佛。世尊。寿命一劫。国土庄严。声闻菩萨。正法像法。皆悉同等。

10 癸二、重颂

尔时世尊。欲重宣此义而说偈言：

是二千声闻。今于我前住。悉皆与授记。未来当成佛。

所供养诸佛。如上说尘数。护持其法藏。后当成正觉。

各于十方国。悉同一名号。俱时坐道场。以证无上慧。

皆名为宝相。国土及弟子。正法与像法。悉等无有异。

咸以诸神通。度十方众生。名闻普徧徧。渐入于涅槃。

10 癸三、得记欢喜

尔时学无学二千人。闻佛授记。欢喜踊跃。而说偈言。

世尊慧灯明。我闻授记音。心欢喜充满。如甘露见灌。

3 丙三、流通段(5)

4 丁一、法师品(2)

5 戊一、叹美能持法人(2)

6 己一、明稟道弟子功深福重(2)

7 庚一、佛世弟子

尔时世尊。因药王菩萨。告八万大士。药王。汝见是大众中。无量诸天。龙王夜叉。乾闥婆。阿修罗。迦楼罗。紧那罗。摩睺罗伽。人与非人。及比丘。比丘尼。优婆塞。优婆夷。求声闻者。求辟支佛者。求佛道者。如是等类。咸于佛前。闻妙法华经一偈一句。乃至一念随喜者。我皆与授记。当得阿耨多罗三藐三菩提。

7 庚二、灭后弟子

佛告药王。又如来灭度之后。若有人闻妙法华经。乃至一偈一句。一念随喜者。我亦与授阿耨多罗三藐三菩提记。

6 己二、明授道师功深福重(2)

7 庚一、长文(2)

8 辛一、别明(2)

9 壬一、明现世(2)

10 癸一、明下品师

若复有人。受持读诵。解说书写妙法华经。乃至一偈。于此经卷。敬视如佛。种种供养。华香。璎珞。末香。涂香。烧香。缽盖。幢幡。衣服。伎乐。乃至合掌恭敬。药王当知。是诸人等。已曾供养十万亿佛。于诸佛所成就大愿。愍众生故。生此人间。药王。若有人问。何等众生。于未来世当得作佛。应示是诸人等。于未来世。必得作佛。何以故。若善男子善女人。于法华经。乃至一句。受持读诵。解说书写。种种供养经卷。华香。璎珞。末香。涂香。烧香。缽盖。幢幡。衣服。伎乐。合掌恭敬。是人一切世间所应瞻奉。应以如来供养而供养之。当知此人是大菩萨。成就阿耨多罗三藐三菩提。哀愍众生。愿生此间。广演分别妙法华经。

10 癸二、明上品师

何况尽能受持。种种供养者。药王。当知是人自舍清净业报。于我灭度后。愍众生故。生于恶世。广演此经。

9 壬二、明来世(2)

10 癸一、明下品师

若是善男子。善女人。我灭度后。能窃为一人说法华经。乃至一句。当知是人。则如来使。如来所遣。行如来事。

10 癸二、明上品师

何况于大众中。广为人说。

8 辛二、总明

药王。若有恶人。以不善心。于一劫中。现于佛前。常毁骂佛。其罪尚轻。若人以一恶言。毁谤在家出家。读诵法华经者。其罪甚重。

7 庚二、偈颂(3)

8 辛一、奖劝自行利他

尔时世尊。欲重宣此义而说偈言：

若欲住佛道。成就自然智。常当勤供养。受持法华者。

其有欲疾得。一切种智慧。当受持是经。并供养持者。

8 辛二、重颂别总两义(2)

9 壬一、颂别明(2)

癸初、颂现世

- 若有能受持。妙法华经者。当知佛所使。愍念诸众生。
- 诸有能受持。妙法华经者。舍于清净土。愍众故生此。
- 当知如是人。自在所欲生。能于此恶世。广说无上法。
- 应以天华香。及天宝衣服。天上妙宝聚。供养说法者。

10 癸二、颂来世

吾灭后恶世。能持是经者。当合掌礼敬。如供养世尊。
上饌众甘美。及种种衣服。供养是佛子。冀得须臾闻。
若能于后世。受持是经者。我遣在人中。行于如来事。

9 壬二、颂总明

若于一劫中。常怀不善心。作色而骂佛。获无量重罪。
其有读诵持。是法华经者。须臾加恶言。其罪复过彼。
有人求佛道。而于一劫中。合掌在我前。以无数偈赞。
由是赞佛故。得无量功德。叹美持经者。其福复过彼。
于八十亿劫。以最妙色声。及与香味触。供养持经者。
如是供养已。若得须臾闻。则应自欣庆。我今获大利。

8 辛三、结叹经最第一

药王今告汝。我所说诸经。而于此经中。法华最第一。

5 戊二、叹美所持之法及示通经方轨(2)

6 己一、长文(2)

7 庚一、叹经法(5)

8 辛一、约法叹

尔时佛复告药王菩萨摩訶萨。我所说经典。无量千万亿。已说。今说。当说。而于其中。此法华经最为难信难解。药王。此经是诸佛秘要之藏。不可分布。妄授与人。诸佛世尊之所守护。从昔已来。未曾显说。而此经者。如来现在犹多怨嫉。况灭度后。

8 辛二、约人叹

药王。当知如来灭后。其能书持。读诵供养。为他人说者。如来则为以衣覆之。又为他方现在诸佛之所护念。是人有大信力。及志愿力。诸善根力。当知是人与如来共宿。则为如来手摩其头。

8 辛三、约处叹

药王。在在处处。若说若读。若诵若书。若经卷所住处。皆应起七宝塔。极令高广严饰。不须复安舍利。所以者何。此中已有如来全身。此塔应以一切华香。璎珞。缯盖。幢幡。伎乐。歌颂。供养。恭敬。尊重。赞叹。若有人得见此塔。礼拜供养。当知是等皆近阿耨多罗三藐三菩提。

8 辛四、约因叹

药王。多有人在家出家行菩萨道。若不能得见闻读诵。书持供养是法华经者。当知是人未善行菩萨道。若有得闻是经典者。乃能善行菩萨之道。

8 辛五、约果叹(5)

9 壬一、明近果

其有众生求佛道者。若见若闻是法华经。闻已信解受持者。当知是人得近阿耨多罗三藐三菩提。

9 壬二、立譬

药王。譬如有人。渴乏须水。于彼高原穿凿求之。犹见干土。知水尚远。施功不已。转见湿土。遂渐至泥。其心决定知水必近。

9 壬三、法合

菩萨亦复如是。若未闻未解。未能修习是法华经。当知是人去阿耨多罗三藐三菩提尚远。若得闻解。思惟修习。必知得近阿耨多罗三藐三菩提。

9 壬四、释近

所以者何。一切菩萨阿耨多罗三藐三菩提。皆属此经。此经开方便门。示真实相。是法华经藏。深固幽远。无人能到。今佛教化。成就菩萨。而为开示。

9 壬五、拣非

药王。若有菩萨。闻是法华经。惊疑怖畏。当知是为新发意菩萨。若声闻人。闻是经惊疑怖畏。当知是为增上慢者。

7 庚二、示方轨(2)

8 辛一、正明方法(3)

9 壬一、标章

药王。若有善男子。善女人。如来灭后。欲为四众说是法华经者。云何应说。是善男子。善女人。入如来室。着如来衣。坐如来座。尔乃应为四众广说斯经。

9 壬二、解释

如来室者。一切众生中大慈悲心是。如来衣者。柔和忍辱心是。如来座者。一切法空是。

9 壬三、劝修

安住是中。然后以不懈怠心。为诸菩萨及四众。广说是法华经。

8 辛二、明五利益

药王。我于余国。遣化人为其集听法众（一遣化人）。亦遣化比丘。比丘尼。优婆塞。优婆夷。听其说法。是诸化人。闻法信受。随顺不逆（二遣化四众）。若说法者在空闲处。我时广遣天龙鬼神。乾闥婆。阿修罗等。听其说法（三遣八部）。我虽在异国。时时令说法者得见我身（四见佛身）。若于此经忘失句逗。我还为说。令得具足（五与总持）。

6 己二、偈颂(3)

7 庚一、总劝

尔时世尊。欲重宣此义而说偈言：

欲舍诸懈怠。应当听此经。是经难得闻。信受者亦难。

7 庚二、颂长文(2)

8 辛一、但颂约果叹(2)

9 壬一、颂立譬

如人渴须水。穿凿于高原。犹见干燥土。知去水尚远。

渐见湿土泥。决定知近水。

9 壬二、颂法合

药王汝当知。如是诸人等。不闻法华经。去佛智甚远。

若闻是深经。决了声闻法。是诸经之王。闻已谛思惟。

当知此人等。近于佛智慧。

8 辛二、颂方轨(2)

9 壬一、颂正明方法

若人说此经。应入如来室。着于如来衣。而坐如来座。
处众无所畏。广为分别说。大慈悲为室。柔和忍辱衣。
诸法空为座。处此为说法。若说此经时。有人恶口骂。
加刀杖瓦石。念佛故应忍。

9 壬二、颂明五利益

我千万亿土。现净坚固身。于无量亿劫。为众生说法。
若我灭度后。能说此经者。我遣化四众。比丘比丘尼。
及清淨士女。供养于法师。引导诸众生。集之令听法。
若人欲加恶。刀杖及瓦石。则遣变化人。为之作衛护。
若说法之人。独在空闲处。寂寞无人声。读诵此经典。
我尔时为现。清淨光明身。若忘失章句。为说令通利。
若人具是德。或为四众说。空处读诵经。皆得见我身。
若人在空闲。我遣天龙王。夜叉鬼神等。为作听法众。
是人乐说法。分别无罣碍。诸佛护念故。能令大众喜。

7 庚三、结劝

若亲近法师。速得菩萨道。随顺是师学。得见恒沙佛。

4 丁二、宝塔品(2)

5 戊一、长文(3)

6 己一、明多宝涌现(6)

7 庚一、现塔之相

尔时佛前有七宝塔。高五百由旬。纵广二百五十由旬。从地涌出。住在空中。种种宝物而庄校之。五千栏楯。龕室千万。无数幢幡以为严饰。垂宝瓔珞。宝铃万亿而悬其上。四面皆出多摩罗跋栴檀之香。充徧世界。其诸幡盖。以金银琉璃。砗磲玛瑙。真珠玫瑰。七宝合成。高至四天王宫。

7 庚二、诸天供养

三十三天。雨天曼陀罗华。供养宝塔。余诸天龙夜叉。乾闥婆。阿修罗。迦楼罗。紧那罗。摩睺罗伽。人非人等千万亿众。以一切华香。瓔珞。幡盖。伎乐。供养宝塔。恭敬尊重赞叹。

7 庚三、多宝称叹

尔时宝塔中出大音声。叹言。善哉善哉。释迦牟尼世尊。能以平等大慧教菩萨法。佛所护念妙法华经为大众说。如是如是。释迦牟尼世尊。如所说者。皆是真实。

7 庚四、时众惊疑

尔时四众。见大宝塔住在空中。又闻塔中所出音声。皆得法喜。怪未曾有。从座而起。恭敬合掌。却住一面。

7 庚五、大乐说问

尔时四众。见大宝塔住在空中。又闻塔中所出音声。皆得法喜。怪未曾有。从座而起。恭敬合掌。却住一面。

7 庚六、如来答(3)

8 辛一、超答何故涌出

尔时佛告大乐说菩萨。此宝塔中。有如来全身。乃往过去。东方无量千万亿阿僧祇世界。国名宝净。彼中有佛。号曰多宝。其佛行菩萨道时。作大誓愿。若我成佛。灭度之后。于十方国土有说法华经处。我之塔庙为听是经故。涌现其前。为作证明。赞言善哉。

8 辛二、追答何因有塔

彼佛成道已。临灭度时。于天人大众中。告诸比丘。我灭度后。欲供养我全身者。应起一大塔。

8 辛三、答何故发是音声

其佛以神通愿力。十方世界在在处处。若有说法华经者。彼之宝塔皆涌出其前。全身在于塔中。赞言善哉善哉。大乐说。今多宝如来塔。闻说法华经故。从地涌出。赞言善哉善哉。

6 己二、明分身远集(7)

7 庚一、大乐说请见多宝

是时大乐说菩萨。以如来神力故。白佛言。世尊。我等愿欲见此佛身。

7 庚二、明应集分身

佛告大乐说菩萨摩訶萨。是多宝佛。有深重愿。若我宝塔。为听法华经故。出于诸佛前时。其有欲以我身示四众者。彼佛分身诸佛。在于十方世界说法。尽还集一处。然后我身乃出现耳。大乐说。我分身诸佛。在于十方世界说法者。今应当集。

7 庚三、大乐说请集

大乐说白佛言。世尊。我等亦愿欲见世尊分身诸佛。礼拜供养。

7 庚四、放光远召

尔时佛放白毫一光。即见东方五百万亿那由他恒河沙等国土诸佛。彼诸国土皆以颇梨为地。宝树宝衣以为庄严。无数千万亿菩萨充满其中。徧张宝幔。宝网罗上。彼国诸佛。以大妙音而说诸法。及见无量千万亿菩萨徧满诸国。为众说法。南西北方。四维上下。白毫相光所照之处。亦复如是。

7 庚五、诸佛同来

尔时十方诸佛。各告众菩萨言。善男子。我今应往娑婆世界释迦牟尼佛所。并供养多宝如来宝塔。

7 庚六、严净国界(3)

8 辛一、变娑婆

时娑婆世界。即变清静。琉璃为地。宝树庄严。黄金为绳。以界八道。无诸聚落。村营城邑。大海江河。山川林藪。烧大宝香。曼陀罗华徧布其地。以宝网幔罗覆其上。悬诸宝铃。唯留此会众。移诸天天人置于他土。是时诸佛。各将一大菩萨以为侍者。至娑婆世界。各到宝树下。——宝树高五百由旬。枝叶华果。次第庄严。诸宝树下。皆有师子之座。高五由旬。亦以大宝而校饰之。尔时诸佛。各于此座结跏趺坐。如是展转。徧满三千大千世界。而于释迦牟尼佛一方所分之身。犹故未尽。

8 辛二、变八方各二百万亿那由他

时释迦牟尼佛。欲容受所分身诸佛故。八方各更变二百万亿那由他国。皆令清静。无有地狱。饿鬼。畜生。及阿修罗。又移诸天天人置于他土。所化之国亦以琉璃为地。宝树庄严。树高五百由旬。枝叶华果次第严饰。树下皆有宝师子座。高五由旬。种种诸宝以为庄校。亦无大海江河。及目真邻陀山。摩诃目真邻陀山。铁围山。大铁围山。须弥山等诸山王。通为一佛国土。宝地平正。宝交露幔。徧覆其上。悬诸幡盖。烧大宝香。诸天宝华徧布其地。

8 辛三、更变八方各二百万亿那由他

释迦牟尼佛。为诸佛当来坐故。复于八方。各更变二百万亿那由他国。皆令清静。无有地狱。饿鬼畜生。及阿修罗。又移诸天天人置于他土。所化之国亦以琉璃为地。宝树庄严。树高五百由旬。枝叶华果次第庄严。树下皆有宝师子座。高五由旬。亦以大宝而校饰之。亦无大海江河。及目真邻陀山。摩诃目真邻陀山。铁围山。大铁围山。须弥山等诸山王。通为一佛国土。宝地平正。宝交露幔徧覆其上。

悬诸幡盖。烧大宝香。诸天宝华徧布其地。尔时东方释迦牟尼佛所分之身。百千万亿那由他恒河沙等国土中诸佛。各各说法。来集于此。如是次第。十方诸佛皆悉来集。坐于八方。尔时——方。四百万亿那由他国土。诸佛如来徧满其中。

7 庚七、与欲开塔(5)

8 辛一、诸佛问讯说欲

是时诸佛。各在宝树下。坐师子座。皆遣侍者问讯释迦牟尼佛。各赍宝华满掬而告之言。善男子。汝往诣耆闍崛山。释迦牟尼佛所。如我辞曰。少病少恼。气力安乐。及菩萨声闻众。悉安隐不。以此宝华散佛供养。而作是言。彼某甲佛。与欲开此宝塔。诸佛遣使。亦复如是。

8 辛二、释迦开塔

尔时释迦牟尼佛。见所分身佛悉已来集。各各坐于师子之座。皆闻诸佛与欲同开宝塔。即从座起。住虚空中。一切四众起立合掌。一心观佛。于是释迦牟尼佛。以右指开七宝塔户。出大音声。如却关钥。开大城门。

8 辛三、四众皆同见闻

实时一切众会。皆见多宝如来。于宝塔中坐师子座。全身不散。如入禅定。又闻其言。善哉善哉。释迦牟尼佛。快说是法华经。我为听是经故而来至此。尔时四众等。见过去无量千万亿劫灭度佛说如是言。叹未曾有。以天宝华聚。散多宝佛及释迦牟尼佛上。

8 辛四、二佛分座而坐

尔时多宝佛。于宝塔中分半座与释迦牟尼佛。而作是言。释迦牟尼佛可就此座。实时释迦牟尼佛。入其塔中。坐其半座。结跏趺坐。

8 辛五、四众请加处空

尔时大众。见二如来。在七宝塔中。师子座上结跏趺坐。各作是念。佛坐高远。惟愿如来以神通力。令我等辈俱处虚空。实时释迦牟尼佛。以神通力。接诸大众。皆在虚空。

6 己三、明释迦唱募

以大音声。普告四众。谁能于此娑婆国土。广说妙法华经。今正是时。如来不久当入涅槃。佛欲以此妙法华经。付嘱有在。

5 戊二、偈颂(3)

6 己一、颂多宝

尔时世尊。欲重宣此义而说偈言：

圣主世尊。虽久灭度。在宝塔中。尚为法来。

诸人云何。不勤为法。此佛灭度。无央数劫。

处处听法。以难遇故。彼佛本愿。我灭度后。

在在所往。常为听法。

6 己二、颂分身

又我分身。无量诸佛。如恒沙等。来欲听法。

及见灭度。多宝如来。各舍妙土。及弟子众。

天人龙神。诸供养事。令法久住。故来至此。

为坐诸佛。以神通力。移无量众。令国清静。

诸佛各各。诣宝树下。如清净池。莲华庄严。

其宝树下。诸师子座。佛坐其上。光明严饰。
如夜闇中。然大炬火。身出妙香。徧十方国。
众生蒙熏。喜不自胜。譬如大风。吹小树枝。
以是方便。令法久住。

6 己三、颂付嘱(2)

7 庚一、举三佛以劝流通(3)

8 辛一、募觅其人。

告诸大众。我灭度后。谁能护持。读说斯经。
今于佛前。自说誓言。

8 辛二、正举三佛以劝持经

其多宝佛。虽久灭度。以大誓愿。而师子吼。
多宝如来。及与我身。所集化佛。当知此意。
诸佛子等。谁能护法。当发大愿。令得久住。

8 辛三、释劝意

其有能护。此经法者。则为供养。我及多宝。
此多宝佛。处于宝塔。常游十方。为是经故。
亦复供养。诸来化佛。庄严光饰。诸世界者。
若说此经。则为见我。多宝如来。及诸化佛。

7 庚二、举难持之法以劝流通(2)

8 辛一、正举劝(3)

9 壬一、诫劝

诸善男子。各谛思惟。此为难事。宜发大愿。

9 壬二、正举难持以劝

诸余经典。数如恒沙。虽说此等。未足为难。
若接须弥。掷置他方。无数佛土。亦未为难。
若以足指。动大千界。远掷他国。亦未为难。
若立有顶。为众演说。无量余经。亦未为难。
若佛灭后。于恶世中。能说此经。是则为难。
假使有人。手把虚空。而以游行。亦未为难。
于我灭后。若自书持。若使人书。是则为难。
若以大地。置足甲上。升于梵天。亦未为难。
佛灭度后。于恶世中。暂读此经。是则为难。
假使劫烧。担负干草。入中不烧。亦未为难。
我灭度后。若持此经。为一人说。是则为难。
若持八万。四千法藏。十二部经。为人演说。
令诸听者。得六神通。虽能如是。亦未为难。

于我灭后。听受此经。问其义趣。是则为难。
若人说法。令千万亿。无量无数。恒沙众生。
得阿罗汉。具六神通。虽有是益。亦未为难。
于我灭后。若能奉持。如斯经典。是则为难。

9 壬三、释难持意

我为佛道。于无量土。从始至今。广说诸经。
而于其中。此经第一。若有能持。则持佛身。

8 辛二、释劝意(3)

9 壬一、重募持经之人

诸善男子。于我灭后。谁能受持。读诵此经。
今于佛前。自说誓言。

9 壬二、明能持难持则诸佛喜叹

此经难持。若暂持者。我则欢喜。诸佛亦然。
如是之人。诸佛所叹。

9 壬三、明即成自行化他胜行

是则勇猛。是则精进。是名持戒。行头陀者。
则为疾得。无上佛道。能于来世。读持此经。
是真佛子。住淳善地。佛灭度后。能解其义。
是诸天人。世间之眼。于恐惧世。能须臾说。
一切天人。皆应供养。

4 丁三、达多品(2)

5 戊一、明昔日达多通经，释迦成道(3)

6 己一、明往昔师弟持经之相(2)

7 庚一、长文(4)

8 辛一、明求法时节

尔时佛告诸菩萨。及天人四众。吾于过去无量劫中。求法华经。无有懈怠。

8 辛二、正明求法(2)

9 壬一、明发愿

于多劫中。常作国王。发愿求于无上菩提。心不退转。

9 壬二、明修行(2)

10 癸一、明欲满檀那，勤行布施

为欲满足六波罗蜜。勤行布施。心无惜。象马七珍。国城妻子。奴婢仆从。头目髓脑。身肉手足。不惜躯命。

10 癸二、明为满般若，勤求妙法

时世人民。寿命无量。为于法故。捐舍国位。委政太子。击鼓宣令。四方求法。谁能为我说大乘者。
吾当终身供给走使。

8 辛三、求得法师

时有仙人。来白王言。我有大乘。名妙法华经。若不违我。当为宣说。

8 辛四、受法奉行

王闻仙言。欢喜踊跃。即随仙人。供给所须。采果汲水。拾薪设食。乃至以身而为牀座。身心无倦。于时奉事。经于千岁。为于法故。精勤给侍。令无所乏。

7 庚二、偈颂(4)

8 辛一、颂时节及正求法

尔时世尊。欲重宣此义而说偈言：

我念过去劫。为求大法故。虽作世国王。不贪五欲乐。

椎钟告四方。谁有大法者。若为我解说。身当为奴仆。

8 辛二、颂求得法师

时有阿私仙。来白于大王。我有微妙法。世间所希有。

若能修行者。吾当为汝说。

8 辛三、颂受法奉行

时王闻仙言。心生大喜悦。即便随仙人。供给于所须。

采薪及果蓏。随时恭敬与。情存妙法故。身心无懈倦。

普为诸众生。勤求于大法。

8 辛四、结证劝信

亦不为己身。及以五欲乐。故为大国王。勤求获此法。

遂致得成佛。今故为汝说。

6 己二、结会古今(2)

7 庚一、正结会

佛告诸比丘。尔时王者。则我身是。时仙人者。今提婆达多是。

7 庚二、明师弟功报俱满(2)

8 辛一、明弟子圆因报满

由提婆达多善知识故。令我具足六波罗蜜。慈悲喜舍。三十二相。八十种好。紫磨金色。十力。四无所畏。四摄法。十八不共。神通道力。成等正觉。广度众生。皆因提婆达多善知识故。

8 辛二、明法师妙果当成(3)

9 壬一、明正果成

告诸四众。提婆达多。却后过无量劫。当得成佛。号曰天王如来。应供。正徧知。明行足。善逝。世间解。无上士。调御丈夫。天人师。佛。世尊。世界名天道。

9 壬二、明所化度

时天王佛。住世二十中劫。广为众生说于妙法。恒河沙众生得阿罗汉果。无量众生发缘觉心。恒河沙众生发无上道心。得无生忍。至不退转。

9 壬三、明灭后利益

时天王佛般涅槃后。正法住世二十中劫。全身舍利起七宝塔。高六十由旬。纵广四十由旬。诸天人民。悉以杂华。末香。烧香。涂香。衣服。瓔珞。幢幡。宝盖。伎乐。歌颂。礼拜。供养。七宝妙塔。无量众生得阿罗汉果。无量众生悟辟支佛。不可思议众生发菩提心。至不退转。

6 己三、劝信

佛告诸比丘。未来世中。若有善男子。善女人。闻妙法华经提婆达多品。净心信敬。不生疑惑者。不堕地狱。饿鬼畜生。生十方佛前。所生之处常闻此经。若生人天中。受胜妙乐。若在佛前。莲华化生。

5 戊二、明今日文殊通经，龙女作佛(2)

6 己一、明通经(4)

7 庚一、智积请退

于时下方多宝世尊所从菩萨。名曰智积。白多宝佛。当还本土。

7 庚二、释尊止之

释迦牟尼佛告智积曰。善男子。且待须臾。此有菩萨。名文殊师利。可与相见。论说妙法。可还本土。

7 庚三、文殊寻来

尔时文殊师利。坐千叶莲华。大如车轮。俱来菩萨。亦坐宝莲华。从于大海娑竭罗龙宫。自然涌出。住虚空中。诣灵鹫山。从莲华下。至于佛所。头面敬礼二世尊足。修敬已毕。往智积所。共相慰问。却坐一面。

7 庚四、智积问

智积菩萨问文殊师利。仁往龙宫。所化众生。其数几何。

7 庚五、文殊答(4)

8 辛一、答利益甚

文殊师利言。其数无量。不可称计。非口所宣。非心所测。且待须臾。自当证知。

8 辛二、蒙益者集证

所言未竟。无数菩萨坐宝莲华。从海涌出。诣灵鹫山。住在虚空。此诸菩萨。皆是文殊师利之所化度。具菩萨行。皆共论说六波罗蜜。本声闻人。在虚空中说声闻行。今皆修行大乘空义。

8 辛三、文殊结益

文殊师利谓智积曰。于海教化。其事如是。

8 辛四、智积偈赞

尔时智积菩萨以偈赞曰：

大智德勇健。化度无量众。今此诸大会。及我皆已见。

演畅实相义。开阐一乘法。广导诸众生。令速成菩提。

6 己二、明利益(9)

7 庚一、文殊自叙

文殊师利言：「我於海中，唯常宣說妙法華經。」

7 庚二、智积问

智积问文殊师利言。此经甚深微妙。诸经中宝。世所希有。颇有众生勤加精进。修行此经。速得佛不。

7 庚三、文殊答

文殊师利言。有娑竭罗龙王女。年始八岁。智慧利根。善知众生诸根行业。得陀罗尼。诸佛所说甚深秘藏。悉能受持。深入禅定。了达诸法。于刹那顷。发菩提心。得不退转。辩才无碍。慈念众生。犹如赤子。功德具足。心念口演。微妙广大。慈悲仁让。志意和雅。能至菩提。

7 庚四、智积执别教为疑

智积菩萨言。我见释迦如来。于无量劫。难行苦行。积功累德。求菩提道。未曾止息。观三千大千世界。乃至无有如芥子许。非是菩萨舍身命处。为众生故。然后乃得成菩提道。不信此女。于须臾顷。便成正觉。

7 庚五、龙女明圆释疑

言论未讫。时龙王女。忽现于前。头面礼敬。却住一面。以偈赞曰：

深达罪福相。徧照于十方。微妙净法身。具相三十二。

以八十种好。用庄严法身。天人所戴仰。龙神咸恭敬。

一切众生类。无不宗奉者。又闻成菩提。唯佛当证知。

我阐大乘教。度脱苦众生。

7 庚六、身子挟三藏权难

时舍利弗语龙女言。汝谓不久得无上道。是事难信。所以者何。女身垢秽。非是法器。云何能得无上菩提。佛道悬旷。经无量劫。勤苦积行。具修诸度。然后乃成。又女人身。犹有五障。一者不得作梵天王。二者帝释。三者魔王。四者转轮圣王。五者佛身。云何女身速得成佛。

7 庚七、龙女以一实除疑

尔时龙女有一宝珠。价值三千大千世界。持以上佛。佛即受之。龙女谓智积菩萨。尊者舍利弗言。我献宝珠。世尊纳受。是事疾不。答言。甚疾。女言。以汝神力观我成佛。复速于此。当时众会。皆见龙女。忽然之间。变成男子。具菩萨行。即往南方无垢世界。坐宝莲华。成等正觉。三十二相。八十种好。普为十方一切众生演说妙法。

7 庚八、时众闻见得益

尔时娑婆世界菩萨声闻。天龙八部。人与非人。皆遥见彼龙女成佛。普为时会人天说法。心大欢喜。悉遥敬礼。（彼土）无量众生。闻法解悟。得不退转。无量众生。得受道记。无垢世界。六反震动。娑婆世界。三千众生住不退地。三千众生发菩提心。而得受记。

7 庚九、智积、會眾默然信受

智积菩萨。及舍利弗。一切众会。默然信受。

4 丁四、持品(2)

5 戊一、明受持(3)

6 己一、二万菩萨奉命此土持经

尔时药王菩萨摩訶萨。及大乐说菩萨摩訶萨。与二万菩萨眷属俱。皆于佛前作是誓言。惟愿世尊不以为虑。我等于佛灭后。当奉持读诵。说此经典。后恶世众生。善根转少。多增上慢。贪利供养。增不善根。远离解脱。虽难可教化。我等当起大忍力。读诵此经。持说书写。种种供养。不惜身命。

6 己二、声闻发誓他国流通

尔时众中五百阿罗汉得受记者。白佛言。世尊。我等亦自誓愿。于异国土广说此经。复有学无学八千人得受记者。从座而起。合掌向佛。作是誓言。世尊。我等亦当于他国土广说此经。所以者何。是娑婆国中。人多弊恶。怀增上慢。功德浅薄。瞋浊谄曲。心不实故。

6 己三、诸尼请记(4)

7 庚一、记大爱道及六千尼

尔时佛姨母。摩诃波闍波提比丘尼。与学无学比丘尼六千人俱。从座而起。一心合掌。瞻仰尊颜。目不暂舍。于时世尊告憍昙弥。何故忧色而视如来。汝心将无谓我不说汝名。授阿耨多罗三藐三菩提记耶。憍昙弥。我先总说一切声闻皆已授记。今汝欲知记者。将来之世。当于六万八千亿诸佛法中为大法师。及六千学无学比丘尼。俱为法师。汝如是渐渐具菩萨道。当得作佛。号一切众生喜见如来。应供。正徧知。明行足。善逝。世间解。无上士。调御丈夫。天人师。佛。世尊。憍昙弥。是一切众生喜见佛。及六千菩萨。转次授记。得阿耨多罗三藐三菩提。

7 庚二、记耶输陀罗

尔时罗睺罗母。耶输陀罗比丘尼作是念。世尊于授记中。独不说我名。佛告耶输陀罗。汝于来世。百千万亿诸佛法中。修菩萨行。为大法师。渐具佛道。于善国中。当得作佛。号具足千万光相如来。应供。正徧知。明行足。善逝。世间解。无上士。调御丈夫。天人师。佛。世尊。佛寿无量阿僧祇劫。

7 庚三、诸尼领解

尔时摩诃波闍波提比丘尼。及耶输陀罗比丘尼。并其眷属。皆大欢喜。得未曾有。即于佛前而说偈言：

世尊导师。安隐天人。我等闻记。心安具足。

7 庚四、诸尼发愿

诸比丘尼说是偈已。白佛言。世尊。我等亦能于他方国土。广宣此经。

5 戊二、明劝持(2)

6 己一、长文(4)

7 庚一、佛眼视

尔时世尊。视八十万亿那由他诸菩萨摩訶萨。

7 庚二、菩萨请敕

是诸菩萨。皆是阿惟越致。转不退法轮。得诸陀罗尼。即从座起。至于佛前。一心合掌。而作是念。若世尊告敕我等持说此经者。当如佛教。广宣斯法。

7 庚三、念佛默然

复作是念。佛今默然。不见告敕。我当云何。

7 庚四、顺佛意发誓

时诸菩萨。敬顺佛意。并欲自满本愿。便于佛前作师子吼。而发誓言。世尊。我等于如来灭后。周旋往返十方世界。能令众生书写此经。受持读诵。解说其义。如法修行。正忆念。皆是佛之威力。惟愿世尊。在于他方遥见守护。

6 己二、偈颂(4)

7 庚一、明着衣宏经(3)

8 辛一、总论时节以明着衣

实时诸菩萨俱同发声。而说偈言：

惟愿不为虑。于佛灭度后。恐怖恶世中。我等当广说。

8 辛二、别明所忍之境(3)

9 壬一、通明邪人，即俗众也

有诸无智人。恶口骂詈等。及加刀杖者。我等皆当忍。

9 壬二、明道门增上慢者

恶世中比丘。邪智心谄曲。未得谓为得。我慢心充满。

9 壬三、明僭圣增上慢者

或有阿练若。纳衣在空闲。自谓行真道。（遂乃）轻贱（在）人间（宏法华）者。

（彼为）贪着利养故。（诳妄）与白衣说（相似）法。为世（间无知人之）所恭敬。（外现威仪犹如六通罗汉。

（然而）是人（虽居阿练若。实）怀恶心。常念世俗（名利之）事。（但是）假名阿练若（耳）。（彼徧）好出我等（宏通大乘人之）过。

而作如是（谤）言。此诸比丘等。为贪利养故。说外道论议。

自作此经典。诳惑世间人。为求名闻故。分别于是经。

（彼等）常在大众（之）中。欲毁我等（宏法华人）故。向国王大臣。婆罗门居士。

及余比丘众。诽谤说我恶。谓是邪见人。说外道论义。

8 辛三、明着衣意

我等敬佛故。悉忍是诸恶。（虽）为斯（人之）所轻言。汝等（自作此经悉）皆是佛。

（然于）如此轻慢（之）言。皆当忍受之。（又）浊劫恶世中。多有诸恐怖。

恶鬼入其身。骂詈毁辱我。我等敬信佛。当着忍辱铠。

为说是经故。忍此诸难事。我不爱身命。但惜无上道。

我等于来世。护持佛所嘱。世尊自当知。浊世恶比丘。

不知佛方便。随宜所说法。恶口而鬻鬻。数数见摈出。

远离于塔寺。如是等众恶。念佛告敕故。皆当忍是事。

7 庚二、明入室宏经

诸聚落城邑。其有求法者。我皆到其所。说佛所嘱法。

7 庚三、明坐座宏经

我是世尊使。处众无所畏。我当善说法。愿佛安隐住。

7 庚四、总结请知

我于世尊前。诸来十方佛。发如是誓言。佛自知我心。

4 丁五、安乐行品(2)

5 戊一、问(2)

6 己一、叹前品深行菩萨能如法宏经

尔时文殊师利法王子菩萨摩訶萨白佛言。世尊。是诸菩萨甚为难有。敬顺佛故。发大誓愿。于后恶世。护持读说是法华经。

6 己二、问始行菩萨云何恶世宏经

世尊。菩萨摩訶萨。于后恶世。云何能说是经。

5 戊二、答(3)

6 己一、总标章

佛告文殊师利。若菩萨摩訶萨。于后恶世欲说是经。当安住四法。

6 己二、解释修行方法(4)

7 庚一、身安乐行(2)

8 辛一、长文(2)

9 壬一、标

一者安住菩萨行处。亲近处。能为众生演说是经。

9 壬二、释(2)

10 癸一、释行处

文殊师利。云何名菩萨摩訶萨行处。若菩萨摩訶萨。住忍辱地。柔和善顺。而不卒暴。心亦不惊。又复于法无所行。而观诸法如实相。亦不行不分别。是名菩萨摩訶萨行处。

10 癸二、释亲近处(3)

11 子一、约远论近(9)

12 丑一、豪势

云何名菩萨摩訶萨亲近处。菩萨摩訶萨。不亲近国王王子。大臣官长。

12 丑二、远邪人邪法

不亲近诸外道梵志。尼犍子等。及造世俗文笔。赞咏外书。及路伽耶陀。逆路伽耶陀者。

12 [丑三、远凶险戏](#)

亦不亲近诸有凶戏。相掬相扑。及那罗等。种种变现之戏。

12 [丑四、远旃陀罗](#)

又不亲近旃陀罗。及畜猪羊鸡狗。畋猎渔捕。诸恶律仪。如是人等或时来者。则为说法。无所希望。

12 [丑五、远二乘众](#)

又不亲近求声闻。比丘比丘尼。优婆塞优婆夷。亦不问讯。若于房中。若经行处。若在讲堂中。不共住止。或时来者。随宜说法。无所希求。

12 [丑六、远欲想](#)

文殊师利。又菩萨摩訶萨。不应于女人身。取能生欲想相而为说法。亦不乐见。若入他家。不与小女处女。寡女等共语。

12 [丑七、远不男](#)

亦复不近五种不男之人。以为亲厚。

12 [丑八、远危害](#)

不独入他家。若有因缘须独入时。但一心念佛。

12 [丑九、远讥嫌](#)

若为女人说法。不露齿笑。不现胸臆。乃至为法。犹不亲厚。况复余事。

12 [丑十、远畜养](#)

不乐畜年少弟子。沙弥小儿。亦不乐与同师。

11 [子二、约近论近](#)

常好坐禅。在于闲处。修摄其心。文殊师利。是名初亲近处。

11 [子三、约非远非近论近\(3\)](#)

12 [丑一、总标境智](#)

复次菩萨摩訶萨。观一切法空。

12 [丑二、别释](#)

如实相。不颠倒。不动。不退。不转。如虚空。无所有性。一切语言道断。不生。不出。不起。无名。无相。实无所有。无量。无边。无碍。无障。

12 [丑三、结成](#)

但以因缘有。从颠倒生。故说。常乐观如是法相。是名菩萨摩訶萨第二亲近处。

8 [辛二、偈颂\(3\)](#)

9 [壬一、颂标](#)

尔时世尊。欲重宣此义而说偈言：

若有菩萨。于后恶世。无怖畏心。欲说是经。

应入行处。及亲近处。

9 [壬二、颂释\(2\)](#)

10 [癸一、颂约远论近](#)

常离国王。及国王子。大臣官长（一）。凶险戏者（三）。

及旃陀罗（四）。外道梵志（二）。亦不亲近。增上慢人。

贪着小乘。三藏学者。破戒比丘。名字罗汉。

及比丘尼。好戏笑者。深着五欲。求现灭度。

诸优婆夷。皆勿亲近。若是人等。以好心来。
到菩萨所。为闻佛道。菩萨则以。无所畏心。
不怀希望。而为说法（五兼第十）。寡女处女。及诸不男。
皆勿亲近。以为亲厚（六七）。亦莫亲近。屠儿魁脍。
畋猎渔捕。为利杀害。贩肉自活。衒卖女色。
如是之人。皆勿亲近（又四）。凶险相扑。种种嬉戏。
诸婬女等。尽勿亲近（又三又六）。莫独屏处。为女说法。
若说法时。无得戏笑（九）。入里乞食。将一比丘。
若无比丘。一心念佛（八）。是则名为。行处近处。
以此二处。能安乐说。

10 癸二、颂非远非近

又复不行。上中下法。有为无为。实不实法。
亦不分别。是男是女。不得诸法。不知不见。
是则名为。菩萨行处。一切诸法。空无所有。
无有常住。亦无起灭。是名智者。所亲近处。
颠倒分别。诸法有无。是实非实。是生非生。
在于闲处。修摄其心。安住不动。如须弥山。
观一切法。皆无所有。犹如虚空。无有坚固。
不生不出。不动不退。常住一相。是名近处。

9 壬三、明行成(3)

10 癸一、标行成

若有比丘。于我灭后。入是行处。及亲近处。
说斯经时。无有怯弱。

10 癸二、释行成而得安乐

菩萨有时。入于静室。以正忆念。随义观法。
从禅定起。为诸国王。王子臣民。婆罗门等。
开化演畅。说斯经典。其心安隐。无有怯弱。

10 癸三、颂总结

文殊师利。是名菩萨。安住初法。能于后世。说法华经。

7 庚二、口安乐行(2)

8 辛一、长文(2)

9 壬一、标

又文殊师利。如来灭后。于末法中。欲说是经。应住安乐行。

9 壬二、释(2)

10 癸一、止行(4)

11 子一、不说过

若口宣说。若读经时。不乐说人。及经典过。

11 子二、不轻慢

亦不轻慢诸余法师。

11 子三、不叹毁

不说他人好恶长短。于声闻人。亦不称名说其过恶。亦不称名赞叹其美。

11 子四、不怨嫌

又亦不生怨嫌之心。

10 癸二、观行

善修如是安乐心故。诸有听者不逆其意。有所难问。不以小乘法答。但以大乘而为解说。令得一切种智。

8 辛二、偈颂(3)

9 壬一、颂标

尔时世尊。欲重宣此义而说偈言：

菩萨常乐。安隐说法。于清净地。而施牀座。

以油涂身。澡浴尘秽。着新净衣。内外俱净。

9 壬二、颂释(2)

10 癸一、颂止行(4)

11 子一、颂二不轻慢

安处法座。随问为说。

慢则不随。随即不轻慢意。

11 子二、颂三不叹毁

若有比丘。及比丘尼。诸优婆塞。及优婆夷。

国王王子。群臣士民。以微妙义。和颜为说。

若有难问。随义而答。

11 子三、颂初不说过

因缘譬喻。敷演分别。以是方便。皆使发心。

渐渐增益。入于佛道。

11 子四、颂四不怨嫌

除懒惰意。及懈怠想。离诸忧恼。慈心说法。

10 癸二、颂观行

昼夜常说。无上道教。以诸因缘。无量譬喻。

开示众生。咸令欢喜。衣服卧具。饮食医药。

而于其中。无所希望。但一心念。说法因缘。

愿成佛道。令众亦尔。是则大利。安乐供养。

9 壬三、明行成(4)

10 癸一、标行成

我灭度后。若有比丘。能演说斯。妙法华经。

10 癸二、明内无过，则外难不生

心无嫉恚。诸恼障碍。亦无忧愁。及骂詈者。

又无怖畏。加刀杖等。亦无摈出。安住忍故。

10 癸三、明内有善法，所以行成

智者如是。善修其心。能住安乐。如我上说。

若内无过。如长文中说。若内有善。如偈中说也。

10 癸四、格量功德

其人功德。千万亿劫。算数譬喻。说不能尽。

7 庚三、意安乐行(2)

8 辛一、长文(3)

9 壬一、标

又文殊师利。菩萨摩訶萨。于后末世法欲灭时。受持读诵斯经典者。

9 壬二、释(2)

10 癸一、止行(4)

11 子一、不嫉诳

无怀嫉妬谄诳之心。

11 子二、不轻骂

亦勿轻骂学佛道者。求其长短。

11 子三、不恼乱

若比丘。比丘尼。优婆塞。优婆夷。求声闻者。求辟支佛者。求菩萨道者。无得恼之。令其疑悔。语其人言。汝等去道甚远。终不能得一切种智。所以者何。汝是放逸之人。于道懈怠故。

11 子四、不净竞

又亦不应戏论诸法。有所净竞。

10 癸二、观行(4)

11 子一、大悲想，治嫉诳。

当于一切众生。起大悲想。

11 子二、慈父想，治轻骂

于诸如来。起慈父想。

11 子三、大师想，治恼乱

于诸菩萨。起大师想。于十方诸大菩萨。常应深心恭敬礼拜。

11 子四、平等说法，治净竞

于一切众生。平等说法。以顺法故。不多不少。乃至深爱法者。亦不为多说。

9 壬三、结行成

文殊师利。是菩萨摩訶萨。于后末世法欲灭时。有成就是第三安乐行者。说是法时。无能恼乱。得好同学。共读诵是经。亦得大众而来听受。听已能持。持已能诵。诵已能说。说已能书。若使人书。供养经卷。恭敬尊重赞叹。

8 辛二、偈颂(2)

9 壬一、颂释(2)

10 癸一、颂止行

尔时世尊。欲重宣此义而说偈言：

若欲说是经。当舍嫉恚慢。谄诳邪伪心。常修质直行。

不轻蔑于人。亦不戏论法。不令他疑悔。云汝不得佛。

10 癸二、颂观行

是佛子说法。常柔和能忍。慈悲于一切。不生懈怠心。

十方大菩萨。愍众故行道。应生恭敬心。是则我大师。

于诸佛世尊。生无上父想。破于憍慢心。说法无障碍。

9 壬二、颂行成

第三法如是。智者应守护。一心安乐行。无量众所敬。

7 庚四、誓愿安乐行(2)

8 辛一、长文(2)

9 壬一、明行法(3)

10 癸一、标

又文殊师利。菩萨摩訶萨。于后末世。法欲灭时。有持是法华经者。

10 癸二、释(3)

11 子一、明誓愿所缘之境

于在家出家人中。生大慈心。于非菩萨人中。生大悲心。

11 子二、明起誓愿之由

应作是念。如是之人。则为大失。如来方便随宜说法。不闻不知。不觉不问。不信不解。

11 子三、正立誓愿

其人虽不问不信不解是经。我得阿耨多罗三藐三菩提时。随在何地。以神通力。智慧力。引之令得住是法中。

10 癸三、结行成(2)

11 子一、明离过

文殊师利。是菩萨摩訶萨。于如来灭后。有成就此第四法者。说是法时。无有过失。

11 子二、明利益(2)

12 丑一、正明

常为比丘。比丘尼。优婆塞。优婆夷。国王王子。大臣人民。婆罗门居士等。供养恭敬。尊重赞叹。虚空诸天为听法故。亦常随侍。若在聚落城邑。空闲林中。有人来欲难问者。诸天昼夜常为法故。而卫护之。能令听者皆得欢喜。

12 丑二、释结

所以者何。此经是一切过去未来现在诸佛神力所护故。

9 壬二、叹经(2)

10 癸一、就法略叹

文殊师利。是法华经。于无量国中。乃至名字不可得闻。何况得见。受持读诵。

10 癸二、约譬广叹(2)

11 子一、不与珠譬(2)

12 丑一、立譬(5)

13 寅一、威伏诸国

文殊师利。譬如强力转轮圣王。欲以威势降伏诸国。

13 寅二、小王不顺

而诸小王。不顺其命。

13 寅三、起兵讨伐

时转轮王。起种种兵而往讨伐。

13 寅四、有功喜赐

王见兵众战有功者。即大欢喜。随功赏赐。或与田宅。聚落城邑。或与衣服。严身之具。或与种种珍宝。金银琉璃。砗磲玛瑙。珊瑚琥珀。象马车乘。奴婢人民。

13 寅五、惟不与珠

唯髻中明珠。不以与之。所以者何。独王顶上有此一珠。若以与之。王诸眷属必大惊怪。

12 丑二、法合(5)

13 寅一、合威伏诸国

文殊师利。如来亦复如是。以禅定智慧力。得法国土。王于三界。

13 寅二、合小王不顺

而诸魔王。不肯顺伏。

13 寅三、合起兵讨伐

如来贤圣诸将。与之共战。

13 寅四、合有功喜赐

其有功者。心亦欢喜。于四众中。为说诸经。令其心悦。赐以禅定解脱。无漏根力。诸法之财。又复赐与涅槃之城。言得灭度。引导其心。令皆欢喜。

13 寅五、合唯不与珠

而不为说是法华经。

11 子二、与珠譬(2)

12 丑一、立譬

文殊师利。如转轮王。见诸兵众有大功者。心甚欢喜。以此难信之珠。久在髻中。不妄与人。而今与之。

12 丑二、法合

如来亦复如是。于三界中。为大法王。以法教化一切众生。见贤圣军。与五阴魔。烦恼魔。死魔共战。有大功勋。灭三毒。出三界。破魔网。尔时如来亦大欢喜。此法华经。能令众生至一切智。一切世间多怨难信。先所未说。而今说之。文殊师利。此法华经。是诸如来第一之说。于诸说中最为甚深。末后赐与。如彼强力之王。久护明珠。今乃与之。文殊师利。此法华经。诸佛如来秘密之藏。于诸经中最在其上。长夜守护。不妄宣说。始于今日。乃与汝等。而敷演之。

8 辛二、偈颂(2)

9 壬一、颂行法(2)

10 癸一、超颂行成

尔时世尊。欲重宣此义而说偈言：

常行忍辱。哀愍一切。乃能演说。佛所赞经。

10 癸二、追颂行(3)

11 子一、颂誓愿所缘之境

后末世时。持此经者。于家出家。及非菩萨。应生慈悲。

11 子二、颂起誓愿之由

斯等不闻。不信是经。则为大失。

11 子三、颂正立誓愿

我得佛道。以诸方便。为说此法。令住其中。

9 壬二、颂叹经

10 癸一、总颂两譬

譬如强力。转轮之王。兵战有功。赏赐诸物。

象马车乘。严身之具。及诸田宅。聚落城邑。

或与衣服。种种珍宝。奴婢财物。欢喜赐与。

如有勇健。能为难事。王解髻中。明珠赐之。

10 癸二、总颂两合也

如来亦尔。为诸法王。忍辱大力。智慧宝藏。

以大慈悲。如法化世。见一切人。受诸苦恼。

欲求解脱。与诸魔战。为是众生。说种种法。

以大方便。说此诸经。既知众生。得其力已。
末后乃为。说是法华。如王解髻。明珠与之。
此经为尊。众经中上。我常守护。不妄开示。
今正是时。为汝等说。

6 己三、总明行成之相(3)

7 庚一、结劝四行

应当亲近。如是四法。

7 庚二、举三报以劝(3)

8 辛一、报障转，转现报

读是经者。常无忧恼。又无病痛。颜色鲜白。

8 辛二、业障转，转生报

不生贫穷。卑贱丑陋。

8 辛三、烦恼障转，转后报(2)

9 壬一、别明三烦恼障转(3)

10 癸一、贪障转

众生乐见。如慕贤圣。天诸童子。以为给使。

10 癸二、瞋障转

刀杖不加。毒不能害。若人恶骂。口则闭塞。

游行无畏。如师子王。

10 癸三、痴障转

智慧光明。如日之照。

9 壬二、总明一切烦恼障转(4)

10 癸一、梦入十信相似位

若于梦中。但见妙事。见诸如来。坐师子座。

诸比丘众。围绕说法。又见龙神。阿修罗等。

数如恒沙。恭敬合掌。自见其身。而为说法。

10 癸二、梦入初住见道位

又见诸佛。身相金色。放无量光。照于一切。

以梵音声。演说诸法。佛为四众。说无上法。

见身处中。合掌赞佛。闻法欢喜。而为供养。

得陀罗尼。证不退智。佛知其心。深入佛道。

即为授记。成最正觉。汝善男子。当于来世。

得无量智。佛之大道。国土严净。广大无比。

亦有四众。合掌听法。

10 癸三、梦入住行向地修道位

又见自身。在山林中。修习善法。证诸实相。

深入禅定。见十方佛。

10 癸四、梦入妙觉究竟位

诸佛身金色。百福相庄严。闻法为人说。常有是好梦。

又梦作国王。舍宫殿眷属。及上妙五欲。行诣于道场。
在菩提树下。而处师子座。求道过七日。得诸佛之智。
成无上道已。起而转法轮。为四众说法。经千万亿劫。
说无漏妙法。度无量众生。后当入涅槃。如烟尽灯灭。

7 庚三、总结

若后恶世中。说是第一法。是人得大利。如上诸功德。

2 乙二、本门开近显远(3)

3 丙一、序段(2)

4 丁一、涌出(3)

5 戊一、他方菩萨请宏经

尔时他方国土诸来菩萨摩訶萨。过八恒河沙数。于大众中起。合掌作礼而白佛言。世尊。若听我等于佛灭后。在此娑婆世界勤加精进。护持读诵。书写供养是经典者。当于此土而广说之。

5 戊二、如来不许

尔时佛告诸菩萨摩訶萨众。止。善男子。不须汝等护持此经。所以者何。我娑婆世界。自有六万恒河沙等菩萨摩訶萨。一一菩萨各有六万恒河沙眷属。是诸人等。能于我灭后。护持读诵。广说此经。

5 戊三、下方涌出(2)

6 己一、经家叙相(5)

7 庚一、涌出

佛说是时。娑婆世界三千大千国土。地皆震裂。而于其中。有无量千万亿菩萨摩訶萨。同时涌出。

7 庚二、身相

是诸菩萨。身皆金色。三十二相。无量光明。

7 庚三、住处

先尽在此娑婆世界之下。此界虚空中住。

7 庚四、闻命

是诸菩萨。闻释迦牟尼佛所说音声。从下发来。

7 庚五、眷属

一一菩萨。皆是大众唱导之首。各将六万恒河沙眷属。况将五万。四万。三万。二万。一万恒河沙等眷属者（其数转多）。况复乃至一恒河沙。半恒河沙。四分之一。乃至千万亿那由他分之一（其数转多）。况复千万亿那由他眷属（其数转多）。况复亿万眷属（其数转多）。况复千万。百万。乃至一万（其数展转倍多）。况复一千。一百。乃至一十（其数展转倍多）。况复将五。四。三。二。一弟子者（其数展转倍多）。况复单己。乐远离行（其数展转倍多）。如是等比。无量无边。算数譬喻所不能知。

6 己二、明问讯(5)

7 庚一、三业供养(3)

8 辛一、正明供养

是诸菩萨从地出已。各诣虚空七宝妙塔。多宝如来。释迦牟尼佛所。到已。向二世尊头面礼足。及至诸宝树下师子座上佛所。亦皆作礼。右遶三匝。合掌恭敬。以诸菩萨种种赞法。而以赞叹。住在一面。欣乐瞻仰于二世尊。

8 辛二、明所经时节

是诸菩萨摩诃萨。从初涌出。以诸菩萨种种赞法而赞于佛。如是时间。经五十小劫。是时释迦牟尼佛。默然而坐。及诸四众亦皆默然。

8 辛三、明佛神力加持

五十小劫。佛神力故。令诸大众谓如半日。尔时四众。亦以佛神力故。见诸菩萨徧满无量百千万亿国土虚空。

7 庚二、陈问讯之辞

是菩萨众中。有四导师。一名上行。二名无边行。三名净行。四名安立行。是四菩萨于其众中。最为上首唱导之师。在大众前。各共合掌。观释迦牟尼佛而问讯言。世尊。少病少恼。安乐行不。所应度者。受教易不。不令世尊生疲劳耶。尔时四大菩萨而说偈言：

世尊安乐。少病少恼。教化众生。得无疲倦。

又诸众生。受化易不。不令世尊。生疲劳耶。

7 庚三、佛答安乐

尔时世尊。于菩萨大众中而作是言。如是如是。诸善男子。如来安乐。少病少恼。诸众生等。易可化度。无有疲劳。所以者何。是诸众生。世世已来。常受我化。亦于过去诸佛。恭敬尊重。种诸善根。此诸众生。始见我身。闻我所说。即皆信受。入如来慧。除先修习学小乘者。如是之人。我今亦令得闻是经。入于佛慧。

7 庚四、偈颂随喜

尔时诸大菩萨而说偈言：

善哉善哉。大雄世尊。诸众生等。易可化度。

能问诸佛。甚深智慧。闻已信行。我等随喜。

7 庚五、如来述叹

于时世尊。赞叹上首诸大菩萨。善哉善哉。善男子。汝等能于如来发随喜心。

4 丁二、疑问(2)

5 戊一、此土菩萨疑问(2)

6 己一、长文叙疑念

尔时弥勒菩萨。及八千恒河沙诸菩萨众。皆作是念。我等从昔已来。不见不闻如是大菩萨摩诃萨众。从地涌出。住世尊前。合掌供养。问讯如来。

6 己二、偈颂正发问(4)

7 庚一、问来处来缘至庚四结请决疑

时弥勒菩萨摩诃萨。知八千恒河沙诸菩萨等。心之所念。并欲自决所疑。合掌向佛。以偈问曰：

无量千万亿。大众诸菩萨。昔所未曾见。愿两足尊说。

是从何所来。以何因缘集。巨身大神通。智慧叵思议。

其志念坚固。有大忍辱力。众生所乐见。为从何所来。

7 庚二、叙眷属数量

——诸菩萨。所将诸眷属。其数无有量。如恒河沙等。或有六万恒沙。如是诸大众。一心求佛道。是诸大师等。六万恒河沙。俱来供养佛。及护持是经。将五万恒沙。其数过于是。四万及三万。二万至一万。一千一百等。乃至一恒沙。半及三四分。亿万分之一。千万那由他。万亿诸弟子。乃至半亿。其数复过上。百万至一万。一千及一百。五十与一十。乃至三二一。单己无眷属。乐于独处者。俱来至佛所。其数转过上。如是诸大众。若人行筹数。过于恒沙劫。犹不能尽知。

7 庚三、问师法是谁

是诸大威德。精进菩萨众。谁为其说法。教化而成就。从谁初发心。称扬何佛法。受持行谁经。修习何佛道。

7 庚四、结请决疑(4)

8 辛一、结叹

如是诸菩萨。神通大智力。

8 辛二、请答来处

四方地震裂。皆从中涌出。世尊我昔来。未曾见是事。愿说其所从。国土之名号。我常游诸国。未曾见是众。我于此众中。乃不识一人。

8 辛三、请答来缘

忽然从地出。愿说其因缘。

8 辛四、明大会同请

今此之大会。无量百千亿。是诸菩萨等。皆欲知此事。是诸菩萨众。本末之因缘。无量德世尊。唯愿决众疑。

5 戊二、他土菩萨疑问

尔时释迦牟尼分身诸佛。从无量千万亿他方国土来者。在于八方诸宝树下。师子座上结跏趺坐。其佛侍者。各各见是菩萨大众。于三千大千世界四方。从地涌出。住于虚空。各白其佛言。世尊。此诸无量无边阿僧祇菩萨大众。从何所来。尔时诸佛各告侍者。诸善男子。且待须臾。有菩萨摩訶萨。名曰弥勒。释迦牟尼佛之所授记。次后作佛。已问斯事。佛今答之。汝等自当因是得闻。

3 丙二、正说段(2)

4 丁一、诚许(2)

5 戊一、长文(3)

6 己一、述叹

尔时释迦牟尼佛。告弥勒菩萨。善哉善哉。阿逸多。乃能问佛如是大事。

6 己二、诫

汝等当共一心。被精进铠。发坚固意。

6 己三、许

如来今欲显发宣示诸佛智慧。诸佛自在神通之力。诸佛师子奋迅之力。诸佛威猛大势之力。

5 戊二、偈颂(2)

6 己一、颂诫

尔时世尊。欲重宣此义而说偈言：

当精进一心。我欲说此事。勿得有疑悔。

6 己二、颂许

佛智叵思议。

汝今出信力。住于忍善中。昔所未闻法。今皆当得闻。

我今安慰汝。勿得怀疑惧。佛无不实语。智慧不可量。

所得第一法。甚深叵分别。如是今当说。汝等一心听。

4 丁二、正说(3)

5 戊一、从此论寿量品，是正开近显远(2)

6 己一、论此品，是略开显动执生疑(2)

7 庚一、略开(2)

8 辛一、长文(2)

9 壬一、答所师

尔时世尊说此偈已。告弥勒菩萨。我今于此大众。宣告汝等。阿逸多。是诸大菩萨摩訶萨。无量无数阿僧祇。从地涌出。汝等昔所未见者。我于是娑婆世界。得阿耨多罗三藐三菩提已。教化示导是诸菩萨。调伏其心。令发道意。

9 壬二、答来处(2)

10 癸一、答

此诸菩萨。皆于是娑婆世界之下。此界虚空中住。于诸经典。读诵通利。思惟分别。正忆念。

10 癸二、释(2)

11 子一、释住处

阿逸多。是诸善男子等。不乐在众。多有所说。常乐静处。勤行精进。未曾休息。亦不依止人天而住。

11 子二、释称扬受持修习

常乐深智。无有障碍。亦常乐于诸佛之法。一心精进。求无上慧。

8 辛二、偈颂(2)

9 壬一、颂长文

10 癸一、颂答所师

尔时世尊。欲重宣此义而说偈言：

阿逸汝当知。是诸大菩萨。从无数劫来。修习佛智慧。

悉是我所化。令发大道心。此等是我子。

10 癸二、颂答来处

依止是世界。常行头陀事。志乐于静处。舍大众喧闹。

不乐多所说。如是诸子等。学习我道法。昼夜常精进。

为求佛道故。在娑婆世界。下方空中住。志念力坚固。

常勤求智慧。说种种妙法。其心无所畏。

9 [壬二、正略开显](#)

我于伽耶城。菩提树下坐。得成最正觉。转无上法轮。

尔乃教化之。令初发道心。今皆住不退。悉当得成佛。

我今说实语。汝等一心信。我从久远来。教化是等众。

7 [庚二、疑请\(2\)](#)

8 [辛一、长文\(2\)](#)

9 [壬一、经家叙疑](#)

尔时弥勒菩萨摩訶萨。及无数诸菩萨等。心生疑惑。怪未曾有。而作是念。云何世尊于少时间。教化如是无量无边阿僧祇诸大菩萨。令住阿耨多罗三藐三菩提。

9 [壬二、腾疑请答\(3\)](#)

10 [癸一、腾疑\(3\)](#)

11 [子一、法说\(3\)](#)

12 [丑一、执近疑远](#)

即白佛言。世尊。如来为太子时。出于释宫。去伽耶城不远。坐于道场。得成阿耨多罗三藐三菩提。从是已来。始过四十余年。世尊。云何于此少时。大作佛事。以佛势力。以佛功德。教化如是无量大菩萨众。当成阿耨多罗三藐三菩提。

12 [丑二、执远疑近](#)

世尊。此大菩萨众。假使有人。于千万亿劫。数不能尽。不得其边。斯等久远已来。于无量无边诸佛所。植诸善根。成就菩萨道。常修梵行。

12 [丑三、结难信](#)

世尊。如此之事。世所难信。

11 [子二、立譬](#)

譬如有人。色美发黑。年二十五。指百岁人。言是我子。

其百岁人。亦指年少。言是我父。生育我等。是事难信。

11 [子三、法合](#)

佛亦如是。得道已来。其实未久。而此大众诸菩萨等。已于无量千万亿劫。为佛道故。勤行精进。善入出住无量百千万亿三昧。得大神通。久修梵行。善能次第习诸善法。巧于问答。人中之宝。一切世间甚为希有。

10 [癸二、请答\(2\)](#)

11 [子一、明请意\(2\)](#)

12 [丑一、为现在](#)

我等虽复信佛随宜所说。佛所出言。未曾虚妄。佛所知者。皆悉通达。

12 [丑二、为未来](#)

然诸新发意菩萨。于佛灭后。若闻是语。或不信受。而起破法罪业因缘。

11 [子二、正请答](#)

唯然世尊。愿为解说。除我等疑。及未来世。诸善男子闻此事已。亦不生疑。

8 [辛二、偈颂\(2\)](#)

9 [壬一、颂腾疑\(3\)](#)

10 [癸一、颂法说\(3\)](#)

11 [子一、颂执近](#)

尔时弥勒菩萨。欲重宣此义而说偈言：

佛昔从释种。出家近伽耶。坐于菩提树。尔来尚未久。

11 子二、颂执远

此诸佛子等。其数不可量。久已行佛道。住于神通力。
善学菩萨道。不染世间法。如莲华在水。从地而涌出。
皆起恭敬心。住于世尊前。

11 子三、颂结难信

是事难思议。云何而可信。佛得道甚近。所成就甚多。
愿为除众疑。如实分别说。

10 癸二、颂立譬

譬如少壮人。年始二十五。示人百岁子。发白而面皱。
是等我所生。子亦说是父。父少而子老。举世所不信。

10 癸三、颂法合

世尊亦如是。得道来甚近。是诸菩萨等。志固无怯弱。
从无量劫来。而行菩萨道。巧于难问答。其心无所畏。
忍辱心决定。端正有威德。十方佛所赞。善能分别说。
不乐在人众。常好在禅定。为求佛道故。于下空中住。

9 壬二、颂请答

我等从佛闻。于此事无疑。愿佛为未来。演说令开解。
若有于此经。生疑不信者。即当堕恶道。愿今为解说。
是无量菩萨。云何于少时。教化令发心。而住不退地。

6 己二、寿量品，是广开显断疑生信(2)

7 庚一、诚信(4)

8 辛一、三诫

尔时佛告诸菩萨。及一切大众。诸善男子。汝等当信解如来诚谛之语。复告大众。汝等当信解如来诚谛之语。又复告诸大众。汝等当信解如来诚谛之语。

8 辛二、三请

是时菩萨大众。弥勒为首。合掌白佛言。世尊。惟愿说之。我等当信受佛语。如是三白已。

8 辛三、重请

复言。惟愿说之。我等当信受佛语。

8 辛四、重诫

尔时世尊。知诸菩萨三请不止。而告之言。汝等谛听。

7 庚二、正答(2)

8 辛一、长文(2)

9 壬一、正开近显远(2)

10 癸一、出执近之情

如来秘密神通之力。一切世间天人及阿修罗。皆谓今释迦牟尼佛。出释氏宫。去伽耶城不远。坐于道场。得阿耨多罗三藐三菩提。

10 癸二、破近显远(2)

11 子一、正显远

然善男子。我实成佛已来。无量无边百千万亿那由他劫。

11 子二、举譬格量久远(3)

12 丑一、举譬问

譬如五百千万亿那由他阿僧祇。三千大千世界。假使有人抹为微尘。过于东方五百千万亿那由他阿僧祇国。乃下一尘。如是东行。尽是微尘。诸善男子。于意云何。是诸世界。可得思惟校计。知其数不。

12 丑二、答

弥勒菩萨等俱白佛言。世尊。是诸世界。无量无边。非算数所知。亦非心力所及。一切声闻辟支佛。以无漏智。不能思惟知其限数。我等住阿惟越致地。于是事中亦所不达。世尊。如是诸世界。无量无边。

12 丑三、合显久远

尔时佛告大菩萨众。诸善男子。今当分明宣语汝等。是诸世界。若着微尘及不著者。尽以为尘。一尘一劫。我成佛已来。复过于此百千万亿那由他阿僧祇劫。

9 壬二、明三世益物(2)

10 癸一、法说(2)

11 子一、正明三世益物(3)

12 丑一、明过去益物(3)

13 寅一、过去益物处

自从是来。我常在此娑婆世界。说法教化。亦于余处百千万亿那由他阿僧祇国。导利众生。

13 寅二、拂过去迹疑

诸善男子。于是中间。我说然灯佛等。又复言其入于涅槃。如是皆以方便分别。

13 寅三、明过去益物所宜(2)

14 卯一、感应

诸善男子。若有众生来至我所。我以佛眼。观其信等诸根利钝。随所应度。

14 卯二、施化(2)

15 辰一、明形声两益

处处自说。名字不同。年纪大小。亦复现言当入涅槃。又以种种方便。说微妙法。

15 辰二、明得益欢喜

能令众生发欢喜心。

12 丑二、明现在益物(2)

13 寅一、感应

诸善男子。如来见诸众生。乐于小法。德薄垢重者。

13 寅二、施化(2)

14 卯一、明现形

为是人说。我少出家。得阿耨多罗三藐三菩提。然我实成佛已来。久远若斯。但以方便教化众生。令入佛道。作如是说。

14 卯二、明说法(2)

15 辰一、正明一代所说

诸善男子。如来所演经典。皆为度脱众生。或说己身。或说他身。或示己身。或示他身。或示己事。或示他事。诸所言说。皆实不虚。

15 辰二、释出巧说之由(2)

16 巳一、明由照权实理故，即是说示之本

所以者何。如来如实知见三界之相。无有生死。若退若出。亦无在世。及灭度者。非实非虚。非如非异。不如三界。见于三界。如斯之事。如来明见。无有错谬。

16 巳二、明由称渐顿机故，即是说示之缘

以诸众生有种种性。种种欲。种种行。种种忆想分别故。欲令生诸善根。以若干因缘。譬喻言辞。种种说法。所作佛事。未曾暂废。

12 丑三、明未来益物(2)

13 寅一、正明非灭唱灭以益未来(2)

14 卯一、明本实不灭

如是我成佛已来。甚大久远。寿命无量阿僧祇劫。常住不灭。诸善男子。我本行菩萨道所成寿命。今犹未尽。复倍上数。

14 卯二、明方便唱灭

然今非实灭度。而便唱言当取灭度。如来以是方便教化众生。

13 寅二、释须唱灭意(2)

14 卯一、不灭有损

所以者何。若佛久住于世。薄德之人。不种善根。贫穷下贱。贪着五欲。入于忆想妄见网中。若见如来常在不灭。便起憍恣而怀厌怠。不能生难遭之想。恭敬之心。

14 卯二、唱灭有益

是故如来以方便说。比丘当知。诸佛出世难可值遇。所以者何。诸薄德人。过无量百千万亿劫。或有见佛。或不见者。以此事故。我作是言。诸比丘。如来难可得见。斯众生等闻如是语。必当生于难遭之想。心怀恋慕。渴仰于佛。便种善根。是故如来虽不实灭。而言灭度。

11 子二、总结不虚

又善男子。诸佛如来。法皆如是。为度众生。皆实不虚。

10 癸二、譬说(2)

11 子一、立譬(2)

12 丑一、良医治子譬，譬上三世益物(3)

13 寅一、远行譬，譬过去益物

譬如良医。智慧聪达。明练方药。善治众病。其人多诸子息。若二十。乃至百数。以有事缘。远至余国。

13 寅二、还来譬，譬现在益物(2)

14 卯一、譬感应

诸子于后。饮他毒药。药发闷乱。宛转于地。

14 卯二、譬施化(2)

15 辰一、譬现形

是时其父。还来归家。诸子饮毒。或失本心。或不失者。遥见其父。皆大欢喜。拜跪问讯。善安隐归。我等愚痴。误服毒药。愿见救疗。更赐寿命。

15 辰二、譬说法(3)

16 巳一、譬佛受请转顿渐法轮

父见子等。苦恼如是。依诸经方。求好药草。色香美味。皆悉具足。擣筛和合。与子令服。

16 巳二、譬劝诫

而作是言。此大良药。色香美味。皆悉具足。汝等可服。速除苦恼。无复众患。

16 巳三、譬得益

其诸子中不失心者。见此良药色香俱好。即便服之。病尽除愈。

13 寅三、复去譬，譬未来益物(4)

14 卯一、超譬不灭有损

余失心者。见其父来。虽亦欢喜问讯。求索治病。然与其药而不肯服。所以者何。毒气深入。失本心故。于此好色香药。而谓不美。

14 卯二、譬方便唱灭

父作是念。此子可愍。为毒所中。心皆颠倒。虽见我喜。求索救疗。如是好药而不肯服。我今当设方便。令服此药。即作是言。汝等当知。我今衰老。死时已至。是好良药。今留在此。汝可取服。勿忧不差。作是教已。复至他国。遣使还告。汝父已死。

14 卯三、警唱灭有益

是时诸子闻父背丧。心大忧恼。而作是念。若父在者。慈愍我等。能见救护。今者舍我。远丧他国。自惟孤露。无复恃怙。常怀悲感。心遂醒悟。乃知此药色香美味。即取服之。毒病皆愈。

14 卯四、追警本实不灭

其父闻子悉已得差。寻便来归。咸使见之。

12 丑二、治子实益警，警上总结不虚

诸善男子。于意云何。颇有人能说此良医虚妄罪不。不也。世尊。

11 子二、法合

佛言。我亦如是。成佛已来。无量无边百千万亿那由他阿僧祇劫。为众生故。以方便力。言当灭度。亦无有能如法说我虚妄过者。

8 辛二、偈颂(2)

9 壬一、颂正显远

尔时世尊。欲重宣此义而说偈言：

自我得佛来。所经诸劫数。无量百千万。亿载阿僧祇。

9 壬二、颂三世益物(2)

10 癸一、颂法说(2)

11 子一、颂正明三世益物(3)

12 丑一、颂过去(3)

13 寅一、超颂过去益物所宜

常说法教化。无数亿众生。令入于佛道。尔来无量劫。

为度众生故。方便现涅槃。

13 寅二、追颂过去益物处

而实不灭度。常住此说法。

13 寅三、颂拂过去迹疑

我常住于此。以诸神通力。令颠倒众生。虽近而不见。

12 丑二、颂现在(2)

13 寅一、颂感应

众见我灭度。广供养舍利。咸皆怀恋慕。而生渴仰心。

众生既信伏。质直意柔软。一心欲见佛。不自惜身命。

13 寅二、颂施化

时我及众僧。俱出灵鹫山。我时语众生。常在此不灭。

以方便力故。现有灭不灭。

12 丑三、颂未来

13 寅一、先颂方便唱灭，兼颂须唱灭意

余国有众生。恭敬信乐者。我复于彼中。为说无上法。

汝等不闻此。但谓我灭度。我见诸众生。没在于苦恼。

故不为现身。令其生渴仰。因其心恋慕。乃出为说法。

13 寅二、颂本实不灭，兼广释不见得见之由

神通力如是。于阿僧祇劫。常在灵鹫山。及余诸住处。

众生见劫尽。大火所烧时。我此土安稳。天人常充满。
园林诸堂阁。种种宝庄严。宝树多华果。众生所游乐。
诸天击天鼓。常作众伎乐。雨曼陀罗华。散佛及大众。
我净土不毁。而众见烧尽。忧怖诸苦恼。如是悉充满。
是诸罪众生。以恶业因缘。过阿僧祇劫。不闻三宝名。
诸有修功德。柔和质直者。则皆见我身。在此而说法。
或时为此众。说佛寿无量。久乃见佛者。为说佛难值。

11 子二、颂总结不虚

我智力如是。慧光照无量。寿命无数劫。久修业所得。
汝等有智者。勿于此生疑。当断令永尽。佛语实不虚。

10 癸二、颂譬说(2)

11 子一、颂立譬

如医善方便。为治狂子故。实在而言死。无能说虚妄。

11 子二、颂法合

我亦为世父。救诸苦患者。为凡夫颠倒。实在而言灭。
以常见我故。而生憍恣心。放逸着五欲。堕于恶道中。
我常知众生。行道不行道。随所应可度。为说种种法。
每自作是意。以何令众生。得入无上慧。速成就佛身。

5 戊二、分别功德品初长文，是总授法身记(3)

6 己一、经家总叙

尔时大会。闻佛说寿命劫数长远如是。无量无边阿僧祇众生得大饶益。

6 己二、如来分别

于时世尊。告弥勒菩萨摩訶萨。阿逸多。我说是如来寿命长远时。六百八十万亿那由他恒河沙众生。得无生法忍。复有千倍菩萨摩訶萨。得闻持陀罗尼门。复有一世界微尘数菩萨摩訶萨。得乐说无碍辩才。复有一世界微尘数菩萨摩訶萨。得百千万亿无量旋陀罗尼。复有三千大千世界微尘数菩萨摩訶萨。能转不退法轮。复有二千中国土微尘数菩萨摩訶萨。能转清净法轮。复有小千国土微尘数菩萨摩訶萨。八生当得阿耨多罗三藐三菩提。复有四四天下微尘数菩萨摩訶萨。四生当得阿耨多罗三藐三菩提。复有三四天下微尘数菩萨摩訶萨。三生当得阿耨多罗三藐三菩提。复有二四天下微尘数菩萨摩訶萨。二生当得阿耨多罗三藐三菩提。复有一四天下微尘数菩萨摩訶萨。一生当得阿耨多罗三藐三菩提。复有八世界微尘数众生。皆发阿耨多罗三藐三菩提心。

6 己三、瑞表圆益

佛说是诸菩萨摩訶萨得大法利时。于虚空中。雨曼陀罗华。摩訶曼陀罗华。以散无量百千万亿宝树下。师子座上诸佛。并散七宝塔中师子座上。释迦牟尼佛。及久灭度多宝如来。亦散一切诸大菩萨及四部众。又雨细末栴檀。沉水香等。于虚空中。天鼓自鸣。妙声深远。又雨千种天衣。垂诸璎珞。真珠璎珞。摩尼珠璎珞。如意珠璎珞。徧于九方。众宝香鑪烧无价香。自然周至。供养大会。——佛上。有诸菩萨执持幡盖。次第而上。至于梵天。是诸菩萨。以妙音声。歌无量颂。赞叹诸佛。

5 戊三、弥勒说偈，是总申领解(3)

6 己一、颂时众得解

尔时弥勒菩萨。从座而起。偏袒右肩。合掌向佛而说偈言：

佛说希有法。昔所未曾闻。世尊有大力。寿命不可量。

无数诸佛子。闻世尊分别。说得法利者。欢喜充徧身。

6 己二、颂如来分别

或住不退地。或得陀罗尼。或无碍乐说。万亿旋总持。

或有大千界。微尘数菩萨。各各皆能转。不退之法轮。

复有中千界。微尘数菩萨。各各皆能转。清静之法轮。

复有小千界。微尘数菩萨。余各八生在。当得成佛道。

复有四三二。如此四天下。微尘诸菩萨。随数生成佛。

或一四天下。微尘数菩萨。余有一生在。当成一切智。

如是等众生。闻佛寿长远。得无量无漏。清静之果报。

复有八世界。微尘数众生。闻佛说寿命。皆发无上心。

6 己三、颂瑞表圆益

世尊说无量。不可思议法。多有所饶益。如虚空无边。

雨天曼陀罗。摩诃曼陀罗。释梵如恒沙。无数佛土来。

雨栴檀沉水。缤纷而乱坠。如鸟飞空下。供散于诸佛。

天鼓虚空中。自然出妙声。天衣千万种。旋转而来下。

众宝妙香鬘。烧无价之香。自然悉周徧。供养诸世尊。

其大菩萨众。执七宝幡盖。高妙万亿种。次第至梵天。

一一诸佛前。宝幢悬胜幡。亦以千万偈。歌咏诸如来。

如是种种事。昔所未曾有。闻佛寿无量。一切皆欢喜。

佛名闻十方。广饶益众生。一切具善根。以助无上心。

3 丙三、流通段(3)

4 丁一、一品半，明初品因功德以劝流通

5 戊一、明现在四信(4)

6 己一、一念信解(2)

7 庚一、长文

8 辛一、出相貌

尔时佛告弥勒菩萨摩诃萨。阿逸多。其有众生。闻佛寿命长远如是。乃至能生一念信解。

8 辛二、明功德

9 壬一、总论无量

所得功德。无有限量。

9 壬二、格量显多(2)

10 癸一、举五度为格量本

若有善男子。善女人。为阿耨多罗三藐三菩提故。于八十万亿那由他劫。行五波罗蜜。檀波罗蜜。尸罗波罗蜜。羼提波罗蜜。毗梨耶波罗蜜。禅波罗蜜。除般若波罗蜜。

10 癸二、正格信解功德甚多

以是（五度）功德。比前（一念信解）功德。百分。千分。百千万亿分。不及其一。乃至算数譬喻所不能知。

8 辛三、明位行不退

若善男子。善女人。有如是功德。于阿耨多罗三藐三菩提退者。无有是处。

7 庚二、偈颂(3)

8 辛一、超颂功德(2)

9 壬一、超颂格量显多(2)

10 癸一、颂举五度为格量本

尔时世尊。欲重宣此义而说偈言：

若人求佛慧。于八十万亿。那由他劫数。行五波罗蜜。

于是诸劫中。布施供养佛。及缘觉弟子。并诸菩萨众。

珍异之饮食。上服与卧具。栴檀立精舍。以园林庄严。

如是等布施。种种皆微妙。尽此诸劫数。以回向佛道。

若复持禁戒。清净无缺漏。求于无上道。诸佛之所叹。

若复行忍辱。住于调柔地。设众恶来加。其心不倾动。

诸有得法者。怀于增上慢。为斯所轻恼。如是亦能忍。

若复勤精进。志念常坚固。于无量亿劫。一心不懈息。

又于无数劫。住于空闲处。若坐若经行。除睡常摄心。

以是因缘故。能生诸禅定。八十亿万劫。安住心不乱。

持此一心福。愿求无上道。我得一切智。尽诸禅定际。

是人于百千。万亿劫数中。行此诸功德。如上之所说。

10 癸二、颂正格信解功德甚多

有善男女等。闻我说寿命。乃至一念信。其福过于彼。

9 壬二、追颂总论无量

若人悉无有。一切诸疑悔。深心须臾信。其福为如此。

8 辛二、颂位行不退

9 壬一、明不易信解

其有诸菩萨。无量劫行道。闻我说寿命。是则能信受。

9 壬二、明信解则必发愿，故得不退

如是诸人等。顶受此经典。愿我于未来。长寿度众生。

如今日世尊。诸释中之王。道场师子吼。说法无所畏。

我等未来世。一切所尊敬。坐于道场时。说寿亦如是。

8 辛三、追颂相貌

若有深心者。清净而质直。多闻能总持。随义解佛语。

如是之人等。于此无有疑。

6 己二、解其言趣

又阿逸多。若有闻佛寿命长远。解其言趣。是人所得功德。无有限量。能起如来无上之慧。

6 己三、闻持供养

何况广闻是经。若教人闻。若自持。若教人持。若自书。若教人书。若以华香璎珞。幢幡缯盖。香油酥灯。供养经卷。是人功德无量无边。能生一切种智。

6 己四、深信观成

阿逸多。若善男子。善女人。闻我说寿命长远。深心信解。则为见佛常在耆闍崛山。共大菩萨。诸声闻众。围绕说法。又见此娑婆世界。其地琉璃。坦然平正。阎浮檀金。以界八道。宝树行列。诸台楼观。皆悉宝成。其菩萨众咸处其中。若有能如是观者。当知是为深信解相。

5 戊二、明灭后五品(2)

6 己一、列五品，粗格量后四品功德(2)

7 庚一、长文(5)

8 辛一、直起随喜心

又复如来灭后。若闻是经而不毁訾。起随喜心。当知已为深信解相。

8 辛二、加受持读诵(2)

9 壬一、标人相

何况读诵受持之者。

9 壬二、格量功德

斯人则为顶戴如来。阿逸多。是善男子。善女人。不须为我复起塔寺。及作僧坊。以四事供养众僧。所以者何。是善男子。善女人。受持读诵是经典者。为已起塔。造立僧坊。供养众僧。则为以佛舍利起七宝塔。高广渐小。至于梵天。悬诸幡盖。及众宝铃。华香。璎珞。末香。涂香。烧香。众鼓。伎乐。箫笛。箜篌。种种舞戏。以妙音声。歌呗赞颂。则为于无量千万亿劫。作是供养已。

8 辛三、加教人(2)

9 壬一、标人相

阿逸多。若我灭后。闻是经典。有能受持。若自书。若教人书。

9 壬二、格量功德

则为起立僧坊。以赤梅檀。作诸殿堂三十有二。高八多罗树。高广严好。百千比丘于其中止。园林浴池。经行禅窟。衣服饮食。牀褥汤药。一切乐具。充满其中。如是僧坊堂阁。若干百千万亿。其数无量。以此现前供养于我。及比丘僧。是故我说。如来灭后。若有受持读诵。为他人说。若自书。若教人书。供养经卷。不须复起塔寺。及造僧房。供养众僧。

8 辛四、加兼行六度(2)

9 壬一、标人相

况复有人。能持是经。兼行布施。持戒。忍辱。精进。一心。智慧。

9 壬二、格量功德

其德最胜。无量无边。譬如虚空。东西南北。四维上下。无量无边。是人功德。亦复如是无量无边。疾至一切种智。

8 辛五、加正行六度(2)

9 壬一、标人相

人读诵。受持是经。为他人说。若自书。若教人书。复能起塔。及造僧房。供养赞叹。声闻众僧。亦以百千万亿赞叹之法。赞叹菩萨功德。又为他人。种种因缘。随义解说此法华经（财法二施）。复能清静持戒。与柔和者而共同止（如法持戒。统理大众）。忍辱无瞋。志念坚固（忍）。常贵坐禅。得诸深定（禅）。精进勇猛。摄诸善法（进）。利根智慧。善答问难（般若）。

9 壬二、格量功德

阿逸多。若我灭后。诸善男子。善女人。受持读诵是经典者。复有如是诸善功德。当知是人已趣道场。近阿耨多罗三藐三菩提。坐道树下。阿逸多。是善男子。善女人。若坐。若立。若行处。此中便应起塔。一切天人皆应供养。如佛之塔。

7 庚二、偈颂(4)

8 辛一、颂第二品

尔时世尊。欲重宣此义而说偈言：

若我灭度后。能奉持此经。斯人福无量。如上之所说。
是则为具足。一切诸供养。以舍利起塔。七宝而庄严。
表刹甚高广。渐小至梵天。宝铃千万亿。风动出妙音。
又于无量劫。而供养此塔。华香诸瓔珞。天衣众伎乐。
然香油酥灯。周常照明。恶世法末时。能持是经者。
则为已如上。具足诸供养。

8 辛二、颂第三品

若能持此经。则如佛现在。以牛头栴檀。起僧房供养。
堂有三十二。高八多罗树。上馔妙衣服。牀卧皆具足。
百千众住处。园林诸浴池。经行及禅窟。种种皆严好。

8 辛三、颂第四品

若有信解心。受持读诵书。若复教人书。及供养经卷。
散华香末香。以须曼鬘卜。阿提目多伽。熏油常然之。
如是供养者。得无量功德。如虚空无边。其福亦如是。

8 辛四、颂第五品

况复持此经。兼布施持戒。忍辱乐禅定。不瞋不恶口。
恭敬于塔庙。谦下诸比丘。远离自高心。常思惟智慧。
有问难不瞋。随顺为解说。若能行是行。功德不可量。
若见此法师。成就如是德。应以天华散。天衣覆其身。
头面接足礼。生心如佛想。又应作是念。不久诣道树。
得无漏无为。广利诸人天。其所住止处。经行若坐卧。
乃至说一偈。是中应起塔。庄严令妙好。种种以供养。
佛子住此地。则是佛受用。常在于其中。经行及坐卧。

6 己二、随喜功德品，广格量初品功德(2)

7 庚一、问

尔时弥勒菩萨摩訶萨白佛言。世尊。若有善男子。善女人。闻是法华经随喜者。得几所福。而说偈言：

世尊灭度后。其有闻是经。若能随喜者。为得几所福。

7 庚二、答

8 辛一、长文(2)

9 壬一、答内心随喜人功德(5)

10 癸一、约展转相教

尔时佛告弥勒菩萨摩訶萨。阿逸多。如来灭后。若比丘。比丘尼。优婆塞。优婆夷。及余智者。若长若幼（余智者。谓未受四众戒律。不得名为比丘。优婆塞等。而宿有大乘智种。闻能信解。便可随力演说。不论年长年幼也）。闻是经随喜已。从法会出。至于余处。若在僧坊。若空闲地。若城邑巷陌。聚落田里。如其所闻（文义不谬）。为父母宗亲。善友知识。随力演说。是诸人等。闻已随喜。复行转教。余人闻已。亦随喜转教。如是展转。至第五十。阿逸多。其第五十善男子。善女人。随喜功德。我今说之。汝当善听。

10 癸二、格量本

若四百万亿阿僧祇世界。六趣四生众生。卵生。胎生。湿生。化生。若有形无形。有想无想。非有想非无想。无足二足。四足多足。如是等在众生数者。有人求福。随其所欲娱乐之具。皆给与之。一一众生与满阎浮提金银琉璃。砗磲玛瑙。珊瑚琥珀。诸妙珍宝。及象马车乘。七宝所成宫殿楼阁等。是大施主。如是布施满八十年已。而作是念。我已施众生娱乐之具。随意所欲。然此众生皆已衰老。年过八十。发白面皱。将死不久。我当以佛法而训导之。即集此众生。宣布法化。示教利喜。一时皆得须陀洹道。斯陀含道。阿那含道。阿罗汉道。尽诸有漏。于深禅定皆得自在。具八解脱。

10 癸三、问

于汝意云何。是大施主所得功德。宁为多不。

10 癸四、答

弥勒白佛言。世尊。是人功德甚多。无量无边。若是施主。但施众生一切乐具。功德无量。何况令得阿罗汉果。

10 癸五、正格量

佛告弥勒。我今分明语汝。是人以一切乐具。施于四百万亿阿僧祇世界六趣众生。又令得阿罗汉果。所得功德。不如是第五十人。闻法华经一偈随喜功德。百分。千分。百千万亿分。不及其一。乃至算数譬喻所不能知。阿逸多。如是第五十人。展转闻法华经随喜功德。尚无量无边阿僧祇。何况最初于会中。闻而随喜者。其福复胜。无量无边阿僧祇。不可得比。

9 壬二、直明外听法人功德(4)

10 癸一、自往

又阿逸多。若人为是经故。往诣僧坊。若坐若立。须臾听受。缘是功德。转身所生。得好上妙象马车乘。珍宝辇舆。及乘天宫。

10 癸二、分座

若复有人。于讲法处坐。更有人来。劝令坐听。若分座令坐。是人功德。转身得帝释坐处。若梵王坐处。若转轮圣王所坐之处。

10 癸三、劝他

阿逸多。若复有人。语余人言。有经名法华。可共往听。即受其教。乃至须臾间闻。是人功德。转身得与陀罗尼菩萨共生一处（一）。利根（二）。智慧（三）。百千万世终不瘡痍（四）。口气不臭（五）。舌常无病（六）。口亦无病（七）。齿不垢黑（八九）。不黄（十）。不（十一）。亦不缺落（十二）。不差（十三）。不曲（十四）。唇不下垂（十五）。亦不褻缩（十六）。不粗（十七）。不疮疹（十八。疹。口疮也）。亦不缺坏（十九二十）。亦不坼斜（廿一廿二）。不厚（廿三）。不大（廿四）。亦不黧黑（廿五）。无诸可恶（廿六）。鼻不匾（廿七）。亦不曲戾（廿八）。面色不黑（廿九）。亦不狭长（三十三十一）。亦不窟曲（三十二）。无有一切不可喜相（三十四）。唇舌牙齿悉皆严好（三十五六七八）。鼻修高直（三十九四十四十一）。面貌圆满（四十

二)。眉高而长(四十三四)。额广平正(四十五六七)。人相具足(四十八)。世世所生。见佛(四十九)闻法。信受教诲(五十)。

10 癸四、具听修行

阿逸多。汝且观是劝于一人令往听法。功德如此。何况一心听说读诵。而于大众为人分别。如说修行。

8 辛二、偈颂(2)

9 壬一、颂内心随喜功德

尔时世尊。欲重宣此义而说偈言：

若人于法会。得闻是经典。乃至于一偈。随喜为他说。
如是展转教。至于第五十。最后入福。今当分别之。
如有大施主。供给无量众。具满八十岁。随意之所欲。
见彼衰老相。发白而面皱。齿形枯竭。念其死不久。
我今应当教。令得于道果。即为方便说。涅槃真实法。
世皆不牢固。如水沫泡焰。汝等咸应当。疾生厌离心。
诸人闻是法。皆得阿罗汉。具足六神通。三明八解脱。
最后第五十。闻一偈随喜。是人福胜彼。不可为譬喻。
如是展转闻。其福尚无量。何况于法会。初闻随喜者。

9 壬二、颂外听法人功德(4)

10 癸一、超颂劝他

若有劝一人。将引听法华。言此经深妙。千万劫难遇。
即受教往听。乃至须臾闻。斯人之福报。今当分别说。
世世无口患。齿不黄黑。唇不厚褰缺。无有可恶相。
舌不干黑短。鼻高修且直。额广而平正。面目悉端严。
为人所喜见。口气无臭秽。优鉢华之香。常从其口出。

10 癸二、颂自往

若故诣僧坊。欲听法华经。须臾闻欢喜。今当说其福。
后生天人中。得妙象马车。珍宝之辇舆。及乘天宫殿。

10 癸三、颂分座

若于讲法处。劝人坐听经。是福因缘得。释梵转轮座。

10 癸四、颂具听修行

何况一心听。解说其义趣。如说而修行。其福不可限。

4 丁二、法师功德品，明初品果功德以劝流通(2)

5 戊一、总列数

尔时佛告常精进菩萨摩訶萨。若善男子。善女人。受持是法华经。若读。若诵。若解说。若书写。是人当得八百眼功德。千二百耳功德。八百鼻功德。千二百舌功德。八百身功德。千二百意功德。以是功德庄严六根。皆令清净。

5 戊二、别解释(6)

6 己一、眼根

是善男子。善女人。父母所生清净肉眼。见于三千大千世界。内外所有山林河海。下至阿鼻地狱。上至有顶。亦见其中一切众生。及业因缘。果报生处。悉见悉知。尔时世尊。欲重宣此义而说偈言：

若于大众中。以无所畏心。说是法华经。汝听其功德。

是人得八百。功德殊胜眼。以是庄严故。其目甚清净。

父母所生眼。悉见三千界。内外弥楼山。须弥及铁围。

并余诸山林。大海江河水。下至阿鼻狱。上至有顶处。

其中诸众生。一切皆悉见。虽未得天眼。肉眼力如是。

6 己二、耳根

复次常精进。若善男子。善女人。受持此经。若读。若诵。若解说。若书写。得千二百耳功德。以是清净耳。闻三千大千世界。下至阿鼻地狱。上至有顶。其中内外种种语言音声。象声。马声。牛声。车声。啼哭声。愁叹声。螺声。鼓声。钟声。铃声。笑声。语声。男声。女声。童子声。童女声。法声。非法声。苦声。乐声。凡夫声。圣人声。喜声。不喜声。天声。龙声。夜叉声。乾闥婆声。阿修罗声。迦楼罗声。紧那罗声。摩睺罗伽声。火声。水声。风声。地狱声。畜生声。饿鬼声。比丘声。比丘尼声。声闻声。辟支佛声。菩萨声。佛声。以要言之。三千大千世界中。一切内外所有诸声。虽未得天耳。以父母所生清净（平）常（肉）耳。皆悉闻知。如是分别种种音声。而不坏耳根。尔时世尊。欲重宣此义而说偈言：

父母所生耳。清净无浊秽。以此常耳闻。三千世界声。

象马车牛声。钟铃螺鼓声。琴瑟箜篌声。箫笛之音声。

清净好歌声。听之而不着。无数种人声。闻悉能解了。

又闻诸天声。微妙之歌音。及闻男女声。童子童女声。

山川险谷中。迦陵频伽声。命命等诸鸟。悉闻其音声。

地狱众苦痛。种种楚毒声。饿鬼饥渴逼。求索饮食声。

诸阿修罗等。居在大海边。自共言语时。出于大音声。

如是说法者。安住于此间。遥闻是众声。而不坏耳根。

十方世界中。禽兽鸣相呼。其说法之人。于此悉闻之。

其诸梵天上。光音及徧净。乃至有顶天。言语之音声。

法师住于此。悉皆得闻之。一切比丘众。及诸比丘尼。

若读诵经典。若为他人说。法师住于此。悉皆得闻之。

复有诸菩萨。读诵于经法。若为他人说。撰集解其义。

如是诸音声。悉皆得闻之。诸佛大圣尊。教化众生者。

于诸大会中。演说微妙法。持此法华者。悉皆得闻之。

三千大千界。内外诸音声。下至阿鼻狱。上至有顶天。

皆闻其音声。而不坏耳根。其耳聪利故。悉能分别知。

持是法华者。虽未得天耳。但用所生耳。功德已如是。

6 己三、鼻根

复次常精进。若善男子。善女人。受持是经。若读。若诵。若解说。若书写。成就八百鼻功德。以是清静鼻根。闻于三千大千世界。上下内外种种诸香。须曼那华香。闍提华香。末利华香。薝卜华香。波罗罗华香。赤莲华香。青莲华香。白莲华香。华树香。果树香。栴檀香。沉水香。多摩罗跋香。多伽罗香。及千万种和香。若末。若丸。若涂香。持是经者。于此间住。悉能分别。又复别知众生之香。象香。马香。牛羊等香。男香。女香。童子香。童女香。及草木丛林香。若近若远。所有诸香。悉皆得闻。分别不错。持是经者。虽住于此。亦闻天上诸天之香。波利质多罗。拘鞞陀罗树香。及曼陀罗华香。摩诃曼陀罗华香。曼殊沙华香。摩诃曼殊沙华香。栴檀。沉水。种种末香。诸杂华香。如是等天香。和合所出之香。无不闻知。又闻诸天身香。释提桓因在胜殿上。五欲娱乐嬉戏时香。若在妙法堂上。为忉利诸天说法时香。若于诸园游戏时香。及余天等男女身香。皆悉遥闻。如是展转。乃至梵世。上至有顶诸天身香。亦皆闻之。并闻诸天所烧之香。及声闻香。辟支佛香。菩萨香。诸佛身香。亦皆遥闻。知其所在。虽闻此香。然于鼻根不坏不错。若欲分别为他人说。忆念不谬。尔时世尊。欲重宣此义而说偈言：

是人鼻清静。于此世界中。若香若臭物。种种悉闻知。
须曼那闍提。多摩罗栴檀。沉水及桂香。种种华果香。
及诸众生香。男子女人香。说法者远住。闻香知所在。
大势转轮王。小转轮及子。群臣诸宫人。闻香知所在。
身所着珍宝。及地中宝藏。转轮王宝女。闻香知所在。
诸人严身具。衣服及璎珞。种种所涂香。闻香知其身。
诸天若行坐。游戏及神变。持是法华者。闻香悉能知。
诸树华果实。及酥油香气。持经者住此。悉知其所在。
诸山深险处。栴檀树华敷。众生在中者。闻香悉能知。
铁围山大海。地中诸众生。持经者闻香。悉知其所在。
阿修罗男女。及其诸眷属。鬪诤游戏时。闻香皆能知。
旷野险隘处。师子象虎狼。野牛水牛等。闻香知所在。
若有怀妊者。未辨其男女。无根及非人。闻香悉能知。
以闻香力故。知其初怀妊。成就不成就。安乐产福子。
以闻香力故。知男女所念。染欲痴恚心。亦知修善者。
地中众伏藏。金银诸珍宝。铜器之所盛。闻香悉能知。
种种诸璎珞。无能识其价。闻香知贵贱。出处及所在。
天上诸华等。曼陀曼殊沙。波利质多树。闻香悉能知。
天上诸宫殿。上中下差别。众宝华庄严。闻香悉能知。
天园林胜殿。诸观妙法堂。在中而娱乐。闻香悉能知。

诸天若听法。或受五欲时。来往行坐卧。闻香悉能知。
天女所着衣。好华香庄严。周旋游戏时。闻香悉能知。
如是展转上。乃至于梵世。入禅出禅者。闻香悉能知。
光音徧净天。乃至于有顶。初生及退没。闻香悉能知。
诸比丘众等。于法常精进。若坐若经行。及读诵经典。
或在林树下。专精而坐禅。持经者闻香。悉知其所在。
菩萨志坚固。坐禅若读诵。或为人说法。闻香悉能知。
在在方世尊。一切所恭敬。愍众而说法。闻香悉能知。
众生在佛前。闻经皆欢喜。如法而修行。闻香悉能知。
虽未得菩萨。无漏法生鼻。而是持经者。先得此鼻相。

6 己四、舌根

复次常精进。若善男子。善女人。受持是经。若读。若诵。若解说。若书写。得千二百舌功德。若好若丑。若美不美。及诸苦涩物。在其舌根。皆变成上味。如天甘露。无不美者。若以舌根。于大众中有所演说。出深妙声。能入其心。皆令欢喜快乐。又诸天子天女。释梵诸天。闻是深妙音声。有所演说。言论次第。皆悉来听。及诸龙。龙女。夜叉。夜叉女。乾闥婆。乾闥婆女。阿修罗。阿修罗女。迦楼罗。迦楼罗女。紧那罗。紧那罗女。摩睺罗伽。摩睺罗伽女。为听法故。皆来亲近。恭敬供养。及比丘。比丘尼。优婆塞。优婆夷。国王。王子。群臣眷属。小转轮王。大转轮王。七宝千子。内外眷属。乘其宫殿。俱来听法。以是菩萨善说法故。婆罗门居士。国内人民。尽其形寿。随侍供养。又诸声闻。辟支佛。菩萨。诸佛。常乐见之。是人所在方面。诸佛皆向其处说法。悉能受持一切佛法。又能出于深妙法音。尔时世尊。欲重宣此义而说偈言：
是人舌根净。终不受恶味。其有所食噉。悉皆成甘露。
以深净妙声。于大众说法。以诸因缘喻。引导众生心。
闻者皆欢喜。设诸上供养。诸天龙夜叉。及阿修罗等。
皆以恭敬心。而共来听法。是说法之人。若欲以妙音。
徧满三千界。随意即能至。大小转轮王。及千子眷属。
合掌恭敬心。常来听受法。诸天龙夜叉。罗刹毗舍闍。
亦以欢喜心。常乐来供养。梵天王魔王。自在大自在。
如是诸天众。常来至其所。诸佛及弟子。闻其说法音。
常念而守护。或时为现身。

6 己五、身根

复次常精进。若善男子。善女人。受持是经。若读。若诵。若解说。若书写。得八百身功德。得清净身。如净琉璃。众生喜见。其身净故。三千大千世界众生。生时死时。上下好丑。生善处恶处。悉于中现。及铁围山。大铁围山。弥楼山。摩诃弥楼山等诸山。及其中众生。悉于中现。下至阿鼻地狱。上至有顶。所有及众生。悉于中现。若声闻。辟支佛。菩萨。诸佛说法。皆于身中现其色像。尔时世尊。欲重宣此义而说偈言：

若持法华者。其身甚清静。如彼净琉璃。众生皆喜见。
又如净明镜。悉见诸色像。菩萨于净身。皆见世所有。
唯独自明了。余人所不见。三千世界中。一切诸群萌。
天人阿修罗。地狱鬼畜生。如是诸色像。皆于身中现。
诸天等宫殿。乃至有顶。铁围及弥楼。摩诃弥楼山。
诸大海水等。皆于身中现。诸佛及声闻。佛子菩萨等。
若独若在众。说法悉皆现。虽未得无漏。法性之妙身。
以清静（平）常（父母所生之）体。一切于中现。

6 己六、意根

复次常精进。若善男子。善女人。如来灭后。受持是经。若读。若诵。若解说。若书写。得千二百意功德。以是清静意根。乃至闻一偈一句。通达无量无边之义。解是义已。能演说一句一偈。至于一月四月。乃至一岁。诸所说法。随其义趣。皆与实相不相违背。若说俗间经书。治世语言。资生业等。皆顺正法。三千大千世界六趣众生。心之所行。心所动作。心所戏论。皆悉知之。虽未得无漏智慧。而其意根清静如此。是人有所思惟。筹量。言说。皆是佛法。无不真实。亦是先佛经中所说。尔时世尊。欲重宣此义而说偈言：

是人意清静。明利无浊秽。以此妙意根。知上中下法。
乃至闻一偈。通达无量义。次第如法说。月四月至岁。
是世界内外。一切诸众生。若天龙及人。夜叉鬼神等。
其在六趣中。所念若干种。持法华之报。一时皆悉知。
十方无数佛。百福庄严相。为众生说法。悉闻能受持。
思惟无量义。说法亦无量。终始不忘错。以持法华故。
悉知诸法相。随义识次第。达名字语言。如所知演说。
此人有所说。皆是先佛法。以演此法故。于众无所畏。
持法华经者。意根净若斯。虽未得无漏。先有如是相。
是人持此经。安住希有地。为一切众生。欢喜而爱敬。
能以千万种。善巧之语言。分别而说法。持法华经故。

4 丁三、不轻品，引信毁福罪证劝流通(2)

5 戊一、长文(3)

6 己一、双指前品所说罪福

尔时佛告得大势菩萨摩诃萨。汝今当知。若比丘。比丘尼。优婆塞。优婆夷。持法华经者。若有恶口骂詈诽谤。获大罪报。如前（法师品）所说。其所得功德。如向（法师功德品）所说。眼耳鼻舌身意清静。

6 己二、双明往昔信毁果报(2)

7 庚一、明事本(2)

8 辛一、明最初一佛(6)

9 壬一、时节

得大势。乃往古昔。过无量无边不可思议阿僧祇劫。

9 壬二、名号

有佛名威音王如来。应供。正徧知。明行足。善逝。世间解。无上士。调御丈夫。天人师。佛。世尊。

9 壬三、劫国

劫名离衰。国名大成。

9 壬四、说法

其威音王佛。于彼世中。为天人阿修罗说法。为求声闻者。说应四谛法。度生老病死。究竟涅槃。为求辟支佛者。说应十二因缘法。为诸菩萨。因阿耨多罗三藐三菩提。说应六波罗蜜法。究竟佛慧。

9 壬五、佛寿

得大势。是威音王佛。寿四十万亿那由他恒河沙劫。

9 壬六、正像

正法住世劫数。如一阎浮提微尘。像法住世劫数。如四天下微尘。其佛饶益众生已。然后灭度。

8 辛二、明次第二万亿佛

正法像法灭尽之后。于此国土。复有佛出。亦号威音王如来。应供。正徧知。明行足。善逝。世间解。无上士。调御丈夫。天人师。佛。世尊。如是次第有二万亿佛。皆同一号。

7 庚二、明本事(3)

8 辛一、就本时双标两人名

最初威音王如来既已灭度。正法灭后。于像法中。增上慢比丘有大势力。尔时有一菩萨比丘。名常不轻。

8 辛二、双明信毁之相(2)

9 壬一、明信者之得

得大势。以何因缘。名常不轻。是比丘凡有所见。若比丘。比丘尼。优婆塞。优婆夷。皆悉礼拜赞叹。而作是言。我深敬汝等。不敢轻慢。所以者何。汝等皆行菩萨道。当得作佛。而是比丘不专读诵经典。但行礼拜。乃至远见四众。亦复故往礼拜赞叹。而作是言。我不敢轻于汝等。汝等皆当作佛。

9 壬二、明毁者之失

四众之中。有生瞋恚。心不净者。恶口骂詈言。是无智比丘。从何所来。自言我不轻汝。而与我等授记。当得作佛。我等不用如是虚妄授记。如此经历多年。常被骂詈。不生瞋恚。常作是言。汝当作佛。说是语时。众人或以杖木瓦石而打掷之。避走远住。犹高声唱言。我不敢轻于汝等。汝等皆当作佛。以其常作是语故。增上慢比丘。比丘尼。优婆塞。优婆夷。号之为常不轻。

8 辛三、双明信毁果报(2)

9 壬一、明信者果报(2)

10 癸一、明果报

是比丘临欲终时。于虚空中。具闻威音王佛先所说法华经。二十千万亿偈。悉能受持。即得如上眼根清净。耳鼻舌身意根清净。得是六根清净已。更增寿命二百万亿那由他岁。广为人说是法华经。于时增上慢四众。比丘。比丘尼。优婆塞。优婆夷。轻贱是人为作不轻名者。见其得大神通力。乐说辩力。大善寂力。闻其所说。皆信伏随从。是菩萨复化千万亿众。令住阿耨多罗三藐三菩提。命终之后。得值二千亿佛。皆号日月灯明。于其法中。说是法华经。以是因缘。复值二千亿佛。同号云自在灯王。于此诸佛法中。受持读诵。为诸四众说此经典故。得是常眼清净。耳鼻舌身意诸根清净。于四众中说法。心无所畏。得大势。是常不轻菩萨摩訶萨。供养如是若干诸佛。恭敬尊重赞叹。种诸善根。于后复值千万亿佛。亦于诸佛法中说是经典。功德成就。当得作佛。

10 癸二、结会古今

得大势。于意云何。尔时常不轻菩萨。岂异人乎。则我身是。若我于宿世。不受持读诵此经。为他人说者。不能疾得阿耨多罗三藐三菩提。我于先佛所。受持读诵此经。为人说故。疾得阿耨多罗三藐三菩提。

9 壬二、明毁者果报(2)

10 癸一、明果报

得大势。彼时四众。比丘。比丘尼。优婆塞。优婆夷。以瞋恚意轻贱我故。二百亿劫常不值佛。不闻法。不见僧。千劫于阿鼻地狱。受大苦恼。毕是罪已。复遇常不轻菩萨。教化阿耨多罗三藐三菩提。

10 癸二、结会古今

得大势。于汝意云何。尔时四众常轻是菩萨者。岂异人乎。今此会中。跋陀婆罗等五百菩萨。师子月等五百比丘。尼思佛等五百优婆塞。皆于阿耨多罗三藐三菩提不退转者是。

6 己三、劝持

得大势。当知是法华经。大饶益诸菩萨摩訶萨。能令至于阿耨多罗三藐三菩提。是故诸菩萨摩訶萨。于如来灭后。常应受持。读诵解说。书写是经。

5 戊二、偈颂(2)

6 己一、颂信毁果报(2)

7 庚一、颂事本

尔时世尊。欲重宣此义而说偈言：

过去有佛。号威音王。神智无量。将导一切。

天人龙神。所共供养。

7 庚二、颂本事(3)

8 辛一、颂双标两名

是佛灭后。法欲尽时。有一菩萨。名常不轻。

时诸四众。计着于法。

8 辛二、颂双明信毁

不轻菩萨。往到其所。而语之言。我不轻汝。

汝等行道。皆当作佛。诸人闻已。轻毁骂詈。

不轻菩萨。能忍受之。

8 辛三、颂双明果报(2)

9 壬一、颂信者果报

其罪毕已。临命终时。得闻此经。六根清净。

神通力故。增益寿命。复为诸人。广说是经。

诸着法众。皆蒙菩萨。教化成就。令住佛道。

不轻命终。值无数佛。说是经故。得无量福。

渐具功德。疾成佛道。彼时不轻。则我身是。

9 壬二、颂毁者果报

时四部众。着法之者。闻不轻言。汝当作佛。

以是因缘。值无数佛。此会菩萨。五百之众。

并及四部。清信士女。今于我前。听法者是。

我于前世。劝是诸人。听受斯经。第一之法。

开示教人。令住涅槃。世世受持。如是经典。

6 己二、颂劝持

亿亿万劫。至不可议。时乃得闻。是法华经。

亿亿万劫。至不可议。诸佛世尊。时说是经。

是故行者。于佛灭后。闻如是经。勿生疑惑。

应当一心。广说此经。世世值佛。疾成佛道。

1 甲三、流通迹本两门(3)

2 乙一、神力嘱累两品，明付嘱流通(2)

3 丙一、神力品，明菩萨受命宏经(2)

4 丁一、长文(3)

5 戊一、菩萨受命

尔时千世界微尘等菩萨摩訶萨。从地涌出者。皆于佛前。一心合掌。瞻仰尊颜。而白佛言。世尊。我等于佛灭后。世尊分身所在国土灭度之处。当广说此经。所以者何。我等亦自欲得是真净大法。受持读诵。解说书写。而供养之。

5 戊二、佛现神力

6 己一、约所对总标

尔时世尊。于文殊师利等。无量百千万亿旧住娑婆世界菩萨摩訶萨。及诸比丘。比丘尼。优婆塞。优婆夷。天龙。夜叉。乾闥婆。阿修罗。迦楼罗。紧那罗。摩睺罗伽。人非人等。一切众前。现大神力。

6 己二、约所表正现(10)

7 庚一、出舌相

出广长舌。上至梵世。

7 庚二、毛孔放光

一切毛孔。放于无量无数色光。皆悉徧照十方世界。众宝树下师子座上诸佛。亦复如是。出广长舌。

放无量光。释迦牟尼佛。及宝树下诸佛现神力时。满百千岁。然后还摄舌相。

7 庚三、警咳。庚四、弹指

一时警咳。俱共弹指。是二音声。徧至十方诸佛世界。

7 庚五、地动。庚六、普见大会

地皆六种震动。其中众生。天龙夜叉。乾闥婆。阿修罗。迦楼罗。紧那罗。摩睺罗伽。人非人等。以佛神力故。皆见此娑婆世界。无量无边百千万亿众宝树下。师子座上诸佛。及见释迦牟尼佛。共多宝如来。在宝塔中坐师子座。又见无量无边百千万亿菩萨摩訶萨。及诸四众。恭敬围绕释迦牟尼佛。既见是已。皆大欢喜。得未曾有。

7 庚七、空中唱声

实时诸天。于虚空中。高声唱言。过此无量无边百千万亿阿僧祇世界。有国名娑婆。是中有佛。名释迦牟尼。今为诸菩萨摩訶萨说大乘经。名妙法莲华。教菩萨法。佛所护念。汝等当深心随喜。亦当礼拜供养释迦牟尼佛。

7 庚八、遥归命

彼诸众生。闻虚空中声已。合掌向娑婆世界。作如是言。南无释迦牟尼佛。南无释迦牟尼佛。

7 庚九、遥供养

以种种华香。璎珞。幡盖。及诸严身之具。珍宝妙物。皆共遥散娑婆世界。所散诸物。从十方来。譬如云集。变成宝帐。徧覆此间诸佛之上。

7 庚十、十方通达

于时十方世界。通达无碍。如一佛土。

5 戊三、结要劝持(4)

6 己一、称叹付嘱

尔时佛告上行等菩萨大众。诸佛神力。如是无量无边不可思议。若我以是神力。于无量无边百千万亿阿僧祇劫。为嘱累故。说此经功德。犹不能尽。

6 己二、结要付嘱

以要言之。如来一切所有之法。如来一切自在神力。如来一切秘要之藏。如来一切甚深之事。皆于此经宣示显说。

6 己三、劝奖付嘱

是故汝等。于如来灭后。应一心受持读诵。解说书写。如说修行。所在国土。若有受持读诵。解说书写。如说修行。若经卷所住之处。若于园中。若于林中。若于树下。若于僧坊。若白衣舍。若在殿堂。若山谷旷野。是中皆应起塔供养。

6 己四、释付嘱

所以者何。当知是处即是道场。诸佛于此得阿耨多罗三藐三菩提。诸佛于此转于法轮。诸佛于此而般涅槃。

4 丁二、偈颂(2)

5 戊一、颂神力

尔时世尊。欲重宣此义而说偈言：

诸佛救世者。住于大神通。为悦众生故。现无量神力。

舌相至梵天。身放无数光。为求佛道者。现此希有事。

诸佛警咳声。及弹指之声。周闻十方国。地皆六种动。

以佛灭度后。能持是经故。诸佛皆欢喜。现无量神力。

5 戊二、颂结要劝持(3)

6 己一、颂称叹

嘱累是经故。赞美受持者。于无量劫中。犹故不能尽。

是人之功德。无边无有穷。如十方虚空。不可得边际。

6 己二、颂结要，即兼得释付嘱意(4)

7 庚一、颂一切法

能持是经者。则为已见我。亦见多宝佛。及诸分身者。

又见我今日。教化诸菩萨。

7 庚二、颂自在神力

能持是经者。令我及分身。灭度多宝佛。一切皆欢喜。

十方现在佛。并过去未来。亦见亦供养。亦令得欢喜。

7 庚三、颂秘要之藏

诸佛坐道场。所得秘要法。能持是经者。不久亦当得。

7 庚四、颂甚深之事

能持是经者。于诸法之义。名字及言辞。乐说无穷尽。

如风于空中。一切无障碍。于如来灭后。知佛所说经。

因缘及次第。随义如实说。如日月光明。能除诸幽冥。

斯人行世间。能灭众生闇。教无量菩萨。毕竟住一乘。

6 己三、颂劝奖

是故有智者。闻此功德利。于我灭度后。应受持斯经。

是人于佛道。决定无有疑。

3 丙二、嘱累品，明如来摩顶付嘱(2)

4 丁一、付嘱(3)

5 戊一、如来付嘱(3)

6 己一、正付

尔时释迦牟尼佛。从（宝塔中）法座起。现大神力。以右手摩无量菩萨摩訶萨顶。而作是言。我于无量百千万亿阿僧祇劫。修习是难得阿耨多罗三藐三菩提法。今以付嘱汝等。汝等应当一心流布此法。

广令增益。如是三摩诸菩萨摩訶萨顶。而作是言。我于无量百千万亿阿僧祇劫。修习是难得阿耨多罗三藐三菩提法。今以付嘱汝等。汝等当受持读诵。广宣此法。令一切众生。普得闻知。

6 己二、释付

所以者何。如来有大慈悲。无诸怪。亦无所畏。能与众生佛之智慧。如来智慧。自然智慧。如来是一切众生之大施主。汝等亦应随学如来之法。勿生怪吝。

6 己三、诫付

于未来世。若有善男子。善女人。信如来智慧者。当为演说此法华经。使得闻知。为令其人得佛慧故。若有众生不信受者。当于如来余深法中示教利喜。汝等若能如是。则为已报诸佛之恩。

5 戊二、菩萨领受

时诸菩萨摩訶萨。闻佛作是说已。皆大欢喜。徧满其身。益加恭敬。曲躬低头。合掌向佛。俱发声言。如世尊敕。当具奉行。唯然。世尊。愿不有虑。诸菩萨摩訶萨众。如是三反。俱发声言。如世尊敕。当具奉行。唯然。世尊。愿不有虑。

5 戊三、事毕唱散

尔时释迦牟尼佛。令十方来诸分身佛。各还本土。而作是言。诸佛各随所安。多宝佛塔。还可如故。

4 丁二、欢喜

说是语时。十方无量分身诸佛。坐宝树下师子座上者。及多宝佛。并上行等无边阿僧祇菩萨大众。舍利弗等声闻四众。及一切世间天人阿修罗等。闻佛所说。皆大欢喜。

2 乙二、药王下五品，约化他劝流通(4)

3 丙一、药王品，勗宏法之师(4)

4 丁一、问

尔时宿王华菩萨白佛言。世尊。药王菩萨云何游于娑婆世界。世尊。是药王菩萨。有若干百千万亿那由他难行苦行。善哉世尊。愿少解说。诸天。龙神。夜叉。乾闥婆。阿修罗。迦楼罗。紧那罗。摩睺罗伽。人非人等。又他国土诸来菩萨。及此声闻众。闻皆欢喜。

4 丁二、答(2)

5 戊一、但答苦行(2)

6 己一、明事本

尔时佛告宿王华菩萨。乃往过去无量恒河沙劫。有佛号日月净明德如来。应供。正徧知。明行足。善逝。世间解。无上士。调御丈夫。天人师。佛。世尊。其佛有八十亿大菩萨摩訶萨。七十二恒河沙大声闻众。佛寿四万二千劫。菩萨寿命亦等。彼国无有女人。地狱。饿鬼。畜生。阿修罗等。及以诸难。地平如掌。琉璃所成。宝树庄严。宝帐覆上。垂宝华幡。宝瓶香炉。周徧国界。七宝为台。一树一台。其树去台尽一箭道。此诸宝树。皆有菩萨声闻而坐其下。诸宝台上。各有百亿诸天。作天伎乐。歌叹于佛。以为供养。

6 己二、明本事(3)

7 庚一、佛说法

尔时彼佛。为一切众生喜见菩萨。及众菩萨。诸声闻众。说法华经。

7 庚二、修供养(2)

8 辛一、现生供养(2)

9 壬一、修行得法

是一切众生喜见菩萨。乐习苦行。于日月净明德佛法中。精进经行。一心求佛。满万二千岁已。得现一切色身三昧。

9 壬二、作念报恩(2)

10 癸一、三昧力供养

得此三昧已。心大欢喜。即作念言。我得现一切色身三昧。皆是得闻法华经力。我今当供养日月净明德佛及法华经。实时入是三昧。于虚空中。雨曼陀罗华。摩訶曼陀罗华。细末坚黑栴檀。满虚空中。如云而下。又雨海彼岸栴檀之香。此香六铢价直娑婆世界。以供养佛。

10 癸二、烧身供养

11 子一、烧身

作是供养已。从三昧起。而自念言。我虽以神力供养于佛。不如以身供养。即服诸香。栴檀。薰陆。兜楼婆。毕力迦。沉水。胶香。又饮薝卜诸华香油。满千二百岁已。香油涂身。于日月净明德佛前。以天宝衣而自缠身。灌诸香油。以神通力愿而自然身。光明徧照八十亿恒河沙世界。

11 子二、佛赞

其（八十亿恒河沙世界）中诸佛同时赞言。善哉善哉。善男子。是真精进。是真法供养如来。若以华香。瓔珞。烧香。末香。涂香。天缯。幡盖。及海彼岸栴檀之香。如是等种种诸物供养。所不能及。假使国城妻子布施。亦所不及。善男子。是真第一之施。于诸施中最尊最上。以法供养诸如来故。作是语已。而各默然。

11 子三、时节

其身火然千二百岁。过是已后。其身乃尽。

8 辛二、次生供养(5)

9 壬一、生王家

一切众生喜见菩萨。作如是法供养已。命终之后。复生日月净明德佛国中。于净德王家。结跏趺坐。忽然化生。

9 壬二、说本事

即为其父而说偈言：

大王今当知。我经行彼处。实时得一切。现诸身三昧。

勤行大精进。舍所爱之身。供养于世尊。为求无上慧。

说是偈已。而白父言。日月净明德佛。今故现在。我先供养佛已。得解一切众生语言陀罗尼。复闻是法华经。八百千万亿那由他。甄迦罗。频婆罗。阿婆等偈。大王。我今当还供养此佛。

9 壬三、往佛所

白已。即坐七宝之台。上升虚空。高七多罗树。往到佛所。头面礼足。合十指爪。以偈赞佛。

容颜甚奇妙。光明照十方。我适曾供养。今复还亲觐。

尔时一切众生喜见菩萨。说是偈已。而白佛言。世尊。世尊。犹故在世。

9 壬四、如来付嘱

尔时日月净明德佛。告一切众生喜见菩萨。善男子。我涅槃时到。灭尽时至。汝可安施床座。我于今夜。当般涅槃。又敕一切众生喜见菩萨。善男子。我以佛法嘱累于汝。及诸菩萨。大弟子。并阿耨多罗三藐三菩提法。亦以三千大千七宝世界。诸宝树宝台。及给侍诸天。悉付于汝。我灭度后。所有舍利亦付嘱汝。当令流布。广设供养。应起若干千塔。如是日月净明德佛。敕一切众生喜见菩萨已。于夜后分。入于涅槃。

9 壬五、奉命任持(4)

10 癸一、起塔

尔时一切众生喜见菩萨。见佛灭度。悲感懊恼。恋慕于佛。即以海彼岸栴檀为。供养佛身而以烧之。火灭已后。收取舍利。作八万四千宝瓶。以起八万四千塔。高三世界。表刹庄严。垂诸幡盖。悬众宝铃。

10 癸二、烧臂

尔时一切众生喜见菩萨。复自念言。我虽作是供养。心犹未足。我今当更供养舍利。便语诸菩萨。大弟子。及天龙夜叉等。一切大众。汝等当一心念。我今供养日月净明德佛舍利。作是语已。即于八万四千塔前。然百福庄严臂。七万二千岁。而以供养。

10 癸三、利益

令无数求声闻众。无量阿僧祇人。发阿耨多罗三藐三菩提心。皆使得住现一切色身三昧。

10 癸四、现报

尔时诸菩萨。天人阿修罗等。见其无臂。忧恼悲哀。而作是言。此一切众生喜见菩萨。是我等师。教化我者。而今烧臂。身不具足。于时一切众生喜见菩萨。于大众中立此誓言。我舍两臂。必当得佛金

色之身。若实不虚。令我两臂还复如故。作是誓已。自然还复。由斯菩萨福德智慧淳厚所致。当尔之时。三千大千世界六种震动。天雨宝华。一切人天得未曾有。

7 庚三、结会古今(2)

8 辛一、结会

佛告宿王华菩萨。于汝意云何。一切众生喜见菩萨。岂异人乎。今药王菩萨是也。其所舍身布施。如是无量百千万亿那由他数。

8 辛二、劝修

宿王华。若有发心欲得阿耨多罗三藐三菩提者。能然手指。乃至足一指。供养佛塔。胜以国城妻子。及三千大千国土。山林河池。诸珍宝物而供养者。

5 戊二、叹经(3)

6 己一、叹能持人

若复有人。以七宝满三千大千世界。供养于佛。及大菩萨。辟支佛。阿罗汉。是人所得功德。不如受持此法华经。乃至一四句偈。其福最多。

6 己二、叹所持法(2)

7 庚一、叹法体

宿王华。譬如一切川流江河。诸水之中。海为第一。此法华经亦复如是。于诸如来所说经中。最为深大。又如土山。黑山。小铁围山。大铁围山。及十宝山。众山之中。须弥山为第一。此法华经亦复如是。于诸经中。最为其上。又如众星之中。月天子最为第一。此法华经亦复如是。于千万亿种诸经法中。最为照明。又如日天子能除诸闇。此经亦复如是。能破一切不善之闇。又如诸小王中。转轮圣王最为第一。此经亦复如是。于众经中最为其尊。又如帝释。于三十三天中王。此经亦复如是。诸经中王。又如大梵天王。一切众生之父。此经亦复如是。一切贤圣学无学。及发菩萨心者之父。又如一切凡夫人中。须陀洹。斯陀含。阿那含。阿罗汉。辟支佛为第一。此经亦复如是。一切如来所说。若菩萨所说。若声闻所说。诸经法中最为第一。有能受持是经典者。亦复如是。于一切众生中。亦为第一。一切声闻辟支佛中。菩萨为第一。此经亦复如是。于一切诸经法中。最为第一。如佛为诸法王。此经亦复如是。诸经中王。

7 庚二、叹法用

宿王华。此经能救一切众生者（总标与拔）。此经能令一切众生离诸苦恼（别明拔苦）。此经能大饶益一切众生。充满其愿（别明与乐）。如清凉池。能满一切诸渴乏者。如寒者得火。如者得衣。如商人得主。如子得母。如渡得船。如病得医。如闇得灯。如贫得宝。如民得王。如贾客得海。如炬除闇（以十二譬譬圆与拔）。此法华经亦复如是。能令众生离一切苦。一切病痛。能解一切生死之缚（总结与拔）。

6 己三、明持经福深(2)

7 庚一、明持全经福

若人得闻此法华经。若自书。若使人书。所得功德。以佛智慧筹量多少。不得其边。若书是经卷。华香。瓔珞。烧香。末香。涂香。幡盖。衣服。种种之灯。酥灯。油灯。诸香油灯。薈卜油灯。须曼那油灯。波罗罗油灯。婆利师迦油灯。那婆摩利油灯供养。所得功德。亦复无量。

7 庚二、明持此品福(2)

8 辛一、格量

宿王华。若有人闻是药王菩萨本事品者。亦得无量无边功德。若有女人。闻是药王菩萨本事品。能受持者。尽是女身。后不复受。若如来灭后。后五百岁中。若有女人闻是经典。如说修行。于此命终。即往安乐世界。阿弥陀佛。大菩萨众。围绕住处。生莲华中宝座之上。不复为贪欲所恼。亦复不为瞋

患愚痴所恼。亦复不为憍慢嫉妬诸垢所恼。得菩萨神通。无生法忍。得是忍已。眼根清净。以是清净眼根。见七百万二千亿那由他恒河沙等诸佛如来。是时诸佛遥共赞言。善哉善哉。善男子。汝能于释迦牟尼佛法中。受持读诵。思惟是经。为他人说。所得福德无量无边。火不能焚。水不能漂。汝之功德。千佛共说。不能令尽。汝今已能破诸魔贼。坏生死军。诸余怨敌皆悉摧灭。善男子。百千诸佛以神通力。共守护汝。于一切世间天人之中。无如汝者。唯除如来。其诸声闻。辟支佛。乃至菩萨。智慧禅定。无有与汝等者。宿王华。此菩萨成就如是功德智慧之力。若有人闻是药王菩萨本事品。能随喜赞善者。是人现世。口中常出青莲华香。身毛孔中。常出牛头栴檀之香。所得功德如上所说。

8 辛二、嘱累

是故宿王华。以此药王菩萨本事品嘱累于汝。我灭度后。后五百岁中。广宣流布于阎浮提。无令断绝。恶魔魔民。诸天龙夜叉。鸠槃荼等。得其便也。宿王华。汝当以神通之力。守护是经。所以者何。此经则为阎浮提人。病之良药。若人有病。得闻是经。病即消灭。不老不死。宿王华。汝若见有受持是经者。应以青莲华盛满末香。供散其上。散已。作是念言。此人不久必当取草。坐于道场。破诸魔军。当吹法螺。击大法鼓。度脱一切众生老病死海。是故求佛道者。见有受持是经典人。应当如是生恭敬心。

4 丁三、利益

说是药王菩萨本事品时。八万四千菩萨。得解一切众生语言陀罗尼。

4 丁四、多宝称善

多宝如来于宝塔中。赞宿王华菩萨言。善哉善哉。宿王华。汝成就不可思议功德。乃能问释迦牟尼佛如此之事。利益无量一切众生。

3 丙二、妙音观音二品，勗受法弟子(2)

4 丁一、妙音品(6)

5 戊一、放光东召

尔时释迦牟尼佛。放大人相肉髻光明。及放眉间白毫相光。徧照东方。百八万亿那由他恒河沙等诸佛世界。过是数已。有世界名净光庄严。其国有佛。号净华宿王智如来。应供。正徧知。明行足。善逝。世间解。无上士。调御丈夫。天人师。佛。世尊。为无量无边菩萨大众恭敬围绕。而为说法。释迦牟尼佛白毫光明。徧照其国。

5 戊二、奉命西来(2)

6 己一、发来之缘

庚初、经家叙德

- 尔时一切净光庄严国中。有一菩萨。名曰妙音。久已植众德本。供养亲近无量百千万亿诸佛。而悉成就甚深智慧。得妙幢相三昧。法华三昧。净德三昧。宿王戏三昧。无缘三昧。智印三昧。解一切众生语言三昧。集一切功德三昧。清净三昧。神通游戏三昧。慧炬三昧。庄严王三昧。净光明三昧。净藏三昧。不共三昧。日旋三昧。得如是等百千万亿恒河沙等诸大三昧。

7 庚二、被照辞佛

释迦牟尼佛光照其身。即白净华宿王智佛言。世尊。我当往诣娑婆世界。礼拜。亲近。供养释迦牟尼佛。及见文殊师利法王子菩萨。药王菩萨。勇施菩萨。宿王华菩萨。上行意菩萨。庄严王菩萨。药上菩萨。

7 庚三、彼佛寄诫

尔时净华宿王智佛。告妙音菩萨。汝莫轻彼国。生下劣想。善男子。彼娑婆世界。高下不平。土石诸山。秽恶充满。佛身卑小。诸菩萨众。其形亦小。而汝身四万二千由旬。我身六百八十万由旬。汝身第一端正。百千万福。光明殊妙。是故汝往。莫轻彼国。若佛菩萨及国土。生下劣想。

7 庚四、菩萨受旨

妙音菩萨白其佛言。世尊。我今诣娑婆世界。皆是如来之力。如来神通游戏。如来功德智慧庄严。

7 庚五、先现来相(6)

8 辛一、遣莲华

于是妙音菩萨。不起于座。身不动摇。而入三昧。以三昧力。于耆闍崛山。去法座不远。化作八万四千众宝莲华。阎浮檀金为茎。白银为叶。金刚为须。甄叔迦宝以为其台。

8 辛二、文殊问

尔时文殊师利法王子。见是莲华而白佛言。世尊。是何因缘。先现此瑞。有若干千万莲华。阎浮檀金为茎。白银为叶。金刚为须。甄叔迦宝以为其台。

8 辛三、释迦答

尔时释迦牟尼佛。告文殊师利。是妙音菩萨摩诃萨。欲从净华宿王智佛国。与八万四千菩萨围绕而来。至此娑婆世界。供养。亲近。礼拜于我。亦欲供养听法华经。

8 辛四、文殊请见

文殊师利白佛言。世尊。是菩萨种何善本。修何功德。而能有是大神通力。行何三昧。愿为我等说是三昧名字。我等亦欲勤修行之。行此三昧。乃能见是菩萨色相大小。威仪进止。惟愿世尊以神通力。彼菩萨来。令我得见。

8 辛五、释迦推功多宝

尔时释迦牟尼佛。告文殊师利。此久灭度多宝如来。当为汝等而现其相。

8 辛六、多宝命来

时多宝佛告彼菩萨。善男子。来。文殊师利法王子欲见汝身。

6 己二、正明发来(7)

7 庚一、与眷属经历

于时妙音菩萨。于彼国没。与八万四千菩萨俱共发来。所经诸国。六种震动。皆悉雨于七宝莲华。百千天乐。不鼓自鸣。

7 庚二、叙相登台

是菩萨。目如广大青莲华叶。正使和合百千万月。其面貌端正。复过于此。身真金色。无量百千功德庄严。威德炽盛。光明照曜。诸相具足。如那罗延坚固之身。入七宝台。上升虚空。去地七多罗树。诸菩萨众恭敬围绕。而来诣此娑婆世界耆闍崛山。

7 庚三、问讯传旨

到已。下七宝台。以价直百千瓔珞。持至释迦牟尼佛所。头面礼足。奉上瓔珞。而白佛言。世尊。净华宿王智佛问讯世尊。少病少恼。起居轻利。安乐行不。四大调和不。世事可忍不。众生易度不。无多贪欲。瞋恚愚痴。嫉妬悭慢不。无不孝父母。不敬沙门。邪见。不善心。不摄五情不。世尊。众生能降伏诸魔怨不。久灭度多宝如来在七宝塔中。来听法不（已上俱传净华宿王佛旨）。又问讯多宝如来。安隐少恼。堪忍久住不。

7 庚四、请见多宝

世尊。我今欲见多宝佛身。惟愿世尊示我令见。

7 庚五、释迦为通

尔时释迦牟尼佛。语多宝佛。是妙音菩萨欲得相见。

7 庚六、塔中称善

时多宝佛告妙音言。善哉。善哉。汝能为供养释迦牟尼佛。及听法华经。并见文殊师利等。故来至此。

7 庚七、问答往因(2)

8 辛一、问

尔时华德菩萨白佛言。世尊。是妙音菩萨。种何善根。修何功德。有是神力。

8 辛二、答

佛告华德菩萨。过去有佛。名云雷音王。多陀阿伽度。阿罗诃。三藐三佛陀。国名现一切世间。劫名喜见。妙音菩萨于万二千岁。以十万种伎乐。供养云雷音王佛。并奉上八万四千七宝鉢。以是因缘果报。今生净华宿王智佛国。有是神力。华德。于汝意云何。尔时云雷音王佛所。妙音菩萨。伎乐供养。奉上宝器者。岂异人乎。今此妙音菩萨摩訶萨是。华德。是妙音菩萨。已曾供养亲近无量诸佛。久植德本。又值恒河沙等百千万亿那由他佛。

5 戊三、十方宏经(2)

6 己一、正明现身说法

华德。汝但见妙音菩萨其身在此。而是菩萨现种种身。处处为诸众生说是经典。或现梵王身。或现帝释身。或现自在天身。或现大自在天身。或现天大将军身。或现毘沙门天王身。或现转轮圣王身。或现诸小王身。或现长者身。或现居士身。或现宰官身。或现婆罗门身。或现比丘。比丘尼。优婆塞。优婆夷身。或现长者居士妇女身。或现宰官妇女身。或现婆罗门妇女身。或现童男童女身。或现天龙。夜叉。乾闥婆。阿修罗。迦楼罗。紧那罗。摩睺罗伽。人非人等身。而说是经。诸有地狱。饿鬼。畜生。及众难处。皆能救济。乃至王后宫。变为女身而说是经。华德。是妙音菩萨。能救护娑婆世界诸众生者。是妙音菩萨。如是种种变化现身。在此娑婆国土。为诸众生说是经典。于神通变化智慧。无所损减。是菩萨以若干智慧。明照娑婆世界。令一切众生各得所知。于十方恒河沙世界中。亦复如是。若应以声闻形得度者。现声闻形而为说法。应以辟支佛形得度者。现辟支佛形而为说法。应以菩萨形得度者。现菩萨形而为说法。应以佛形得度者。即现佛形而为说法。如是种种。随所应度而为现形。乃至应以灭度而得度者。示现灭度。华德。妙音菩萨摩訶萨。成就大神通智慧之力。其事如是。

6 己二、问答所住三昧(2)

7 庚一、问

尔时华德菩萨白佛言。世尊。是妙音菩萨深种善根。世尊。是菩萨住何三昧。而能如是在所变现。度脱众生。

7 庚二、答

佛告华德菩萨。善男子。其三昧名现一切色身。妙音菩萨住是三昧中。能如是饶益无量众生。

5 戊四、二土得益

说是妙音菩萨品时。与妙音菩萨俱来者八万四千人。皆得现一切色身三昧。此娑婆世界无量菩萨。亦得是三昧及陀罗尼。

5 戊五、还归本国

尔时妙音菩萨摩訶萨。供养释迦牟尼佛。及多宝佛塔已。还归本土。所经诸国。六种震动。雨宝莲华。作百千万亿种种伎乐。既到本国。与八万四千菩萨围绕。至净华宿王智佛所。白佛言。世尊。我到娑婆世界饶益众生。见释迦牟尼佛。及见多宝佛塔。礼拜供养。又见文殊师利法王子菩萨。及见药王菩萨。得勤精进力菩萨。勇施菩萨等。亦令是八万四千菩萨。得现一切色身三昧。

5 戊六、闻品进道

说是妙音菩萨来往品时。四万二千天子。得无生法忍。华德菩萨。得法华三昧。

4 丁二、普门品(2)

5 戊一、问答(2)

6 己一、长文(2)

7 庚一、番(2)

8 辛一、问

尔时无尽意菩萨。即从座起。偏袒右肩。合掌向佛。而作是言。世尊。观世音菩萨。以何因缘名观世音。

8 辛二、答(3)

9 壬一、总答

佛告无尽意菩萨。善男子。若有无量百千万亿众生。受诸苦恼。闻是观世音菩萨。一心称名。观世音菩萨实时观其音声。皆得解脱。

9 壬二、别答(3)

10 癸一、约口业机明应(2)

11 子一、明七难(7)

12 丑一、火难

若有持是观世音菩萨名者。设入大火。火不能烧。由是菩萨威神力故。

12 丑二、水难

若为大水所漂。称其名号。即得浅处。

12 丑三、罗刹难

若有百千万亿众生。为求金银琉璃。砗磲玛瑙。珊瑚琥珀。真珠等宝。入于大海。假使黑风吹其船舫。飘堕罗刹鬼国。其中若有乃至一人。称观世音菩萨名者。是诸人等。皆得解脱罗刹之难。以是因缘。名观世音。

12 丑四、刀杖难

若复有人。临当被害。称观世音菩萨名者。彼所执刀杖。寻段段坏。而得解脱。

12 丑五、鬼难

若三千大千国土。满中夜叉罗刹。欲来恼人。闻其称观世音菩萨名者。是诸恶鬼。尚不能以恶眼视之。况复加害。

12 丑六、枷锁难

设复有人。若有罪。若无罪。枷锁检系其身。称观世音菩萨名者。皆悉断坏。即得解脱。

12 丑七、怨贼难

若三千大千国土。满中冤贼。有一商主。将诸商人。赍持重宝。经过险路。其中一人作是唱言。诸善男子。勿得恐怖。汝等应当一心称观世音菩萨名号。是菩萨能以无畏施于众生。汝等若称名者。于此怨贼当得解脱。众商人闻。俱发声言。南无观世音菩萨。称其名故。即得解脱。

11 子二、结叹

无尽意。观世音菩萨摩訶萨威神之力。巍巍如是。

10 癸二、约意业机明应
11 子一、明三毒

若有众生。多于婬欲。常念恭敬观世音菩萨。便得离欲。若多瞋恚。常念恭敬观世音菩萨。便得离瞋。若多愚痴。常念恭敬观世音菩萨。便得离痴。

11 子二、结叹

无尽意。观世音菩萨有如是等大威神力。多所饶益。是故众生常应心念。

10 癸三、约身业机明应(2)
11 子一、明二求

若有女人。设欲求男。礼拜供养观世音菩萨。便生福德智慧之男。设欲求女。便生端正有相之女。宿植德本。众人爱敬。

11 子二、结叹

无尽意。观世音菩萨有如是力。若有众生恭敬礼拜观世音菩萨。福不唐捐。

9 壬三、劝持名答(3)
10 癸一、劝持

是故众生。皆应受持观世音菩萨名号。

10 癸二、格量

无尽意。若有人受持六十二亿恒河沙菩萨名字。复尽形供养饮食。衣服。卧具。医药。于汝意云何。是善男子。善女人。功德多不。无尽意言。甚多。世尊。佛言。若复有人。受持观世音菩萨名号。乃至一时礼拜供养。是二人福。正等无异。于百千万亿劫。不可穷尽。

10 癸三、结叹

无尽意。受持观世音菩萨名号。得如是无量无边福德之利。

7 庚二、次番(2)
8 辛一、问

无尽意菩萨白佛言。世尊。观世音菩萨。云何游此娑婆世界。云何而为众生说法。方便之力。其事云何。

8 辛二、答(3)
9 壬一、别答

佛告无尽意菩萨。善男子。若有国土众生。应以佛身得度者。观世音菩萨即现佛身而为说法。应以辟支佛身得度者。即现辟支佛身而为说法。应以声闻身得度者。即现声闻身而为说法。应以梵王身得度者。即现梵王身而为说法。应以帝释身得度者。即现帝释身而为说法。应以自在天身得度者。即现自在天身而为说法。应以大自在天身得度者。即现大自在天身而为说法。应以天大将军身得度者。即现天大将军身而为说法。应以毘沙门身得度者。即现毘沙门身而为说法。应以小王身得度者。即现小王身而为说法。应以长者身得度者。即现长者身而为说法。应以居士身得度者。即现居士身而为说法。应以宰官身得度者。即现宰官身而为说法。应以婆罗门身得度者。即现婆罗门身而为说法。应以比丘。比丘尼。优婆塞。优婆夷身得度者。即现比丘。比丘尼。优婆塞。优婆夷身而为说法。应以长者。居士。宰官。婆罗门妇女身得度者。即现妇女身而为说法。应以童男。童女身得度者。即现童男。童女身而为说法。应以天龙。夜叉。乾闥婆。阿修罗。迦楼罗。紧那罗。摩睺罗伽。人非人等身得度者。即皆现之而为说法。应以执金刚神得度者。即现执金刚神而为说法。

9 壬二、总答

无尽意。是观世音菩萨。成就如是功德。以种种形。游诸国土。度脱众生。

9 壬三、劝供养(2)

10 癸一、劝

是故汝等。应当一心供养观世音菩萨。是观世音菩萨摩訶萨。于怖畏急难之中。能施无畏。是故此娑婆世界。皆号之为施无畏者。

10 癸二、受旨(6)

11 子一、奉命

无尽意菩萨白佛言。世尊。我今当供养观世音菩萨。即解颈众宝珠璎珞。价直百千两金。而以与之。作是言。仁者。受此法施珍宝璎珞。

11 子二、不受

时观世音菩萨。不肯受之。

11 子三、重奉

无尽意复白观世音菩萨言。仁者。愍我等故。受此璎珞。

11 子四、佛劝

尔时佛告观世音菩萨。当愍此无尽意菩萨。及四众天龙。夜叉。乾闥婆。阿修罗。迦楼罗。紧那罗。摩睺罗伽。人非人等故。受是璎珞。

11 子五、受已转奉

实时观世音菩萨。愍诸四众。及于天龙。人非人等。受其璎珞。分作二分。一分奉释迦牟尼佛。一分奉多宝佛塔。

11 子六、叹结

无尽意。观世音菩萨。有如是自在神力。游于娑婆世界。

6 己二、偈颂(3)

7 庚一、双颂两问

尔时无尽意菩萨以偈问曰：

世尊妙相具。我今重问彼。佛子何因缘。名为观世音。

7 庚二、双颂两答(2)

8 辛一、加颂总叹行愿

具足妙相尊。偈答无尽意。汝听观音行。善应诸方所。

弘誓深如海。历劫不思议。侍多千亿佛。发大清净愿。

8 辛二、别颂两答(2)

9 壬一、颂前答(2)

10 癸一、颂总答

我为汝略说。闻名及见身。心念不空过。能灭诸有苦。

10 癸二、颂别答(2)

11 子一、颂七难(12)

12 丑一、颂第一火难

假使兴害意。推落大火坑。念彼观音力。火坑变成池。

12 丑二、颂第二水难

或漂流巨海。龙鱼诸鬼难。念彼观音力。波浪不能没。

12 丑三、加颂堕须弥难

或在须弥峰。为人所推堕。念彼观音力。如日虚空住。

12 丑四、加颂堕金刚山难

或被恶人逐。堕落金刚山。念彼观音力。不能损一毛。

12 丑五、超颂第七冤贼难

或值冤贼绕。各执刀加害。念彼观音力。咸即起慈心。

12 [丑六、追颂第四刀杖难](#)

或遭王难苦。临刑欲寿终。念彼观音力。刀寻段段坏。

12 [丑七、追颂第六枷锁难](#)

或囚禁枷锁。手足被杻械。念彼观音力。释然得解脱。

12 [丑八、加颂咒咀毒药难](#)

咒咀诸毒药。所欲害身者。念彼观音力。还着于本人。

12 [丑九、追颂第五鬼难](#)

或遇恶罗刹。毒龙诸鬼等。念彼观音力。时悉不敢害。

12 [丑十、加颂恶兽难](#)

若恶兽围绕。利牙爪可怖。念彼观音力。疾走无边方。

12 [丑十一、加颂蛇蝎难](#)

虺蛇及蝎蝎。气毒烟火然。念彼观音力。寻声自回去。

12 [丑十二、加颂雷雨难](#)

云雷鼓掣电。降雹澍大雨。念彼观音力。应时得消散。

11 [子二、颂三毒二求](#)

众生被困厄。无量苦逼身。观音妙智力。能救世间苦。

9 [壬二、颂后答\(2\)](#)

10 [癸一、正颂示现\(3\)](#)

11 [子一、身业普应](#)

具足神通力。广修智方便。十方诸国土。无刹不现身。

种种诸恶趣。地狱鬼畜生。生老病死苦。以渐悉令灭。

11 [子二、明意业普观](#)

真观清净观。广大智慧观。悲观及慈观。常愿常瞻仰。

无垢清净光。慧日破诸暗。能伏灾风火。普明照世间。

11 [子三、明口业普说](#)

悲体戒雷震。慈意妙大云。澍甘露法雨。灭除烦恼燄。

10 [癸二、加颂显机显应](#)

诤讼经官处。怖畏军阵中。念彼观音力。众怨悉退散。

7 [庚三、双颂两劝\(2\)](#)

8 [辛一、颂前番劝持名\(2\)](#)

9 [壬一、明境智深妙以劝常念](#)

妙音观世音。梵音海潮音。胜彼世间音。是故须常念。

9 [壬二、明感应难测以劝勿疑](#)

念念勿生疑。观世音净圣。于苦恼死厄。能为作依怙。

8 [辛二、颂后番劝供养](#)

具一切功德。慈眼视众生。福聚海无量。是故应顶礼。

5 [戊二、闻品功德\(2\)](#)

6 [己一、持地叹证](#)

尔时持地菩萨。即从座起。前白佛言。世尊。若有众生。闻是观世音菩萨品自在之业。普门示现神通力者。当知是人功德不少。

6 [己二、经家述益](#)

佛说是普门品时。众中八万四千众生。皆发无等等阿耨多罗三藐三菩提心。

3 丙三、陀罗尼品，是明咒护(4)

4 丁一、问持经功德

尔时药王菩萨。即从座起。偏袒右肩。合掌向佛。而白佛言。世尊。若善男子。善女人。有能受持法华经者。若读诵通利。若书写经卷。得几所福。

4 丁二、答甚多

佛告药王。若有善男子。善女人。供养八百万亿那由他恒河沙等诸佛。于汝意云何。其所得福。宁为多不。甚多。世尊。佛言。若善男子。善女人。能于是经。乃至受持一四句偈。读诵解义。如说修行。功德甚多。

4 丁三、请以咒护

5 戊一、药王(4)

6 己一、请

尔时药王菩萨白佛言。世尊。我今当与说法者陀罗尼咒。以守护之。

6 己二、说

即说咒曰。安尔（一）。曼尔（二）。摩祢（三）。摩摩祢（四）。旨隶（五）。遮黎第（六）。除咩（莫者切七）。除履多玮（八）。羶帝（九）。目帝（十）。目多履（十一）。娑履（十二）。阿玮娑履（十三）。桑履（十四）。娑履（十五）。叉裔（十六）。阿叉裔（十七）。阿耆臒（十八）。羶帝（十九）。除履（二十）。陀罗尼（二十一）。阿卢伽婆娑（苏奈切）簸蔗毗叉臒（二十二）。祢毗剃（二十三）。阿便哆逻祢履剃（二十四）。阿亶（多罕切）哆波隶输地（二十五）。欧究隶（二十六）。牟究隶（二十七）。阿罗隶（二十八）。波罗隶（二十九）。首迦差（初几切三十）。阿三磨三履（三十一）。佛陀毗吉利袞（音姪）帝（三十二）。达磨波利差（猜离切）帝（三十三）。僧伽涅瞿沙祢（三十四）。婆舍婆舍输地（三十五）。曼哆逻（三十六）。曼哆逻叉夜多（三十七）。邮楼哆（三十八）。邮楼哆僑舍略（来加切三十九）。恶叉逻（四十）。恶叉治多治（四十一）。阿婆卢（四十二）。阿摩若（荏羶切）那多夜（四十三）。

6 己三、叹

世尊。是陀罗尼神咒。六十二亿恒河沙等诸佛所说。若有侵毁此法师者。则为侵毁是诸佛已。

6 己四、印

时释迦牟尼佛。赞药王菩萨言。善哉善哉。药王。汝愍念拥护此法师故。说是陀罗尼。于诸众生多所饶益。

5 戊二、勇施(3)

6 己一、请

尔时勇施菩萨白佛言。世尊。我亦为拥护读诵受持法华经者。说陀罗尼。若此法师得是陀罗尼。若夜叉。若罗刹。若富单那。若吉蔗。若鸠槃荼。若饿鬼等。伺求其短。无能得便。

6 己二、说

即于佛前而说咒曰。座（誓螺切）隶（一）。摩诃座隶（二）。郁枳（音纸三）。目枳（四）。阿隶（五）。阿罗婆第（六）。涅隶第（七）。涅隶多婆第（八）。伊致（者利切）梔（女纸切九）。韦致梔（十）。旨致梔（十一）。涅隶墀梔（十二）。涅犁墀婆底（十三）。

6 己三、叹

世尊。是陀罗尼神咒。恒河沙等诸佛所说。亦皆随喜。若有侵毁此法师者。则为侵毁是诸佛已。

5 戊三、毘沙门(3)

6 己一、请

尔时毗沙门天王护世者。白佛言。世尊。我亦为愍念众生。拥护此法师故。说是陀罗尼。

6 己二、说

即说咒曰。阿梨（一）。那梨（二）。那梨（三）。阿那卢（四）。那履（五）。拘那履（六）。

6 己三、叹

世尊。以是神咒拥护法师。我亦自当拥护持是经者。令百由旬内无诸衰患。

5 戊四、持国(3)

6 己一、请

尔时持国天王在此会中。与千万亿那由他乾闥婆众。恭敬围绕。前诣佛所。合掌白佛言。世尊。我亦以陀罗尼神咒。拥护持法华经者。

6 己二、说

即说咒曰。阿伽祢（一）。伽祢（二）。瞿利（三）。干陀利（四）。旃陀利（五）。摩登（音邓）耆（六）。常求利（七）。浮楼莎柅（八）。頔底（九）。

6 己三、叹

世尊。是陀罗尼神咒。四十二亿诸佛所说。若有侵毁此法师者。则为侵毁是诸佛已。

5 戊五、罗刹女(5)

6 己一、列名同请

尔时有罗刹女等。一名蓝婆。二名毗蓝婆。三名曲齿。四名华齿。五名黑齿。六名多发。七名无厌足。八名持瓔珞。九名臯帝。十名夺一切众生精气。是十罗刹女。与鬼子母。并其子及眷属。俱诣佛所。同声白佛言。世尊。我等亦欲拥护读诵受持法华经者。除其衰患。若有伺求法师短者。令不得便。

6 己二、说

即于佛前而说咒曰。伊提履（一）。伊提泯（二）。伊提履（三）。阿提履（四）。伊提履（五）。泥履（六）。泥履（七）。泥履（八）。泥履（九）。泥履（十）。楼酰（十一）。楼酰（十二）。楼酰（十三）。楼酰（十四）。多酰（十五）。多酰（十六）。多酰（十七）。兜酰（十八）。酰（十九）。

6 己三、叹

宁上我头上。莫恼于法师。若夜叉。若罗刹。若饿鬼。若富单那。若吉蔗。若毗陀罗。若犍驮。若乌摩勒伽。若阿跋摩罗。若夜叉吉蔗。若人吉蔗。若热病。若一日。若二日。若三日。若四日。若至七日。若常热病。若男形。若女形。若童男形。若童女形。乃至梦中。亦复莫恼。即于佛前而说偈言：

若不顺我咒。恼乱说法者。头破作七分。如阿梨树枝。

如杀父母罪。亦如压油殃。斗秤欺诳人。调达破僧罪。

犯此法师者。当获如是殃。

6 己四、誓

诸罗刹女说此偈已。白佛言。世尊。我等亦当身自拥护。受持读诵修行是经者。令得安隐。离诸衰患。消众毒药。

6 己五、印

佛告诸罗刹女。善哉善哉。汝等但能拥护受持法华名者。福不可量。何况拥护具足受持。供养经卷。华香。瓔珞。末香。涂香。烧香。幡盖。伎乐。然种种灯。酥灯。油灯。诸香油灯。酥摩那华油灯。薝卜华油灯。婆师迦华油灯。优鉢罗华油灯。如是等百千种供养者。皇帝。汝等及眷属。应当拥护如是法师。

4 丁四、闻品得益

说是陀罗尼品时。六万八千人得无生法忍。

3 丙四、妙庄严品，是明人护(6)

4 丁一、明事本

尔时佛告诸大众。乃往古世。过无量无边不可思议阿僧祇劫。有佛名云雷音宿王华智。多陀阿伽度。阿罗诃。三藐三佛陀。国名光明庄严。劫名喜见。

4 丁二、双标所化能化

彼佛法中有王。名妙庄严。其王夫人。名曰净德。有二子。一名净藏。二名净眼。是二子有大神力。福德。智慧。久修菩萨所行之道。所谓檀波罗蜜。尸罗波罗蜜。羼提波罗蜜。毗离耶波罗蜜。禅波罗蜜。般若波罗蜜。方便波罗蜜。慈悲喜舍。乃至三十七品助道法。皆悉明了通达。又得菩萨净三昧。日星宿三昧。净光三昧。净色三昧。净照明三昧。长庄严三昧。大威德藏三昧。于此三昧亦悉通达。

4 丁三、明能化方便(3)

5 戊一、时至

尔时彼佛。欲引导妙庄严王。及愍念众生故。说是法华经。

5 戊二、论议

时净藏。净眼二子。到其母所。合十指爪掌。白言。愿母往诣云雷音宿王华智佛所。我等亦当侍从。亲近。供养。礼拜。所以者何。此佛于一切天人众中说法华经。宜应听受。母告子言。汝父信受外道。深着婆罗门法。汝等应往白父。与俱去。净藏。净眼。合十指爪掌。白母。我等是法王子。而生此邪见家。母告子言。汝等当忧念汝父。为现神变。若得见者。心必清净。或听我等。往至佛所。

5 戊三、现化

于是二子念其父故。涌在虚空。高七多罗树。现种种神变。于虚空中行住坐卧。身上出水。身下出火。身下出水。身上出火。或现大身满虚空中。而复现小。小复现大。于空中灭。忽然在地。入地如水。履水如地。现如是等种种神变。令其父王心净信解。

4 丁四、明所化得益(10)

5 戊一、信子伏师

时父见子神力如是。心大欢喜。得未曾有。合掌向子言。汝等师为谁。谁之弟子。二子白言。大王。彼云雷音宿王华智佛。今在七宝菩提树下法座上坐。于一切世间天人众中。广说法华经。是我等师。我是弟子。父语子言。我今亦欲见汝等师。可共俱往。

5 戊二、白母求出家

于是二子从空中下。到其母所。合掌白母。父王今已信解。堪任发阿耨多罗三藐三菩提心。我等为父已作佛事。愿母见听。于彼佛所出家修道。尔时二子。欲重宣其意。以偈白母：

愿母放我等。出家作沙门。诸佛甚难值。我等随佛学。

如优昙鉢华。值佛复难是。脱诸难亦难。愿听我出家。

母即告言。听汝出家。所以者何。佛难值故。

5 戊三、重催见佛

于是二子白父母言。善哉。父母。愿时往诣云雷音宿王华智佛所。亲近供养。所以者何。佛难得值。如优昙鉢罗华。又如一眼之龟。值浮木孔。而我等宿福深厚。生值佛法。是故父母当听我等。令得出家。所以者何。诸佛难值。时亦难遇。

5 戊四、叙叹功德

彼时妙庄严王后宫八万四千人。皆悉堪任受持是法华经。净眼菩萨。于法华三昧久已通达。净藏菩萨。已于无量百千万亿劫。通达离诸恶趣三昧。欲令一切众生离诸恶趣故。其王夫人。得诸佛集三昧。能知诸佛秘密之藏。二子如是以方便力。善化其父。令心信解。好乐佛法。

5 戊五、俱诣佛所

于是妙庄严王。与群臣眷属俱。净德夫人。与后宫采女眷属俱。其王二子。与四万二千人俱。一时共诣佛所。到已。头面礼足。绕佛三匝。郤住一面。尔时彼佛为王说法。示教利喜。王大欢悦。尔时妙庄严王。及其夫人。解颈真珠璎珞。价直百千。以散佛上。于虚空中化成四柱宝台。台中有大宝床。敷百千万天衣。其上有佛结跏趺坐。放大光明。尔时妙庄严王作是念。佛身希有。端严殊特。成就第一微妙之色。

5 戊六、佛授王记

时云雷音宿王华智佛告四众言。汝等见是妙庄严王。于我前合掌立不。此王于我法中作比丘。精勤修习。助佛道法。当得作佛。号娑罗树王。国名大光。劫名大高王。其娑罗树王佛。有无量菩萨众。及无量声闻。其国平正。功德如是。

5 戊七、出家修行

其王实时以国付弟。与夫人二子。并诸眷属。于佛法中出家修道。王出家已。于八万四千岁。常勤精进。修行妙法华经。过是已后。得一切净功德庄严三昧。

5 戊八、称叹二子

即升虚空。高七多罗树。而白佛言。世尊。此我二子已作佛事。以神通变化。转我邪心。令得安住于佛法中。得见世尊。此二子者。是我善知识。为欲发起宿世善根。饶益我故。来生我家。

5 戊九、佛述行高

尔时云雷音宿王华智佛。告妙庄严王言。如是如是。如汝所言。若善男子。善女人。种善根故。世世得善知识。其善知识能作佛事。示教利喜。令入阿耨多罗三藐三菩提。大王当知。善知识者。是大因缘。所谓化导令得见佛。发阿耨多罗三藐三菩提心。大王。汝见此二子不。此二子已曾供养六十五百千万亿那由他恒河沙诸佛。亲近恭敬。于诸佛所受持法华经。愍念邪见众生。令住正见。

5 戊十、赞佛自誓

妙庄严王即从虚空中下。而白佛言。世尊。如来甚希有。以功德智慧故。顶上肉髻。光明显照。其眼长广。而紺青色。眉间毫相。白如珂月。齿白齐密。常有光明。唇色赤好。如频婆果。尔时妙庄严王。赞叹佛如是等无量百千万亿功德已。于如来前。一心合掌。复白佛言。世尊。未曾有也。如来之法。具足成就不可思议微妙功德。教戒所行。安隐快善。我从今日。不复自随心行。不生邪见。憍慢瞋恚。诸恶之心。说是语已。礼佛而出。

4 丁五、结会古今

佛告大众。于意云何。妙庄严王岂异人乎。今华德菩萨是。其净德夫人。今佛前（时放）光照（于东方所召之）。庄严相菩萨是。哀愍妙庄严王及诸眷属故。于彼（光明庄严国土）中生。其二子者。今药王菩萨。药上菩萨是。是药王药上菩萨。成就如此诸大功德。已于无量百千万亿诸佛所。植众德本。成就不可思议诸善功德。若有人识是二菩萨名字者。一切世间诸天人民亦应礼拜。

4 丁六、闻品悟道

佛说是妙庄严王本事品时。八万四千人远尘离垢。于诸法中得法眼净。

2 乙三、普贤劝发品，约自行劝流通(4)

3 丙一、发来(3)

4 丁一、上供

尔时普贤菩萨。以自在神通力。威德名闻。与大菩萨无量无边不可称数。从东方来。所经诸国。普皆震动。雨宝莲华。作无量百千万亿种种伎乐。

4 丁二、下化

又与无数诸天龙。夜叉。乾闥婆。阿修罗。迦楼罗。紧那罗。摩睺罗伽。人非人等。大众围绕。各现威德神通之力。

4 丁三、修敬

到娑婆世界耆闍崛山中。头面礼释迦牟尼佛。右遶七匝。

3 丙二、劝发(2)

4 丁一、请问劝发(2)

5 戊一、问

白佛言。世尊。我于宝威德上王佛国。遥闻此娑婆世界说法华经。与无量无边百千万亿诸菩萨众。共来听受。惟愿世尊当为说之。若善男子。善女人。于如来灭后。云何能得是法华经。

5 戊二、答

佛告普贤菩萨。若善男子。善女人。成就四法。于如来灭后。当得是法华经。一者为诸佛护念。二者植众德本。三者入正定聚。四者发救一切众生之心。善男子。善女人。如是成就四法。于如来灭后。必得是经。

4 丁二、誓愿劝发(2)

5 戊一、誓愿护人(6)

6 己一、攘其外难

尔时普贤菩萨白佛言。世尊。于后五百岁浊恶世中。其有受持是经典者。我当守护。除其衰患。令得安隐。使无伺求得其便者。若魔。若魔子。若魔女。若魔民。若为魔所著者。若夜叉。若罗刹。若鸠槃荼。若毘舍闍。若吉蔗。若富单那。若韦陀罗等。诸恼人者。皆不得便。

6 己二、教以内法(3)

7 庚一、行立读诵

是人若行若立。读诵此经。我尔时乘六牙白象王。与大菩萨众。俱诣其所。而自现身。供养守护。安慰其心。亦为供养法华经故。

7 庚二、若坐思惟

是人若坐。思惟此经。尔时我复乘白象王。现其人前。其人若于法华经有所忘失一句一偈。我当教之。与共读诵。还令通利。尔时受持读诵法华经者。得见我身。甚大欢喜。转复精进。以见我故。即得三昧及陀罗尼。名为旋陀罗尼。百千万亿旋陀罗尼。法音方便陀罗尼。得如是等陀罗尼。

7 庚三、三七精进

世尊。若后世后五百岁。浊恶世中。比丘。比丘尼。优婆塞。优婆夷。求索者。受持者。读诵者。书写者。欲修习是法华经。于三七日中。应一心精进。满三七日已。我当乘六牙白象。与无量菩萨而自围绕。以一切众生所喜见身。现其人前而为说法。示教利喜。亦复与其陀罗尼咒。得是陀罗尼故。无有非人能破坏者。亦不为女人之所惑乱。我身亦自常护是人。惟愿世尊。听我说此陀罗尼咒。即于佛前而说咒曰：

阿檀地（一）。檀陀婆地（二）。檀陀婆帝（三）。檀陀鸠舍隶（四）。檀陀修陀隶（五）。修陀隶（六）。修陀罗婆底（七）。佛陀波羶祇（八）。萨婆陀罗尼阿婆多尼（九）。萨婆婆沙阿婆多尼（十）。修阿婆多尼（十一）。僧伽婆履叉尼（十二）。僧伽涅槃伽陀尼（十三）。阿僧祇（十四）。僧伽婆伽地（十五）。帝隶。阿惰僧伽兜略（卢遮切）。阿罗帝波罗帝（十六）。萨婆僧伽地三摩地伽兰地（十七）。萨婆达磨修波利刹帝（十八）。萨婆萨埵楼驮憍舍略阿伽地（十九）。辛阿毗吉利地帝（二十）。

6 己三、覆以神力

世尊。若有菩萨得闻是陀罗尼者。当知普贤神通之力。若法华经。行阎浮提有受持者。应作此念。皆是普贤威神之力。

6 己四、示胜因

若有受持。读诵。正忆念。解其义趣。如说修行。当知是人行普贤行。于无量无边诸佛所。深种善根。为诸如来手摩其头。

6 己五、示近果

若但书写。是人命终。当生忉利天上。是时八万四千天女。作众伎乐而来迎之。其人即着七宝冠。于采女中娱乐快乐。何况受持。读诵。正忆念。解其义趣。如说修行。若有人受持。读诵。解其义趣。是人命终。为千佛授手。令不恐怖。不堕恶趣。即往兜率天上。弥勒菩萨所。弥勒菩萨有三十二相。大菩萨众所共围绕。有百千万亿天女眷属。而于中生。有如是等功德利益。

6 己六、总结劝

是故智者。应当一心自书。若使人书。受持。读诵。正忆念。如说修行。

5 戊二、誓愿护法

世尊。我今以神通力故。守护是经。于如来灭后。阎浮提内。广令流布。使不断绝。

3 丙三、述发(2)

4 丁一、先述护法

尔时释迦牟尼佛赞言。善哉善哉。普贤。汝能护助是经。令多所众生安乐利益。汝已成就不可思议功德。深大慈悲。从久远来。发阿耨多罗三藐三菩提意。而能作是神通之愿。守护是经。我当以神通力。守护能受持普贤菩萨名者。

4 丁二、述护人(5)

5 戊一、述第二教以内法

普贤。若有受持。读诵。正忆念。修习。书写是法华经者。当知是人则见释迦牟尼佛。如从佛口闻此经典。当知是人。供养释迦牟尼佛。当知是人。佛赞善哉。当知是人。为释迦牟尼佛手摩其头。当知是人。为释迦牟尼佛衣之所覆。

5 戊二、述第四示胜因

如是之人。不复贪着世乐。不好外道经书手笔。亦复不喜亲近其人。及诸恶者。若屠儿。若畜猪羊鸡狗。若猎师。若街卖女色。是人心意质直。有正忆念。有福德力。是人不为三毒所恼。亦不为嫉妬。我慢。邪慢。增上慢所恼。是人少欲知足。能修普贤之行。

5 戊三、述第五示近果

普贤。若如来灭后。后五百岁。若有人见受持读诵法华经者。应作是念。此人不久当诣道场。破诸魔众。得阿耨多罗三藐三菩提。转法轮。击法鼓。吹法螺。雨法雨。当坐天人大众中师子法座上。普贤。若于后世。受持读诵是经典者。是人不复贪着衣服。卧具。饮食。资生之物。所愿不虚。亦于现世得其福报。

5 戊四、述第一攘外难

若有人轻毁之。言汝狂人耳。空作是行。终无所获。如是罪报。当世世无眼。若有供养赞叹之者。当于今世得现果报。若复见受持是经者。出其过恶。若实若不实。此人现世得白癞病。若轻笑之者。当世世牙齿疎缺。丑唇平鼻。手脚褴褛。眼目角睐。身体臭秽。恶疮脓血。水腹短气。诸恶重病。

5 戊五、述总结劝

是故普贤。若见受持是经典者。当起远迎。当如敬佛。

3 丙四、发益(2)

4 丁一、闻品益

说是普贤劝发品时。恒河沙等无量无边菩萨。得百千万亿旋陀罗尼。三千大千世界微尘等诸菩萨。具普贤道。

4 丁二、闻经益

佛说是经时。普贤等诸菩萨。舍利弗等诸声闻。及诸天龙。人非人等。一切大会。皆大欢喜。受持佛语。作礼而去。

悟修师父依据蕅益大师《妙法莲华经台宗会义》科判xmind

败空破有转制幕布